

O Le Liahona

**O Se Aso
Mamalu ina ia
Manatua, i. 24**

**O Auala e Aoao Atu
ai le Faola i le
Aiga, i. 10**

**Taitaiina e le
Alii: O le Ala o
Iosefa i Palamaira, i. 14**

**Avea ma se Soo e sili atu
ona Lelei: Lesona mai le
Tusi a Luka, i. 28**





*“O ai foi se tagata o
outou pe a ole mai
lona atalii se areto,
na te avane ea ia
te ia se maa?”*

*“A ole mai foi se i’a,
na te avane ea ia
te ia se gata?”*

*“O lenei, o outou e
leaga, afai ua iloa
e outou ona avatu
o mea lelei ma a
outou fanau, e le sili
ea ona foaiina mai
e lo outou Tamā o
i le lagi o mea lelei i
e ole atu ai ia te ia?”*

Mataio 7:9–11



O SAVALI

- 4 Savali a le Au Peresitene Sili: E Mafai na Faavavau Aiga**
Saunia e Peresitene Henry B. Eyring
- 7 Savali a Faiaoga Asiasi: O Uiga Paia o Iesu Keriso-E Mama**

TALA FAAALIA

- 10 E Faapefea ona Matou “Talai Atu Keriso” i Lo Matou Aiga**
Saunia e Darren E. Schmidt
Manatu e atiina ae ai se fale e sili atu ona totonugalemu ia Keriso.
- 14 O Le Ala i Palamaira**
Saunia e Matthew S. Holland
O le ala i Palamaira—le saite o le Uluai Faaaliga ma le nofoaga mau o papatusi auro—sa le o se mea faigofie mo Iosefa Samita ma lona aiga.
- 20 Sailia o le Laveai**
Saunia e Connie Goulding
Afai e te lagona ua maileia oe—i tofotofoga o le tagata lava ia, vaivaiga, po o tulaga faigata—o loo i ai le faamoemoe o le laveai.
- 24 O Le Aso Mamalu o le Toefuataiga o le Perisitua**
Saunia e Elder L. Tom Perry
O se agaga faafetai e tatau ona tatou lagonaina ua toefuatai mai e le Alii Lana Ekalesia ma Lana perisitua i le lalolagi.

- 28 O Aoaoga a le Faaola i le Avea Ai ma Soo**
Saunia e Casey W. Olson
Ua aoaoina i tatou e nei mea e fa mai le malaga mulimuli a Keriso i Ierusalema i le auuala e avea ai ma soo e sili atu ona lelei.

- 34 Faifaiva i Tagata**
Saunia e Elder Scott D. Whiting
Mo se tasi o uarota, o se aufono lelei o loo gahuhue e faia se eseese ga tele.

MATAGALUEGA

- 8 Auaunaga i le Ekalesia: O La’u Lesona i le Alofa**
Saunia e Janice Tate
- 9 Ataata: O Le Laveaiina o le Manulele Laitiiti**
Saunia e William Hoggan
- 38 O Leo o le Au Paia o Aso e Gata Ai**
- 80 Seia Tatou Toe Feiloai: Tuu Nei Loa**
Saunia e Peresitene Boyd K. Packer

I LE FAAVAA
Luma: Ata na pueina e Leslie Nilsson. I totonu o le faavaa pito i luma: Ata na Pueina e Ridvan Çelik/iStock/Thinkstock. I totonu o le faavaa i tua: Ata na Pueina e Cody Bell.

46



42 Faalagolago i le Faamautinoaga a le Alii

Saunia e Mindy Anne Leavitt
Nai lo le faasaolotoina vave, e mafai e le Alii ona faamanuiaina i tatou i taimi taua o le faamautinoaga i totonu o o tatou tofotofoga.

46 E Le Siitia

Saunia e Lena Hsin-Yao Cho
Ina ua ou faalogo ua tofia au e tumau ai i le eria lava e tasi mo se isi ono vaiaso, sa ou le talitonu i o'u taliga.



Vaai pe mafai ona e mauaina le Liahona o loo natia i le lomiga lenei. Faaitete: O le a se mea e mafai ona e aveina e ese mai se taavale?



48

48 Ola Ai i se Lalolagi Televave

Saunia e Peresitene Dieter F. Uchtdorf
Faafaigofie lou olaga e ala i le taulai atu i nei sootaga e fa.

52 O La Tatou Avanoa

54 Faaso'a Atu le Talalelei e Pei o Ioane le Papatiso

Saunia e Ryan Carr
E faapefea ona faatusatusa lau misiona e pei o Ioane le Papatiso?

56 Ae Faapefea pe Afai . . . ?

Fesili e uiga i le Auauna Atu i se Misiona

60 Fesili ma Tali

O se tasi o a'u uo e manao e faataitai se mea leaga mo na o se taimi e tasi ina ia mafai ona ia malamalama pe a talanoa i ai tagata. E mafai faapefea ona ou fesoasoani ia te ia ia malamalama e le o se manatu lelei lena?

62 O Le Paso o le Suesueina o Tusitusiga Paia

Saunia e Cody Phillips
I paso ma le suesueina o tusitusiga paia, o le tele lava ona e galue i ai, o le tele foi lena o le mafai ona e vaai i le ata e tele atu.

65 O Uso i le Talalelei

Saunia e Paola Sarahí Hernández Cruz
Sa tuuatoatasi le uo a Paola, o lea na manao ai Paola e faaso'a atu faamanuiaga o le talalelei ia te ia.



72

66 Molimau Faapitoa: E mafai faapefea ona taialaina au e le Agaga Paia?

Saunia e Elder L. Tom Perry

67 Musika: O Le Agaga Paia

Saunia e Jeanne P. Lawler

68 Taimi o Tusitusiga Paia: O Le Leoleo Mamoe Lelei

Saunia e Erin Sanderson

70 O La Tatou Itulau

71 Ata o Mau o le Feagaiga Fou: O Le Leoleo Mamoe Lelei

72 O Le Uluai Aso o Tama o le Lumanai a Steven

Saunia e Kellie George Purcill
Na maua e le tina o Steven se auala e fesoasoani ai ia te ia ia le faanoanoa i le Aso o Tama.

74 O Le Molimau a Mia

Saunia e Amelia Hawkins
Sa manao Mia i se molimau, ae pe faapefea ona mafai ona ia maua?

76 Mo Tamaiti Laiti: O Le Fale na Fausia i le Sefuluai

Saunia e Janele Williams

O Le Lomiga Faamaonia Faa-Samoa a le Ekalesia
a lesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson,
Dallin H. Oaks, M. Russell Ballard, Richard G. Scott,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Mervyn B. Arnold, Christoffel Golden,
Larry R. Lawrence, James B. Martino, Joseph W. Sitati

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Lisa Carolina López

Au Tusitusi ma Faatonutonu: Brittany Beattie,
David Dickson, David A. Edwards, Matthew D. Flitton,
Lori Fuller, Garrett H. Garff, LaRene Porter Gaunt, Mindy
Anne Leavitt, Michael R. Morris, Sally Johnson Odekirk,
Joshua J. Perkey, Jan Pinborough, Richard M. Romney,
Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrews,
Mandie M. Bentley, C. Kimball Bott, Tom Child, Nate
Gines, Colleen Hincley, Eric P. Johnsen, Susan Loggren,
Scott M. Mooy, Mark W. Robison, Brad Teare, K. Nicole
Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Julie Burdett,
Katie Duncan, Bryan W. Gygi, Denise Kirby, Ginny J.
Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le
Falelusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

Auina atu tusitusiga ma faafesili i luga o le

initoneti i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le
"tapasa" po o se "faatonuala") e lomina i le faa-Alepania,
Aminia (Sasae), Pisilama, Palekeria, Kemupotia, Sepuano,
Saina, Kalaotia, Siekisolovakia, Tenimaka, Take, Iglisi,
Esitonina, Fiti, Finelani, Farani, Siamani, Eleni, Hanikeri,
Initu, Iselani, Initonesia, Italia, Iapani, Kiripati, Korea,
Lativia, Lituania, Malakasa, Masela, Monokolia, Nouei,
Polani, Potukale, Romania, Rusia, Samoa, Saina
(ua faafaigofeina), Silovenia, Sipasiolo, Suetena,
Svahili Tagaloka, Tahiti, Tai, Toga, lukureini, Urutu,
ma Viatename. (E eseesee lava gagana.)

© 2015 Puletaofia e le Intellectual Reserve, Inc. Ua taofia
aia tatau uma. Lomia i le lunaita Setete o Amerika.

E mafai ona kopi tala ma ata o le *Liahona* mo le toe
faaogaina i lotu po o le aiga ae ia le faia ai ni pisinisi. E
le tatau ona kopi ni tala po o ni ata pe afai o faasa mai i
le laina o loo t'ua ai le e ona lea faatufugaga. Auina atu
fesili e uiga i le puletaofia i le Intellectual Property Office,
50 East North Temple Street, Salt Lake City, UT 84150,
USA; i-meli: cor-intellectualproperty@ldschurch.org.

For Readers in the United States and Canada:

June 2015 Vol. 39 No. 6. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address
label from a recent issue; old and new address *must* be
included. Send USA and Canadian subscriptions to Salt
Lake Distribution Center at address below. Subscription
help line: 1-800-537-5971. Credit card orders (Visa,
MasterCard, American Express) may be taken by phone.
(Canada Poste Information: Publication Agreement
#40017431)

POSTMASTER: Send all UAA to CFS (see DMM 707.4.12.5).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu Mo Afiafi Faaleaiga

*O leni lomiga o loo aofia ai tusiga ma gaoioiga e mafai ona faaoga mo afiafi faaleaiga.
O manatu nei e lua.*



"O Le Aso Mamalu o le Toefuataiga o le Perisitua," itulau e 24: Mafaufau e faa-matala atu pe na faapefea ona tuufaasolo mai le perisitua e ala i le tusiaina o se laina se tasi mai le tasi tagata i le isi, e amata mai ia Atamu, ma faaauu ai pea i isi perofeta o le Feagaiga Tuai ona sosoo lea mai ia lesu Keriso ma Ana Aposetolo ia Iosefa Samita. E mafai ona outou taumafai e tauloto upu a loane le Papatiso na fai atu a o tuuina atu le Perisitua Arona i luga o Iosefa Samita ma Oliva Kaotui, e pei ona tusia i le Mataupu Faavae ma Feagaiga 13:1, ma talanoaina le taua o lena mea.

"O le Molimau a Mia," itulau e 74: a uma ona faitau faatasi le tusiga, e mafai ona outou talanoaina le "faapefea" ona mauaina se molimau: tatalo, faitauina o tusitusiga paia, o le faalogo i perofeta ma aposetolo, faalogologo i molimau a isi, tuuina atu la oe lava molimau, ma isi mea faapena. Talanoa e uiga i le auala e mafai ona pei ai molimau o se malamalama. Ona mafai lea e matua ona fai atu a latou moli-mau ma valaaulia a latou fanau e faasoa atu foi molimau po o o latou lagona pe afai e mananao ai.

I LAU GAGANA

O loo maua le *Liahona* ma isi mea e faaoga a le Ekalesia i le tele o gagana i le **lan-guages.lds.org**.

AUTU I LENEI LOMIGA

E ta'u mai e numera le itulau muamua o le tusiga.

Afio Mai Faalua, 54
Agaga Paia, 62, 66, 67, 74
Aiga, 4, 10, 48, 72
Alofa, 8, 40
Aoao atu, 10
Auauna atu, 8, 24, 34,
41, 48
Auaunaga, 9, 28, 34
Aufono a Uarota, 34
Avea ma Soo, 28
Faamagaloga, 80
Faamoemoe, 42
Faatoaogaina Mai, 9
Galuega, 39, 52

Galuega faafaifeautalai,
54, 65
Galuega faalemalumalu,
4, 6, 70
Iesu Keriso, 7, 10, 20, 28,
42, 48, 54, 66
Laveai, 9, 20
Mama, 7
Manatu Faapito, 28
Misiona, 40, 42, 46, 54, 56
Molimau, 56, 74
Musika, 8, 53, 67
Onosai, 38
Papatisoga, 65, 70

Perisitua, 4, 24
Salamo, 56
Samita, Iosefa, 14
Sefuluai, 76
Taitaiga, 34, 46, 80
Talafaasolopito o aiga, 4
Tama, 72
Tama Faalelagi, 48
Tatalo, 10, 74
Toefuataiga, 14, 24
Tofotofoga, 20, 42, 52
Togiola, 20, 42
Tusi a Mamona, 10
Tusitusiga Paia, 62, 68, 71



Saunia e
Peresitene
Henry B. Eyring

Fesoasoani Muamua
i le Au Peresitene Sili

Faavavau Aiga

E MAFAI NA

O le mana o le perisitua e fusia ai aiga faavavau o se tasi o meaalofa silisili a le Atua. O tagata uma e malamalama i le ata o le faaolataga e moomoo mo lena faamanuiaga tumau. Na o sauniga o faamauga e faatinoina i malumalu faapaiaina o Le Ekalesia a Iesu Keriso o le Au Paia o Aso e Gata Ai ua ofoina mai i ai e le Atua le folafolaga o aiga e mafai ona fusia faatasi faavavau.

Na toefuatai mai ki o le perisitua e mafai ai lenei mea i le lalolagi e le perofeta o Elia ia Iosefa Samita i le Malumalu o Katelani. I na ki o le perisitua ua tuufaasolo mai i se laina e le'i motusia e ala i perofeta soifua i Le Ekalesia a Iesu Keriso o le Au Paia o Aso e Gata Ai e oo mai i le taimi nei.

O le Faaola i Lana misiona faaletino na fetalai i le mana e faamau ai aiga i nei upu ia Peteru, o Lana Aposetolo taitai, ina ua Ia fetalai, “Ou te avatu foi ki o le malo o le lagi; o se mea foi e te fusifusia i le lalolagi, e fusifusia foi lea i le lagi; o se mea foi e te tala i le lalolagi, e tatalaina foi lea i le lagi.” (Mataio 16:19).

E na o le malo selesitila e mafai ona tatou nonofo ai i ni aiga faavavau. O iina e mafai ona tatou i ai o ni aiga i le afioaga o lo tatou Tama Faalelagi ma le Faaola. Sa faamatalaina e le Perofeta o Iosefa Samita lena aafiaga matagofie i lenei ala i le Mataupu Faavae ma Feagaiga:

“A afio mai le Faaola o le a tatou vaai ia te ia e pei ona i ai o ia. O le a tatou vaai o ia o se tagata e pei o i tatou lava.

“Ma o lea lava mafutaga ua i ai ia te i tatou iinei o le a i ai ia te i tatou iina, ae o le a nao na faatasia ma le mamalu e faavavau, o se mamalu e lē o ia i tatou i le taimi nei” (MF&F 130:1–2).


Na fautua mai lenei mau e faapea e mafai ona tatou taulai atu ma le mautinoa mo se tulaga faatonuina faalelagi i a tatou mafutaga i totonu o o tatou aiga. E mafai ona lava lo tatou popole i tagata o tatou aiga, ola ma e ua maliliu, e faia mea uma tatou te mafaia e ofoina atu ia te i latou sauniga o le perisitua o le a noatia ai i tatou i le lagi.

O le toatele o outou, talavou ma matutua, o loo faia lena mea. Ua outou sue igoa o tuua o e na lei mauaina sauniga e mafai ai ona faamauina faatasi outou.

Toetoe lava o outou uma e i ai aiga o loo feola e lei faamauina i aiga i le mana o le perisitua. O le toatele e i ai aiga o loo feola ua maua sauniga o le perisitua, ae e leo tausia feagaiga na latou osia ma le Atua. O le Atua o le a faamanuiaina oe ina ia mafai ona e fesoasoani e aapa atu ia i latou uma na o aiga i le faatuatua. Ua i ai ia te oe se folafolaga ua faia e le Alii i Ona soo o e o atu e aumai isi ia te Ia:

“Ma ai se tasi na te talia outou, o iina o le a Ou i ai foi, ona o le a Ou alu muamua atu i o outou luma. O le a ou i ai i lo outou lima taumatau ma lo outou agavale, ma o le a i ai lo'u Agaga i o outou loto, ma si'o faataamilo outou e a'u agelu, e sapaapapai outou i luga.” (MF&F 84:88).

Mai lo'u faamalama i le ofisa ou te vaai ai i tamaitai ma alii faaiipoipo i aso uma o tapue a latou ata i fugalaaui ma vaipuna matagofie. O le tama faaiipoipo e masani lava ona siiina i luga lana manamea i ona lima, pe mo na o ni nai laa tautevateva itiiti, a o pueina e le pueata ni ata o le faaiipoipoga. O taimi uma lava ou te vaaia ai lena mea, ou te mafaufau i ulugalii ua ou iloa e i ai taimi—o nisi taimi



i se taimi puupuu lava faatoa uma la latou aso o le faaiipoipoga—ua siiina e le tasi le isi i isi auala ina ua amata ona faigata le olaga. E mafai ona leai ni galuega. E mafai ona fananau mai fanau ma le tele o luitau. E mafai ona oo mai ma'i. Ma o lea la, o mausa o le faia i isi e pei ona tatou manao e

fai mai ia te i tatou—a o sili atu ona faigofie—o le a avea i tatou ma toa ma toa tamaitai i na taimi faigata pe a manaomia le malosi sili atu nai lo le mea tatou te mafaufau tatou te mafaia.

Tatou te nonofo aitalafu i o tatou aiga i le ituaiga sootaga e mafai ona tatou avatu i le afioaga o le Atua.

E tatau ona tatou taumafai e aua le faaita atu pe talia foi le ita. E mafai ona tatou filifili e vave faamagalo atu ma le atoatoa. E mafai ona tatou taumafai e saili le fiafia o isi nai lo tatou lava. E mafai ona tatou agalelei i a tatou upu e tautala ai. Ao tatou taumafai e faia nei mea uma, o le a tatou valaaulia le Agaga Paia i o tatou aiga ma o tatou olaga.

O lau faamautinoaga ia te oe e faapea, faatasi ai ma le fesoasoani a le Alii ma loto salamo, o le a mafai ona tatou maua se vaaiga i lenei olaga o le ituaiga olaga tatou te mananao i ai i le faavavau. E alofa le Tama Faalelagi ia te i tatou. E finagalo o ia ia tatou toe foi atu ia te Ia. O le Faaola, e ala i le mana o Lana Togiola, e mafaia ai suiga i o tatou loto e tatau ona tatou faia ina ia mafai ona ulu atu i totonu o malumalu paia, osia feagaiga e mafai ona tatou tausia loa, ma i se taimi o le a ola i ni aiga faavavau i le mamalu selesitila—toe i ai i le aiga. ■

AOAO ATU MAI LENEI SAVALI

Ao e faasoa atu le aoaoga faavae o le aiga e faavavau, mafaufau i mea na saunoa mai ai Elder Richard G. Scott o le Korama a Aposetolo e Toasefululua: “Ia saili e le aunoa e faamalolosa aiga. Aoa o atu ma se vaaiga mamao i le taua o le faamauina o aiga i le malumalu. . . . A e mauaina le vaaiga mamao o sauniga faamau o le malumalu, o le a e fesoasoani e fausia le malo o le Atua i le lalolagi.” (“Ua Ou Avatu le Faaoao ia te Outou,” *Liahona*, 2014 Me, 34).

E mafai faapefea ona e fesoasoani ia i latou e te aoaoina e atiina ae se vaaiga mamao i le taua o le faamauina i le malumalu? Valaaulia i latou o e e lē'i faamauina e talanoaina ni laasaga e mafai ona latou faia e agai atu ai i lena sauniga. Valaaulia i latou o e ua uma ona faamauina e talanoaina auala e mafai ai ona latou faatumauiina le vaaiga mamao o lo latou aiga e faavavau ma galulue e faaleleia atili la latou sootaga ma le tasi i le isi.

Faavavau ona Fesootai i Lo'u Aiga

Saunia e Laura Burton

I na ua vaetamaina au i le tolu o ou tausaga, na faatagaina e lo'u tina moni e faaaloaia ou matua fou pe afai e ioe mai i laua ia faia ou sauniga pe a atoa lou 12 tausaga. Sa ia mafau-fau sa tatau ona lava lou matua e fai ai le filifiliga mo au lava ia, ae sa sili ona faigata le faatalitali.

Ioe, sa faigata ona vaaia le toatele o a'u uo o papatiso ina ua atoa le valu tausaga, ae o le mea sa sili atu ona faigata o le iloaina sa le mafai ona faamauina au i o'u matua fai ma ou tei matutua e toa lima seia atoa le 12 o o'u tausaga. Sa ou fefe nei tupu se mea ia te au ma o le a le mafai ona ou faamau atu ia i latou.

A o latalata mai lo'u aso fanau lona 12, sa amata ona matou fuafuaina lo'u papatisoga ma le faamauina i lo'u aiga. Sa tuu mai e ou matua ia te au e filifili po o le fea malumalu o le a faamauina ai i matou. Sa ou manatu lava o le Malumalu o San Diego Kalefonia e sili ona matagofie, o lea na ioe ai lo'u aiga atoa e tietie atu i Kalefonia mo le faamauga.

Sa le mafai ona ou faatali e avea ma se aiga e faavavau faatasi ma o'u matua ma nai ou tei. I le taimi o lou faamauga, sa ou lagonaina le Agaga malosi, e faigata ona faamatalaina i upu. O lea ua iu lava ina faamauina au i lo'u aiga, ua suia ou lagona o le popole i le mafanafana ma le toafilemu, i le iloaina ua faavavau nei lou fesootai atu ia i latou.

E alala le tusitala i Iuta, ISA.



TAMAITI



Vaai i le Malumalu

Na faamalamalama mai e Peresitene Eyring ona o le perisitua, ua tatou maua ai le avanoa e o ai i le malumalu ina ia faamauina faatasi ma lo tatou aiga mo le faavavau. Tusi pe sue mai se ata o le malumalu e te fiafia i ai ma tuu i se nofoaga e te vaai i ai i aso uma. Fai se lisi o au ala o le a e saunia ai e alu i le malumalu i se aso.

Ia suesue ma le agaga tatalo lenei savali ma saili ia iloa mea e faasoa atu. O le a mafai faapefea e le malamalama i uiga paia o le Faaola ona faateleina lou faatuatua ia te Ia ma faamanuiaina ai i latou o loo e tausia e ala i le faiaoga asiati? Mo nisi faamatalaga, alu i le reliefsociety.lds.org.

O Uiga Paia o Iesu Keriso: E Mama

O se vaega leni o se faasologa o Savali a Faiaoga Asiati e faaauutu i uiga paia o le Faaola.

“Ia tuu le amiomamā e teuteuina ai lou mafaufauga e lē aunoa; ona solo malosi ai lea o lou lototele i luma o le Atua; ma o le a to ifo i luga o lou agaga le mataupu faavae o le perisitua e pei o le sau mai le lagi” (MF&F 121:45).

O le a le mama? Na saunoa Peresitene James E. Faust (1920–2007) faapea: “O le uiga faaleatua lava ia i lona atoaga, e aofia ai itu uma o le amiotonu lea e fesoasoani e fau ai a tatou amio.”¹ Na faaopoopo mai Peresitene Gordon B. Hinckley (1910–2008): “O le alofa i le Atua o le pogai lea o mea mama uma, agalelei uma, malosi uma faaletagata.”²

O le sootaga i le va o tamaitai ma le mama, na saunoa i ai Elder D. Todd Christofferson o le Korama a Apisetolo e Toasefululua: “E aumaia e tamaitai faatasi ma i latou i le lalolagi se uiga auaumama faapitoa, se meaalofa faalelagi lea latou te atamamai ai i le faaosofia o na uiga e pei o le faatuatua, lototele, malamalama i lagona o isi, ma faaleleiga atili o mafutaga ma aganuu. . . .

“Tuafafine, i au fegalegaleaiga uma lava, o lou sootaga ma le Atua, lou

Mafaufau i le Mea Lenei

E faapefea e le mama ona faamainaina ma faamalolosia i tatou?



Tama Faalelagi, o le o le punavai o lou malosiaga amiotonu, e tataua ona e faamuamua i taimi uma o lou olaga. Ia manatua o le mana o Iesu na oo mai e ala i le tuuto atu o Lona loto i le finagalo o le Tama. . . . Ia taumafai ia avea ma le ituaiga soo faapena o le Tama ma le Alo, ma o le a le mafai ai lava ona galo au faatosinaga.”³

Mau Faaopoopo

Salamo 24:3–5; Filipi 4:8; 2 Peteru 1:3–5; Alema 31:5; Mataupu Faavae ma Feagaiga 38:23–24

FAAMATALAGA

1. James E. Faust, “O Le Uiga Faaleatua o Afafine Amiotonu o le Atua,” *Liahona*, Me 2003, 108.
2. Gordon B. Hinckley, “Excerpts from Recent Addresses of President Gordon B. Hinckley,” *Ensign*, Apr. 1996, 73.
3. D. Todd Christofferson, “O Le Malosiaga Amiotonu o Tamaitai,” *Liahona*, Nov. 2013, 29, 31.
4. Ua i ai i le mama le mana (tagai Mareko 5:30).
5. I le Taiala i Tusitusiga Paia, o le uiga o le “Perisitua” o “le pule ma le mana ua tuuina mai e le Atua i tagata e galulue i mea uma lava mo le faaolataga o tagata” (MF&F 50:26–27).

Faatuatua, Aiga, Toomaga



Mai Tusitusiga Paia

I leni vaitaimi, o tamaitai uiga mama, ua tumu i le faatuatua, o loo aapa atu i le Faaola. I le Luka e 8 ua tatou faitau ai i le fafine sa ia te ia le punatoto mo le 12 tausaga na le mafai ona faamaloloina. Sa ia sailia le faamalologa ina ua ia “alu ane i tua [o Keriso], ma pai ane i le tuupao o lona ofu: ona utu loa lea o lona puna toto. . . . Ua fetalai atu Iesu, Na pa’i mai lava se tasi ia te a’u: aua ua ou iloa ua alu atu le mana⁴ nai ia te a’u.” Ua faapau atu leni fafine faatuatua i Ona luma, ma faamatala mai “ia te ia i luma o le nuu uma le mea na pai atu o ia ia te ia” ma “faamaloloina loa. Ona fetalai atu lea o ia ia te ia, Lo’u afafine, ina faalototeleina ia oe: ua e ola i lou faatuatua; ina alu ia oe ma le manuia” (tagai Luka 8:43–48; tagai foi 6:17–19).

E ala atu i Lona mama,⁵ ua mafai ai e Keriso ona faamaloloina, faagavaaina, faamalolosia, faamafanafana, ma faafiafiaina pe a tatou filifili ma le lototele ma le faatuatua e aapa atu ia te ia.

O LA'U LESONA I LE ALOFA

Saunia e Janice Tate

Ou te lei faamoemoeina le galuega fesoasoani faatauavaa e aoao mai ai ia te au ni mea se tele e uiga i le alofa o le Tama Faalelagi mo Ana fanau.



Na foliga mai o se galuega masani o le auauna atu: e ao mai se vaega o uso o le Aualofa e faatulaga se polokalama o se aupaese laitiiti i se nofoaga autu e tausia ai gasegase i se falemai i le lotoifale, e ui lava e leai se tasi mai le matou uarota o i ai.

Sa matou faaofiofi i totonu o se potu laitiiti faatasi ma le toaiva o gasegase matutua o faasasaga mai ia te i matou o latou nofoa faataavalevale. Sa foliga gaogao mai o latou fofoga, e leai ni lagona faaalua. Sa vevela ma leai se ea, ma sa ou mafaufau, “Sei o tatou faavave uma lenei mea.”

Sa ou taitaia le musika, o lea sa ou fuli atu ai lo’u tua i gasegase ma

sa taulai i le polokalama. A o matou amataina, sa ou faalogo i se tasi ma’i o valaau, “Mama, Mama,” a o le isi ua patipati ma pisa. Sa ou lagona le le mautonu, ae i ni nai minute o le a matou faauma ai ma o i le fale.

A o matou sauni e usu le pese faaiu, “Ua Sili Oe” (*Viiga*, nu. 46), sa matou valaaulia gasegase ma fomai e pepese faatasi ma i matou. Sa ou faliu e taitai tagata uma i le pese, ma o le taimi lena sa ou vaai ai ia te ia—se tamaitai laitiiti, maanuminumi, lauulusinasina ma luga o le vae ua tumu i pepa solo ua susū i ona loimata.

Sa ia gego mai ia te au e sau ia te ia. Sa ou faia, ma ina ua ou punou lou ulu ma faalogo, sa ia uuina lo’u lima. Sa tetete lona tino atoa a o ia musumusumu mai, “O au o se Au Paia o Aso e Gata Ai. E ese le manaia o le o mai o ou uso.”

Sa faatumulia lo’u loto i le Agaga, ma sa ou tootuli i talaane o ia, ma loimata ua tafe mai i o’u mata. Sa ia tuu se lima ua vaivai faataamilo ia te au ma pōpō ia te au e pei o loo ia malamalama i o’u lagona. Sa amata e tagata uma ona usu le viiga, ae sa le mafai ona ou usuina le fuaiupu muamua.

A o usuina e gasegase ma le aufaigaluega le tulaga maoae o le Atua, sa faatumulia le potu i le Agaga, ma na pai atu i tagata uma. Na iu ina ou pulea o’u lagona ma auai faatasi ma isi, i le usuina:

*A afio mai Iesu, i le mamalu,
Ma ave au, ai sou fiafia!
Ou te ifo ai
Ma tautino atu, “Lo’u Atua e,
ua sili lava oe!”*

Ina ua maea le polokalama sa fefiloi tuafafine o le Aualofa ma le aufaigaluega ma gasegase. Sa fai mai le tuafafine lauulusinasina sa ia lagonaina le tuatoatasi ma sa siomia e ni tagata ese seia oo ina matou o mai. Matou te lei iloa o le a i ai o ia iina, ae sa silafia e le Tama Faalelagi.

Sa toe faamanatu mai ia te au o nei tagata uma o o tatou tuagane ma uso, latou te manaomia le alofa ma le mafanafana, ma e i ai se aso o le a mafai ona ou i ai i lo latou tulaga. Sa ootia au ona e mafai ona avea i tatou ma meafaigaluega a se Tama alofa, ma sa ou faafetai o le matou galuega auauna atu na aoaoina mai ia te au se lesona mamana e uiga i le alofa. ■

E alala le tusitala i Kalefonia, ISA.



ALOFA I LONA FAATINOGA

“O loo i ai se tulaga manaomia tele o le alofa lea e gauai atu ai ia i latou e le manaia, o le faamoemoe ia i latou ua lotovaivai, fesoasoani ia i latou ua puapugatia. O le alofa moni lava o le alofa faatino. Ua i ai i soo se mea le manaomia o le alofa.”

Peresitene Thomas S. Monson, “E Le Uma le Alofa,” *Liahona*, Nov. 2010, 122.

O LE LAVEAIINA O LE MANULELE LAITIITI

Saunia e William Hoggan

I le laveaiina o se manulele laitiiti, sa matou aoooina ai le auala e fesoasoani ai i e vaivai faaleagaga.

I le toluapiga a Tamaitai Talavou i mauga o Kalefonia, sa faatalitali ai teine ma taitai mo le meaai o le afiafi i se fale e foliga i se A. A o matou faatalitali, sa vaaia e nisi o teineiti se mea i lalo o se laulau. O se manulele laitiiti atonu na lele mai i totonu o le fale, ma ua le iloa lona ala i fafo, ma iu lava ina palasi i lalo i le fola. Sa latou fesili mai ia te au e fesoasoani.

Sa foliga mai o le manulele ua lata ona mate, o lona gutu sa affiina e faamoega o aupogaleveleve ma ona fulu ua taufelegele solo. Sa ou tuuina o ia ma le faaeteete i totonu o se ipu ma aveina atu i fafo. Sa ou faamoemoe o le a toe maua mai e ia lona lava malosi ae o le mea moni lava sa faamoemoeina o ia o le a iu lava ina toe foi atu i le ala o le natura uma. Ae peitai, a o ou faasipa atu le ipu ina ia tuu lemu le manulele laitiiti i luga o le eleeele, a o see atu i le afa o le ipu, na mau le uu a le manulele laitiiti i le augutu o le ipu i ona maiuu laitiiti. Na ou uuina i luga le ipu, na nofonofo le manulele i le augutu o le ipu, ma moeiini ona mata. O le a nei la?

O se tasi o taitai, i le vaaia o le manulele, na faasukaina se vai ma aumai ia te au. Muamua, sa ou aveesea faamoega o aupogaleveleve mai le gutu maai pei se nila. E lei minoi le manulele. Ona ou lolō lea o se tamatamailima i le vai faasuka ma tuu atu se mataua i le siui o le gutu umi. Na mou le mataua, e ui lava e lei minoi le manulele. Atonu na see atu le vai

i totonu o le gutu umi? Sa ou toe lolō lou tamatamailima ma tuu atu i le gutu umi o le manulele. O le taimi lea o se laulaufaiva laitiiti, e manifinifi atu i lo se lauulu, na etoina le tumutumu o lou tamatamailima.

Mo le 10 i le 15 minute, na inuina ai e le manulele laitiiti le mataua e tasi i le taimi. O le taimi lea, sa faapopototo mai ai ni nai isi taitai ma siomia au, ma sa ou ofoina atu ia te i latou e taumafai i le fafagaina.

Na faafuasei lava ona pupula mata o le manulele, ma o ona fulu na felavesai solo na vave lava ona tulaga lelei. Ina ua uma ona inu ni nai isi mataua se lua, sa amata ona apata ona apaau, ma faataitai mo sina taimi, ma lele sao loa i luga. Sa ia faatalitali mo sina minute i luga a'e o i matou, ona mou ese atu lea.

Sa matou tutu ai iina, ua faateia. Ona, e pei lava ona faafuasei le lele ese atu o le manulele, na oo mai ai ni lesona faaleagaga:

- E masani lava, a o tatou aapa atu i e e leo toe toaaga mai, o a tatou taumafaiga e foliga mai e leo faia se eseese. Ae o le alofa tatou te ofoina atu e see atu i le mavaevae—e pei o le suavai i le gutu umi e leo minoi o le manulele laitiiti—ma tuuina atu

meaai faaleagaga ia e i ai se aso e mafai ai ona fua mai ni taunuuga.

- E i ai taimi tatou te le mafai ai ona agai pea i luma i tatou lava; tatou te manaomia se lima fesoasoani alofa, ma agalelei.
- O nisi taimi o le tagata e lave-lavea i le faamoega o aupogaleveleve o agasala po o le fai ma vaisu ma e manaomia le fesoasoani a se uo po o se taitai perisitua ma le fesoasoani a le Faaola ina ia saoloto.
- Tatou te manaomia meaai faaleagaga masani ina ia mafai ona tatou tumau, a leo lena tatou te le maua le malosi

faaleagaga ma pauu atu i uunaiga leaga.

- Na tumau ai pea le tautau o le manulele laitiiti. E moni lava. O le tautau ai pea i luga o le ipu na faia ai se eseese uma. E i ai taimi, e tatau ona faigofie lava ona tumau i le faatuatua a o tatou feagai ma luitau tiga ma o nisi taimi e sili ona ogaoga o le olaga.



Fai mai le Feagaiga Fou o le Matai e silafia e oo lava i le pau o le manuiti (tagai i le Mataio 10:29–31). Ua ou iloa nei o loo Ia silafia foi le pau o le manulele laitiiti. Ma o loo silafia e Ia outou. ■

E alala le tusitala i Kalefonia, ISA.



E Faapefea ona Matou
“**Talai
Atu Keriso**”
i lo Matou Aiga



*“Ma ua matou tautalatala e uiga ia Keriso, ua matou olioli ia Keriso, ua matou talai atu Keriso, ua matou vavalo e uiga ia Keriso, ma ua matou tusitusi foi e tusa ma a matou valo-aga, ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasala.”
(2 Nifae 25:26).*

Saunia e Darren E. Schmidt

I le taimi o le Eseta i se tasi tausaga, sa fautua mai ai lo’u toalua faapea matou te faitau faatasi o se aiga i le tala i tusitusiga paia o le vaiaso mulimuli o le Faaola i le olaga nei. I po taitasi i le taimi e momoe ai, matou te faitau i le Feagaiga Fou ma faaali atu i le ma fanau se vitio puupuu o mea taitasi ma talanoaina fesili e tulai mai. Sa ou maofa i fesili na fai mai e le ma fanau e faapea foi ma le Agaga na faatumuina ai lo matou aiga i le taimi o la matou faitauga ma talanoaga.

I le faaiuga o le vaiaso, sa ou lagonaina se agaga faafetai sili atu ona loloto ma le alofa i le Faaola, i le manatunatu loloto i Lana taulaga ma taunuuga e faavavau lea e mafua mai ona o mea uma na Ia oo i ai mo i tatou. Faatasi ai ma o’u lava lagona ootia, sa ou iloaina sa musuia lo’u toalua, ma sa ou vaaia se malamalama loloto atu ma le alofa mo le Faaola i la ma fanau faapea foi ma se faanaunaga maoae e faaalua ai uiga faa-Keriso i le tasi i le isi.

Talu mai lena taimi ua matou sailiili i isi auala e mafai ai ona matou “tautalatala ia Keriso” ma “talai atu Keriso” ia faateleina matou talanoaga ma lesona, ma le iloaina faapea e ala i le fausiaina i luga o se faavae o Iesu Keriso, ua folafola mai ia i matou le malosi maoae e tetee atu ai i afa o le olaga (tagai i le Helamana 5:12).



O se Faaitaiga o le Aoao Atu e uiga i le Tatalo

Mo se faaitaiga, faapea la o loo e aoaoina atu le taua o le tatalo. E mafai ona e faaaogaina Mataupu Faavae ma Feaiga 10:5, lea ua faatonuina i tatou e “tatalo e le aunoa” po o le fautuaga a Nifae “e lē aoaoina e le agaga leaga se tagata ia tatalo, ae na te aoao atu ia te ia e lē tatau ona tatalo o ia.” (2 Nifae 32:8). Ua aoao malosi mai e nei mau le aoaoga faavae o le tatalo. A o outou talanoaina nei mau, sei o tatou faapea ua e fesili atu se fesili e pei o lea “Na faapefea

Ia Avea le Faaola o le Taulaiga o Lou Aoao Atu

O se tasi o mea ua matou iloina, afai matou te aumaia le faaitaiga ma aoaoga a le Faaola i a matou talanoaga ma fegalegaleaiga faaleaiga, ua avea ma ni aoaoga e sili atu ona mamana ma aoga. Ina ia faaoga se tala faatusa mai le Faaola lava Ia, sa Ia aoao atu, “O au o le vine, o la outou: O le tumau ia te a’u, ma au ia te ia, o ia lava lea e fua tele mai” (Ioane 15:5). Pe afai tatou te faaogaina lea talafaatusa i la tatou aoao atu, ua tatou aoao atu mataupu faavae o le talalelei ae le o ni manatu e le fesootai, ae o ni faaopoopoga o le Togiola a Iesu Keriso, e pei ona folafola mai e le perofeta o Iosefa Samita.¹ O le auala lenei tatou te avea ai le Faaola o le taulaiga o la tatou aoaoga ae le na o ni laulau ua tatou tauina mai i Lona vine moni.

Afai tatou te avea o Ia ma totonugalemu o a tatou aoaoga, ua folafola mai ia i tatou le fafagaina, malosi, ma le tuputupu ae, e aofia ai lala e fua tele mai—i se isi faaupuga, o a tatou talanoaga ma lesona o le a maua le mana sili atu o le faaliliuina ma taunuuga mo se taimi umi. O se tasi o auala ua matou maua e faia ai lenei mea o le aoao atu o se mataupu faavae o le talalelei ona fai atu lea i la ma fanau se fesili e pei o le “Na faapefea ona faaalua e Iesu lenei mataupu faavae po o le aoaoga?” po o le “O le a le mea na fetalai ai pe na aoao atu e le Alii e uiga i lenei lava mea?”

Ona tatalo le Faaola?” po o le “Na faapei tatalo a le Faaola?” Afai e i ai ni au tamaiti e laiti ifo, atonu e te fesili, “O le a sou *manatu* pe na faapei tatalo a le Faaola?”

Faalu sina taimi e mafaufau ai pe mafai faapefea ona e tali oe lava i lenei fesili i le faaaogaina o tala i tusitusiga paia e oo mai i lou mafaufau. Ou te manatu vave lava i le asiasiga a le Faaola i Amerika, ina ua “tatalo atu o ia i le Tamā, ma o mea sa ia tatalo atu ai ua le mafai ona tusia. . . . E lei vaaia lava e le mata, pe na faalogoina foi muamua e le taliga, le tetele ma le ofoofogia naua o mea e pei ona matou vaai ma faalogo o fetalai e Iesu i le Tamā.” (3 Nifae 17:15–16).

Mulimuli ane i le tala tatou te iloa ai na taumafai tagata e mamana a latou tatalo i Lana tatalo ma o se taunuuga “sa latou le faateleina ni upu se tele, ona sa *tuuina atu ia te i latou* mea e tatau ona latou tatalo ai, ma sa tumu i latou *i le manao*” (3 Nifae 19:24; faaopoopo le faamamafa). I le taimi lea, e mafai ona e valaaulia lau fanau e faasoa atu se taimi pe a faatumulia i latou i se manao e tatalo, pe e mafai ona e faasoa atu se taimi na tuuina mai ai le upu lava e fai a o tatalo. Ona mafai lea ona e molimau atu lea i le ala e ese ai se tatalo pe a tuuina atu i le auala lenei, e pei ona aoao mai e le Faaola.

Mafaufau i le eseese e mafai ona i ai i lau fanau pe afai latou te galulue i le mataupu faavae o le tatalo o loo maua i nei fuaiupu ma molimau ua tuuina mai e oe ma i latou.

Mafaufau pe faapefea e lenei mea ona faaleleia ai lo latou gafatia e lagona ma iloa ai le Agaga, faalauteleina o latou valaaua, tuuina atu faamanuiaga o le perisitua, ma mulimuli ane tausia so latou lava aiga, ma taitaiina e le Agaga lava lea e tasi e “aoaoina le tagata ia tatalo” (2 Nifae 32:8 ua).

Afai o le faataitaiga a le Faaola po o aoaoga na le tuuina i lenei aoaoga, semanu tatou te mafai pea ona fai se talanoaga lelei i le tatalo, ae o le aofia ai o Ana faataitaiga ma aoaoga e faaopoopo mai ai le loloto ma le mana sili atu.

Ata e Taulai Atu i le Talalelei

O le isi mea tatou te saili e faia ina ia faatuina se fale e sili atu ona totonugalemu ia Keriso, o le i ai o ni ata o Keriso, o le malumalu, ma isi mea e faatatau i le talalelei lea e mafai ona iloagofie ma e mafai ai ona iloa e a tatou fanau le mea moni lava e taua ia i tatou.

I ni nai tausaga ua mavae, a o saofafai ma le maua fanau i le faatalanoaga faaii o le sefuluui, na valaaulia ai e lo matou epikopo lo ma atalii e 10 tausaga le matua e ave se tamai ata o le Faaola ma filifili po o fea o lo matou fale e tuu ai, po o fea o le a avea ai ma se faamanatu faifai pea o le tautinoga a lo matou aiga e mulimuli ia te Ia. Ina ua matou toe foi i le fale, sa ia tuu le ata i luga o le faitotoa i luma, lea, sa fai mai lo ma atalii, “o i tatou taitoatasi o le a vaai i ai i taimi uma.” O lenei mea sa avea o se faamanuiaga maoae ma se faamanatu faifai pea ia i matou uma i aso uma i se auala laitiiti ae mamana o a matou folafolaga e mulimuli ia Iesu Keriso.

Tusa lava po o fea ua tuu ai ata i lou fale, e tauia le taumafaiga e vaai i ata i luga o le puipui ma savali o loo e auina atu i lau fanau. Pe o faaalua e ata o loo i lou aiga le savali ua outou tautino atu e mulimuli ia Keriso?

O Isi Auala e Aoa Atu ai Keriso

Ou te tautino atu sa ou ata e sili atu ma le tasi le taimi ina ua fesili mai se tasi o la'u fanau pe sa sili atu le malosi o Iesu nai lo se toa e sili le malosi i ata katuni a tamaiti, ae ua ou iloa ai o le fesili a lo'u atalii ua masani lava ona avea ma se talanoaga tele e uiga i mea e sili atu ai le Faaola nai lo se toa e sili le malosi. Faatasi ai ma talanoaga i aso uma e pei o lea, o ni nai manatu faaopoopo nei e mafai ona e mafau-fau i ai ina ia mafai ona avea ai lou aiga o se aiga e sili atu ona totonugalemu ia Keriso:

- Faaaoga le Tusi a Mamona e aoao atu ai lau fanau e uiga i le Togiola a Iesu Keriso. O le upu *Togiola* po o le *totogi* e 39 taimi e maua ai i le Tusi a Mamona.
- Faaaoga vitio o Savali FaaMamona, vitio o Tusi Paia, ma isi faasalalauga o le Ekalesia o loo aoao mai e uiga ia Iesu Keriso e faaleleia ai au lesonea o afiafi faaleaiga ma suesuega o tusitusiga paia.
- Aoa ma usu faatasi pese e uiga i le Faaola ma talanoaina a latou aoaoga ma uiga.
- Saili ni auala e faamamafa atu ai o perofeta o ni molimau maumaututu o Iesu Keriso.
- Saili pea lava pea e faaleleia atili la oulua lava sootaga ma le Faaola.

Ua ou iloa e ala i ni suesuega totoa ma tatalo faatauana, o loo soifua Iesu Keriso ma e moni Lana meaalofo sili o le Togiola ma e tuuina mai i o tatou olaga, ma olaga o e tatou te alolofa i ai, le uiga ma faamoemoega, ma le faamoemoe maoa'e ma mamalu e mafai ona [maua] e o tatou aiga ma o le a fai mo tatou mo le faavavau. Tau ina ia mafai e i tatou taitoatasi ona iloa le taua tele o le faatulagaina o se aiga e totonugalemu ia Keriso, aiga, i le iloaina “e leai se isi ala po o ni auala e mafai ona faaolaina ai tagata, ua na o ia, ma e ala ia Keriso” (Alema 38:9). ■

E alaala le tusitala i Iuta, ISA.

FAAMATALAGA

1. Tagai i le *Aoaoga a Peresitene o le Ekalesia: Iosefa Samita* (2007), 49–50.



PALAMAIRA



O le ala i Palamaira—le saite o le Uluai Faaaliga ma le nofoaga mau o papatusi auro—o se ala lava o le fiafia ma le faigofie mo Iosefa Samita ma lona aiga.

Saunia e Matthew S. Holland

O le tusiga muamua lenei i se faasologa e lua-vaega e uiga i le Perofeta o Iosefa Samita. O le tusiga lona lua, "O Le Oo Mai o le Tusi a Mamona," o le a maua i le masina e sosoo ai o le lomiga O Le Liahona.

Aua nei sese i lena mea. Pe o oe o se faifeautalai faamisiona pe lei, ua valaaulia tagata uma o le Au Paia o Aso e Gata Ai e avatu le savali a le Alii o Iesu Keriso i le "atu laulau uma" (Mataio 24:14). Ua valaauina i tatou e faasoa atu ia mataupu faavae mama ma faatinoga faatulagaina o *Lana* talalelei i *Lona* suafa. Ina ia faia lenei mea, e tatau foi ona tatou manatua e taua le aoao atu ma molimau atu sa avea Iosefa Samita ma Ana meafaigaluega i le toefuataiina mai o na mataupu faavae mama ma faatulagaina ia faatinoga i le lalolagi.

Ma i lenei taimi taua tele, o le a outou atamamai e fesiligia outou lava pe ua outou saunia e tutu atu ma folafola atu ma le talitonuga manino ma le lototoa matagofie faapea, "O le taeao o se aso matagofie lava ma le manino, i le amataga lava o le tau totogo o le afe valu selau luasefulu,"¹ na savali atu ai Iosefa Samita i se togavao tuufua, tootuli, tatalo ai, ma e lei toe tutusa lava le lalolagi. Afai o le a avea outou ma auuuna a le Atua ua valaauina outou e avea ai, ua tatau ona outou saunia e faia lena mea.

Filifili nei e avea ma se tamaitiiti aoga o le soifuaga o le Perofeta o Iosefa Samita. E i ai le mana ma le potu i lona olaga e le pei o se isi, sei vagana ai le soifuaga o le Faaola Lava Ia. A o e faamasani oe lava ia ma le naunautai ma le agaga tatalo i faamatalaga o le olaga o Iosefa, ou te folafola atu o le a faatupulaia ai lou alofa ma le faamemelo ia te ia, o le a e maua le mafanafana ma le faamalosiaga mo na aso faafaifeautalai e faapitoa le faigata, ma o le a e faamalosiaga ai lou malamalama agai i faitioga faaona po nei ua matua mautinoa faapea o faamaoniga faalelalolagi ua faamaonia ai o Iosefa e le moni mea na ia faamatalaina. Ina ia faataunuaina na mea, mafaufau i na o ni nai vaaiga o lenei tamalii maoae.

O Se Auala Tiga

E mafai lava ona tatou talitonu o le taeao o le Uluai Faaaliga sa matuai mamalu ma filemu lava e pei o le viiga "O se Taeao Ina Manaia"² o loo



I le mavae ai o le tolu tausaga o le faaleaogaina o a latou laau toto i Veremona, na faia ai e Iosefa Samita le Matua se laasaga pito sili ona taua o le siitia atu o lona aiga i le 300 maila (482 km) i sautesisifo i le tau-laga o Palamaira, i Niu Ioka i luga.

faatauina atu o uta, ma na o se pusa e tumu i lauti na maua mai ai.⁵

I le taimi lea, na iloa ai ua olegia Iosefa le matua, ua tatau ona totogi atu oloa o se aofaiga tele o le faleoloa a Samita. I le feagai ai ma tagata na aitalafu ai, na oo le au Samita i se tulaga o le popole tele. Ina ia totogi a latou aitalafu, na tuuina atu e Lusi se meaalofo o le faaipoipoga e \$1,000 lea na ia sefeina mo le tele o tausaga, ma ua taliaina e Iosefa le \$800 mo faatoaga a le aiga i Tunbridge.⁶ O le faatoaga o le mea lea e tasi o le a i ai

faamatalaina mai ai. Ae a o tatou olioli ai i se ata faapena, e le tatau ona tatou faagaloina le vaiga i mea na tutupu ina ia maua ai lona taeao. O le ala i Palamaira—o le tulaga aoao o lenei taimi paia, ma faapitoa e tasi—e le o se ala faigofie mo lenei tama perofeta ma lona aiga.

Sa faaipoipo matua o le Perofeta, o Iosefa Samita le Matua ma Lusi Maki Samita i Tunbridge, Veremona, ISA, i le 1796. Ina ua mavae tausaga e ono o le faamanuiaina i faatoaga, sa malaga atu le au Samita i Randolph e lata ane e taumafai i galuega tau faleoloa.³

O ituaiga o oloa na maua e Iosefa le Matua faatasi ai ma le fesoasoani a le au fai tupe nono i Boston na fiafia i tagata fou—e le mo tupe, ae mo folafolaga o le totogiina i le taimi lava e oo mai ai le selesalega i le faaiuga o le vaitau o le tuputupu ae. A o ia faatalitali mo tupe totogi na folafola mai e totogi uma ai ana aitalafu, na ia aafia i ni auala fou mo tupe maua.

I na aso o maketi a Saina sa taumafai e faatau ni a'a o vai Saina. E ui ina sa ofoina atu ia Iosefa le matua se tinoitupe e se tagata faipisinisi mo le \$3,000 mo a'a o vai Saina sa ia aoina ma saunia mo le auina atu, sa ia filifilia le ala e sili atu le le mautinoa e ave lava e ia le uta i Niu Ioka, ma faafesootai le kapeteni o le vaa e faatau atu ana oloa i Saina. E ala i le le faaaogaina o le faipisinisi lea na ofoina mai le tupe muamua, sa ia fuafua e maua se \$4,500—o se aofaiga tele i na aso.⁴

Ona o se taimi leaga po o se mailei na fuafuaina, o le uta a Iosefa le matua na iu ai i luga o le vaa lava lea e tasi na malaga ai le atalii o le faipisinisi lea na ia musu ai. I le faaaogaina o lea tulaga, o lenei atalii na faatauina atu a'a o vai Saina a Samita i Saina “i se tau maualuga” ma tuu le tupe faasili mo ia ae fai mai na le manuia le



sina faamaoniga itiiti o se tupe feololo e fesoasoani i le tulaga mautu o le tamaoiga ma le saogalemu faaletino mo se taimi umi i le lalolagi e masani ona faigata o Amerika anamua faatoa tau atiina ae. I le taimi lea, i le leai o se tupe ma se fanua, o le a faamalositia ai le au Samita e siitia ese faavalu i le 14 tausaga, ma vaavaai pea mo se auala e tausia ai lo latou aiga.

E le itiiti ifo ma le tasi o na siitia ese na mafua ona o le faigata o mea tau tupe o pili a fomai ua faaputu mai le faamai pipisi o le fiva taifo i le 1813 lea na taia ai le fanau uma o le aiga o Samita i se malosiaga tele ma le faavaivaia. I ni nai vaiaso talu ona mavae le fiva o Iosefa, na ia oo i se tiga matautia i lona tauau. Na sese le faaiuga a se fomai i le lotoifale faapea o le tiga na mafua mai i se maso ua malo. I le lua vaiaso mulimuli ane, ina ua faateteleina le tiga i tulaga faigata, na foi mai le fomai ma iloa ai o se siama na mafua mai i le fiva faaumiumi o Iosefa.⁷

Ina ua taunuu atu Iosefa Samita i Palamaira, ua aumaia e le Alii Lana perofeta na muai faauuina i le nofoaga mau faaletino—o se mauga lata ane—o se oa e le mafuatiaina le taua.



O le afaina o le vaega o le mai na aumaia ai i fafo se kuata o le mai, ae e lei atoatoa le togafitiga, ma o le siama fou na oo atu i le vae agavale o Iosefa. Mo lenei mea, sa valaauina ai se fomai tipitipi. Sa ia faia se tipi e valu-inisi (20 sm) mai le tulivae i le tapuvae, lea na faamamaina ai lava le tiga. Ae paga lea, o le siama, ua ofi atu i totonu o le ponaivi.⁸

I le taimi lea sa saili atu ai e le aiga se fautuaga faa-fomai e sili ona lata mai mai taitai o le au pulega i le Kolisi Faafomai o Dartmouth. Sa finau atu Lusi o le

i lona tete faatauana atu. O le mea sa ia vaaia na tamau ai se vaaiga e le mafaagaloina. Na taoto Iosefa i se moega ua susu pala i le toto, “ma sa sesega pei o se tagata oti, ma tafe ifo i ona mata mataua lapopoa o lona afu, ao atagia mai i ona foliga le tiga matuitui.”¹¹ O le mea e laki ai, na manuia le taotoga, peitai o le a faaoga e Iosefa ni tootoo mo le isi tolu tausaga.

Ina ua uma lenei tulaga faigata, sa faamoemoe le aiga o se amataga fou i Norwich, Veremona, o le a iu lava ina aumaia le mautu ma le manuia o loo latou matuai manaomia



togafiti aupito sili ona talafeagai ma o se aga i fanua faiga faavae, o le tipi, e le faaogaina. Nai lo o lena, o le a taumafai e le au Samita se faiga fou ma le tiga—o se tasi e aunoa ma le mautinoa pe manuia. O le a tipi e fomai lona vae ma fai ni pu se lua i itu taitasi o le ponaivi. Ona latou tata’e ese lea o ni fasi ponaivi tetele se tolu ina ia aveesea ai le vaega ua aafia i le siama.⁹

O nei mea uma e faia e aunoa ma le tulaga lelei o le vai faagase masani o le taimi nei. O se taunuuga, sa uunaia ai le aiga e tuuina atu ia Iosefa le ava malosi po o le saisai o ia i le moega ina ia le fiki ese i le tiga i le taimi o le togafiti maaleale. I le laitiiti i le fitu o ona tausaga, na tete e Iosefa filifiliga uma e lua. Nai lo o lena, na ia faia ni talosaga se lua—ina ia uuina o ia e lona tama ma ia tuua e lona tina le potu.¹⁰

Ina ua matua faateleina le tagi o Iosefa na le mafai ai ona taofia lona tina i fafo, na ia ulu atu i le potu e ui lava

vave lava. Ae ua le toe taulau foi o latou faamoemoe. I lo latou tausaga muamua o le taumafai i le faiga o se faatoaga i se fanua totogi, na faaleaogaina a latou lauu toto. Na faaleaogaina foi a latou lauu toto i le tausaga lona lua. I le tausaga lona tolu, i le 1816, sa naunau Iosefa Samita le Matua e toe taumafai tasi, ma le talitonuga ua tatau lava ona sili atu ona lelei mea uma.¹²

I le isi itu o le lalolagi e mamao ese i le 1815, na ola ai le Mauga o Tambora i Initonesia ma feula atu ai i le siosiomaga o le lalolagi le tele o tone o lefulefu, ma faalavelaveina ai taamilosaga masani o le tau. Mai ia Iuni ia Aokuso o le 1816—na faaigoaina o le “tausaga e aunoa ma se taumafanafana”—e faa aisa toa faatafuna na taia ai Niu Egelani, na toe faaleagaina ai foi lauu toto o le taumafanafana.¹³

I le faatulagaga o le oge ma le faitau afe o e na tuua Veremona i malaga tetele, na faia ai e Iosefa le Matua lana laasaga aupito sili ona taua. Na ia filifili e tuua le pe a ma le

20-maila (32 km) le taamilosaga o aiga, uo, ma le faatoaga na ia iloaina i le tele o lona soifua matua ma agai atu i le 300 maila (482 km) i sautesisifo i le taulaga o Palamaira, i Niu Ioka i luga. O iina, na lipotia mai, sa lafulemu le laueleele ma sa maua gofie tupe nono e umi le taimi e totogi ai. Ona sa manaomia ona muamua ia Iosefa matua, ma tuua ai Lusi ma le fanau e toavalu e teu a latou meafale, ma mulimuli atu ia te ia.¹⁴

O le taimi o le taumalulu na teuina ai e Lusi ma lana vaega laiti totoa mea uma na latou umia i totonu o se



taavale faasee, ma mulimuli ane, i totonu o se taavaletoso. Ina ua uma ona totogi ni aitalafu, sa laitiiti se tupe na totoe ia Lusi mo le malaga. E oo atu i le faaiuga o le malaga ua ia tuuina atu lavalava ma vailaau e totogi ai faletalimalo. Sa ia manatua ina ua taunuu i Palamaira ma le “toe lua pe a sene le tinoitupe.”¹⁵

I le ala na faamalosi ese ai e le tagata na totogi e ave le taavale faasee le taulealea o Iosefa ae faaavanoa le nofoa mo afafine aulelei e toalua o le aiga o Gates, lea sa latou fetaiia’i a o malaga atu i le auala lava lea e tasi. O Iosefa—e le’i atoatoa lava ona malosi—na faamalosi e setusetu “atu i le kiona mo le 40 maila [64 km] i le aso mo ni nai aso,” i se aafiaga na ia ta’ua “o se vaivai ma tiga sili ona ogaoga.”¹⁶

Ina ua aioi atu uso matutua agaalofa o Iosefa, o Ailama ma Alevini, i le tamaloa e faataga o ia e nofo i le taavale faasee, sa ia taisi ia te i latou i le eleele i se patatū tele i le

au o se sasa. I Utica, ina ua manino i le tamaloa ua leai se tupe ia Lusi, na ia lafoaia loa le aiga—ae faatoa ia tuua ina ua mavae se taumafaiga lē faamanuiaina e gaoi le latou taavale toso, i le taimi lea na ia lafoina ai a latou meatotino i le eleele.¹⁷ E ui i lea sa taumafai pea i luma le aiga seia taunuu uma saogalemu i Palamaira, ma pauu atu ma loi-mata i aao o Iosefa Samita le matua.

Atonu o le faamatalaga sili ona faamomoiloto o lenei malaga, e ui i lea, o loo maua i le tusiga e le amanaiaina na faaopoopo e Iosefa i le tala muamua i le malaga a lona aiga: “I la matou malaga mai Utica sa tuua au e tietie i luga o le taavale faasee mulimuli a le kamupani, ae ina ua latalata mai le taavale faasee, na ta au e le ave taavale, se tasi o atalii o Gates, ma tuua ai au e taatia i lo’u toto seia oo ina sau se tagata ese, piki au i luga, ma amo au i le Aai o Palamaira.”¹⁸ O le taua o lenei tala e le tataua ona misia.

O Se Oa e le Mafuatiaina le Tau

Na o le lua maila (3 km) i saute o le nofoaga autu o Palamaira o loo saofai ai se vao o laau o le a avea ma saite o se tasi o faaaliga silisili i le talafaasolopito o tagata. E tolu maila (5 km) i tua atu o loo saofai mai ai le Mauga o Kumora, le nofoaga o papatusi auro e lei iloaina i le taimi lea.

Ina ua taunuu mai Iosefa i Palamaira, na aumai e le Alii Lana perofeta na muai faauuina i le nofoaga mau faaletino o se oa e le mafuatiaina le tau. O le a faailoa mai e lenei oa faapea ina ua mavae le tele o seneturi o le pogisa faaleagaga aoao ma le le mautonu, ua toe tatalaina le lagi. O le a faaali atu e lenei oa o le galuega a Iesu e sili atu ona tuputupu ae i le mataupu faavae ma le faafaafanua nai lo le mafai ona iloa e aulotu faa-Kerisiano o lena aso. O le a faamautu mai e lenei oa, i se auala faavavega, o le Atua o loo galue maeaea i olaga o tagata, i taimi uma, gagana, ma konetineteta uma. Ma o lenei oa o le a folafola maia ia aoaoga e matuai mama ma mamana, afai e te totoina loloto i lou agaga, e mafai ona patino lou liua, i le tofo ai i se mea e matuai suamalie lava ma o le a avea ma tausamaaga tupito ma le le mafaatusalia o ou manaoga.

I mata o le olaga nei, atonu e faaosoosoina i tatou faapea o se ala e sili atu le talafeagai mo se tagata faapena ma se taimi faapena o le a avea ma se ala o le filemu sili atu, le mataalia, ma le viia. I le faalauiloaina o mea e loloto le taua o le a tutupu o se taunuuga o lenei tamaitiiti na ulufale mai

***I le mea e le mamao i saute
o Palamaira, o loo saofai ai
se vao o laau lea o le a avea
ma saite o se tasi o faaaliga
vaaia sili ona maoae i le
talafaasolopito o tagata.***



i leni taulaga i le taimi lea, pe le mafai ea e le Alii, o le na fuafuaina ma le faateetele teuina o papatusi auro i le sili atu ma se afe tausaga na muamua atu, ua saunia se ala e sili atu le sa’o, sili atu ona lagolelei ma le ala taualoa o le taunuu mai?

Ioe, e mautinoa lava le mafai ona Ia faia, ae Na te lei faia.

Sa leai se faauuga faalauaitetele i lona talavou (tagai i le 1 Samuelu 16:11–13). Sa leai se miti taialina na faasinoa o ia i se nuu folafolaina (tagai 1 Nifae 5:4–5). Sa leai se Liahona e fesoasoani i lona aiga e aloese ai mai measese i le ala (tagai i le 1 Nifae 16:10; Alema 37:38). Ma e mautinoa lava sa leai se limosini teuteuina e malaga atu ai i se ala o suluia e le la, ma le solo faatulagaina faatasi ai ma faamalo-siuga mai i tagata sa tuuina atu se faafeiloaiga manumalo.

Ae, mo Iosefa ma lona aiga, sa i ai se auala le tuusao o le faanoanoa na faailogaina i le le laki, faama’ia, faamasinoga le lelei, faalavelave faalenatura, lofituina i le tiga, faamasinoga mamafa le tonu, o le faaauuina o le le amanaiaina, ma le faateteleina o le mativa. O leni mea e le faapea o le aiga o Samita sa soifua i taimi uma i le pagatia; latou te le’i [soifua] faapena. Ae o le ala i Palamaira sa mautinoa lava le tuusao, faateteleina, ma iloa gofie. O le Pipili, setusetu ma tafetotoi, na manaomia moni ai lava le amoina o le Perofeta i lona taunuuga tulagaese e se tagata ese e le iloa le suafa.

Ia manatua leni mea atonu o le lesona muamua lea o le olaga o Iosefa ma le oo mai o le Tusi a Mamona. E ui i le toilalo, faalavelave, ma le oona o le faafeagai—ma i le tele o tulaga tonu lava *ona* o na mea—o Iosefa Samita sa i ai tonu lava i le mea sa ia manaomia ona i ai ina ia faataunuu lana misiona. O lea la, afai e te vaavaai solo atu, i le taimi nei po o i ni aso o i le lumanai, ma iloa atu ai nisi atonu o ni tagata masani e le tuuto ua faamanuaina i a latou galuega ao lea ua leai sau galuega; po o lou

faataotolia i se ma’i tigaina ao lea e i ai ni au galuega taua o le auaunaga e faataunuu; po o le avatu o se tofiga taua i se isi tagata; po o le vave ona aoao e lau soa faifeautalai o se gagana; po o le i ai lava pea o ni faaletonu e uiga i ni taumafaiga lelei o faia mo se tagata o le uarota, se tuaoi, po o se tagata sailiili; po o le oo mai o ni faamatalaga mai le aiga e uiga i ni faaftauli tautupe po o ni mala faaletagata e le mafai ona e foiaina; po o lou lagona le pei o se tagata le taualoa, ma lē taua i se lalolagi na foliga mai na foafoaina mo le fiafia o isi, *ia silafia leni mea*: na onosaia e Iosefa Samita lava ia le tele o mea i le taimi tonu lava ao taitai atu o ia i se vaaiga o le a avea ma mea tutasi aupito sili ona faagaetia e tupu i leni lalolagi talu mai mea na tutupu i Kolokota ma le Tuugamau i le Togalaau e toetiiti ato le 2,000 tausaga ua mavae atu.

“Ae,” e mafai ona e faapea, “o lo’u olaga ma le taunuuga faalelalolagi o le a le pei o le Perofeta o Iosefa.”

Atonu e moni lena mea. Ae e moni foi e taua o outou olaga i le Atua, ma o lou gafatia e faavavau ma o agaga uma o le a e feiloai i ai o le a le sili atu le maoae po o le taua nai lo o lena o le Perofeta o Iosefa lava ia. O lea la, e pei lava o la tatou pele o Iosefa, e le tatau lava ona e fiu, faavaivai, pe toilalo pe a tiga le olaga, fenumiai, po ua le manaia. Nai lo o lena, e pei ona aoao mai Paulo, e tatau ona e iloa e “*galuhue* faatasi mea uma e lelei ai i latou e alofa atu i le Atua, o e ua valaauina i lona finagalo” (Roma 8:28; faapoopo le faamamafa).

E pei lava ona Ia faia i le taulealea o Iosefa Samita, o loo mamanuina ma taitaiina oe e le Atua i aso taitasi i tuluiga o le sili atu ona mamalu nai lo le mea e mafai ona e iloa! ■

Mai se lauga o le faigalotu, “The Making of the Book of Mormon, Joseph Smith, and You,” na tuuina atu i le Nofoaga Autu mo le Aoaoina o Faifeautalai i Provo i le aso 15 Fepuari, 2014. O Matthew S. Holland o le peresitene o le Iunivesite o Iuta Valley.

FAAMATALAGA

1. Iosefa Samita—Talafaasolopito 1:14.
2. *Viiga*, nu. 14.
3. Tagai i le Lucy Mack Smith, *Biographical Sketches of Joseph Smith, the Prophet, and His Progenitors for Many Generations* (1853), 37, 45. Mo se aotelega ma’oti o le mea na tutupu i le siitia atu o le aiga o Samita i Palamaira, tagai foi ia Richard Lyman Bushman, *Joseph Smith:*

Rough Stone Rolling (2005), 17–29.

4. Tagai i le Lucy Mack Smith, *Biographical Sketches*, 49.
5. Tagai i le Lucy Mack Smith, *Biographical Sketches*, 49–50.
6. Tagai i le Lucy Mack Smith, *Biographical Sketches*, 51.
7. Tagai i le Lucy Mack Smith, *Biographical Sketches*, 60, 62.
8. Tagai i le Lucy Mack Smith, *Biographical Sketches*, 62–63.
9. Tagai i le LeRoy S. Wirthlin,

“Joseph Smith’s Boyhood Operation: An 1813 Surgical Success,” *BYU Studies* 21, no. 2 (1981): 146–54.

10. Tagai i le Lucy Mack Smith, *Biographical Sketches*, 64.
11. Lucy Mack Smith, *Biographical Sketches*, 65.
12. Tagai i le Lucy Mack Smith, *Biographical Sketches*, 66.
13. Tagai i le *Church History in the Fulness of Times*, 2nd ed. (2003), 24.

14. Tagai i le Lucy Mack Smith, *Biographical Sketches*, 67.

15. Lucy Mack Smith, *Biographical Sketches*, 68, 70.
16. O Iosefa Samita, i le *The Papers of Joseph Smith*, ed. Dean C. Jessee, 2 vols. (1989), 1:268.
17. Tagai i le *The Papers of Joseph Smith*, 1:268.
18. Iosefa Filitia Samita, i le *The Papers of Joseph Smith*, 1:268–69.



SAILIA O LE
Laveai

Saunia e Connie Goulding

I le aso 5 o Aokuso, 2010, e 33 tagata o Chile e galulue i maina sa maileia i se solo maoae ina ua solo ifo i lalo le papa i totonu o le maina. Sa lokaina i latou i se vaega itiiti o le saogalemu ma auala o le maina i lalo o le solo, 2,300 futu (700 m) le loloto i totonu o le eleele.

Sa foliga mai ua leai se faamoemoe. Na vavae ese i latou mai aiga ma auai e toetoe lava o le afa o se maila mai se papa e le mafai ona aveese o i luga atu, ma e na o se sapaalai laitiiti o meaai ma vai o loo ia i latou. E ui ina sa i ai a latou meafaigaluega ma le atamai, ae ona o le saogalemu o le maina e le mafai ai ona latou faaolaina i latou lava. Na pau lava lo latou avanoa o le mauaina lea ma laveaiina e se tasi.

E ui lava i lenei mea, sa latou filifili ia maua le faamoemoe. Na latou faatulagaina i latou lava, fuafua lelei a latou meaai ma vai, ma faatalitali. Sa latou faatuatua ia i latou o loo i luga ia faia le mea sili latou te mafaia e laveai ai i latou. E oo lava i lea, ai se faigata ona taofimau i lenei faamoemoe a o latou faatalitali i le pogisa. Ua mavae aso, ona sosoo lea ma vaiaso. Na uma a latou meaai na faasoasoina ma le faaeteete.

Sa ou mafatia i se solo maoae i lo'u lava olaga. Ua vaai atu o'u mata, i lo'u atalii aulelei, malie, ma le atoatoa o le malosi e valu tausaga le matua na oti i se faalavelave tau-taavale. Sa ou siiina lona tino a o masaa atu lona toto i luga o le auala ma na aluese malie atu lona agaga ma toe foi atu i lona aiga i le lagi. Sa ou aioi atu i lo'u Tama Faalelagi ina ia tuu mai o ia ia ola, ae e le o le fuafuaga lenei o le olaga o lo'u atalii.

Sa ou leiloa i le pogisa, ua lofituina i le avega o lo'u faanoanoa. Sa ou vaivai, e le mafai ona malolo, a o puaoa lau vaai i le faafitauli o le olaga nei. Na ou iloa o se loto momomo o se lagona moni o le faaletino. O le mea sa i ai lou fatu, ua i ai nei se gaogao ii pogisa sa matuitui ma tiga.

Sa ou talitonu ua tatau ona lava si ou malosi e malo ai. E toatele tagata sa sili atu le mafatia. Ae e pei o le au galulue

E pei o alii e 33 na maileia i se maina na solo i Chile, e mafai ona tatou lagonaina le maileia i o tatou tofotofoga ma vaivaiga; ae peitai, e ala i le ata o le faaolataga e mafai ona tatou maua le faamoemoe mo se laveai.

maina, na maileia e le papa e le mafai ona fuliese na faa-falepuipuia i latou, na ou le mafai ona aveese le avega o lo'u faanoanoa.

I le tele o auala tatou te lagonaina uma le maileia. O nisi atonu e maileia i tofotofoga faaletagata lava ia, vaivaiga, po o tulaga faigata i le olaga. Ae ui i lea, e i ai le mafanafana i le iloa o le olaga faaletino o se taimi tatou te tuputupu ae malolosi ai a o tatou feagai ma lo tatou faanoanoa ma le faavauvau. Tatou te maua ai le faamoemoe ia Iesu Keriso.

O Se Ave o le La o le Faamoemoe

I le aso lona 17 o lo latou puapuaga, na faafouina le faamoemoe mo le au galulue maina ina ua faia se auala vaiti i se auvili lenei na faapu ai le papa na punitia ai i latou.

O alii na maileia, i le manao ia iloa e le au laveai o i luga ua mauaina i latou o loo feola, na tatui atu i le auvili ma faapipii se tusi puupuu lanu mumu i le pito o le auvili. E faitauina faapea, "*Estamos bien en el refugio, los 33*" ("O loo manuia i matou i le malu, le au 33"). Na toefuatai mai le faamoemoe. Ua maua i latou.

E ala i se tamai pu, o le faataamilo o se moli ai suka, na faafoeina ai le fesootaiga ma le lalolagi i luga. O meaai, vai, vailaau, ma tusi pupuu mai e pele ia i latou na auina atu i lalo i le tamai pu i le au galulue maina.

Atonu na maua e le au galulue maina ni lagona fefiloi a o latou iloa lo latou tulaga. E ui ina sa latou olioli tele ma faagaetia ua maua i latou, o lo latou tulaga sa faaeteete

gata lava. E ui lava ina ua iloa e i latou i luga le mea o loo latou i ai, o le a manaomia se taimi e faatino ai se fuafuaga o le laveai, ma na pau lo latou faamoemoe ia faamanuiaina.

Sa logo atu e le au laveai ma le musuā le au galulue maina o le a faitau masina faatoa mafai ona aumai i latou i luga. Na latou faamoemoe ia toe faatasia le au galulue maina ma o latou aiga i le Kerisimasi, o lona uiga o le au galulue maina o le a feagai ma se tuugamau mo le isi fa masina faaopoopo. Ae ui i lea, ua latou faatalitali nei ma le faamoemoe.


Ua i ai foi so tatou ave o le la o le faamoemoe. A o lei foafoaina lenei lalolagi, sa faatulagaina se fuafuaga e laveai i tatou. Sa saunia e le Tama Faalelagi se Faaola mo i tatou, o le a laveaiina i tatou mai lo tatou olaga faaletino, mai a tatou agasala, mai o tatou vaivaiga, ma mai mea uma tatou te puapuagatia ai i lenei olaga. O ia o lē tuuina mai le faamoemoe, ma le ola. Sa ia asaina le ala mo i tatou e toe foi atu ai i lo tatou Tama Faalelagi, ma toe faatasia ai ma e pele ua maliliu. Ua ia tu i tafatafa o i tatou e tauave le mamafa o avega ua tatou tauave, solo o tatou loimata, ma aumaia ia i tatou le filemu. Na Ia afio mai e toe faafoi atu i tatou i le lagi, pe afai tatou te mulimuli i le fuafuaga na Ia faatulagaina.

O Le Laveai

E ui ina eseese ni taumafaiga na faia e laveai ai le au galulue maina, e na o le tasi le auvili na mulimuli i le ala sa'o, e ala atu i tamai pu laiti faataitai na viliina muamua ina ia iloa ai le mea o i ai le au galulue maina.

Sa tau le mautonu le au galulue maina i lo latou laveaiina. A o tu'i atu e le auvili lona ala i lo latou laveaiina, na pauu atu i lalo maa i le pu laitiiti ma faaputu agai i luga i le ana o loo saisaitia ai le au galulue maina. Na latou lau ese maa a o agai mai lalo, ma faaavanoa le ala mo le auvili e lapoa atu.

Sa fausia e le au laveai se pusa e mafai ona tuutuu ifo i lalo i le pu vaapiapi e faaoga ai uaea. Sa toeitiiti lava le



E tatau ona tatou filifili taitasi e tuu atu o tatou loto e faalagolago i lo tatou Faaola o Iesu Keriso. Mo i tatou, ua na o le tasi lava le fuafuaga laveai; o loo i totonu ma e ala mai i Lana taulaga togiola. Na alu ifo o la i lalo o mea uma e laveai i tatou.

lava le lapoa o le pusa laveai e ofi ai se tagata i totonu. O le pusa sa na o le fa inisi (10 cm) e vaiti ai nai lo le pu lea na vili atu i le 2,300 futu (700 m) o le papa malo.

Ina ua oo i le taimi mo le au galulue maina e laveaiina ai, o alii taitasi na feagai ma se filifiliga. Sa taitoatasi ona laa atu se tagata i le pusa; e tatau ona o ae taitoatasi i luga. A o filifili alii taitoatasi e talitonu i le fuafuaga, e tatau ona ia faamoemoe o le a tosoina atu le pusa i luga o le ala vaapiapi i

se auala moni ma le sa'o ae aua nei sipa ma mau ai. Sa tatau ona manuia le fuafuaga, pe o le a leai se faamoemoe. Na laa atu taitoatasi le au galulue maina i le pusa ma tuuina atu lona faatuatuaga i le fuafuaga ma le au laveai.

Sa taitoatasi ona faia e le au galulue maina le malaga taitoatasi i luga mai le pouliuli ma agai atu i le malamalama. Sa faafeiloaia i latou e e pele ia i latou a o matamata mai le lalolagi atoa ma faamalosiua atu.

Sa faamanuiaina le fuafuaga laveai; e leai se tagata e toatasi na maliu. Sa laveaiina i latou i le aso 13 o Oketopa, 2010—69 aso talu ona solo le maina ma le 52 aso talu ona maua i latou o loo feola.

Talitonu i le Togiola a Iesu Keriso.

E pei lava o le au galulue maina, o la tatou laveai o le laveai o se tagata lava ia. E ui lava o le faaolataga o loo avanoa mo tagata uma, o la tatou sootaga ma le Faaola o se sootaga mafanafana ma patino. E tatau ona tatou filifili taitasi e tuu atu o tatou loto e faalagolago i lo tatou Faaola o Iesu Keriso.

Ona o le paia e faavavau o le faitalia o le tagata lea na faavaeina ai lenei olaga faaletino, e le mafai e le Faaola ona aveese mai ia i tatou lo tatou loto. Ua tatou saoloto e filifili. O loo tu le Faaola i tafatafa o i tatou o loo faatalitali mai e faamaloloina o tatou manua ma siitia i tatou i le faaolataga e faavavau, ae faatoa Ia mafai ona faia i la tatou valaaulia. E tatau ona tatou filifilia o Ia. Mo i tatou, ua na o le tasi le fuafuaga o le laveai; e i totonu ma e ala mai i Lana taulaga togiola. Na alu ifo i lalo o mea uma e laveai i tatou.

Na oo mai lou laveai a o ou tootuli i ou tulivae i le loloto o le faanoanoa i le oti o lou atalii. E pei o le au galulue maina a o latou ulu atu i le pusa, sa ou i ai i se taimi sili ona maaleale: pe tatau ona ou taumafai e faatoilalo ou luitau i lo'u lava malosi ma le atamai, pe e tatau ona ou aapa atu i lo'u Tama Faalelagi ma fesili atu mo se fesoasoani?

I le faavavau ai i le mamafatu o lo'u faanoanoa, sa ou filifili e liliu atu i le Atua. A o ou ole atu i lo'u Tama oi le

Lagi, sa ou tau atu ia te Ia lou vaivai tele ua i ai ma ole atu ia te Ia e siitia i luga le avega o lo'u faanoanoa. A e ou te lei toe tu i luga, o le mamafa o o'u faanoanoaga sa siitia ese mai ou tauau. Sa manaomia ona ou galue pea i le tiga ma le mafatia, ae ua leai le avega e le mafai ona tatalia.

O iina na ou iloa ai e tu le Faaola i o tatou tafatafa, ma faatalitali e siitia i tatou, e na ona faatalitali mo i tatou e fesili atu ia te Ia, e faatalitali mo i tatou e tuuina atu a tatou avega i luga o Lona tauau, e faatalitali mo i tatou e tuu atu o tatou lima i Lona aao ina ia mafai ona Ia laveai i tatou.

O i tatou—e pei o le au galulue maina, o e ua tatau ona toso le faitotoa o le pusa ia tapunia i tua atu o i latou ma faalagolago i lo latou au laveai—e tatau ona tatou tuu atu lo tatou loto i le Faaola ma faalagolago i Lana fuafuaga laveai mo i tatou.

O lo'u faamoemoe, pe a ou faia lena malaga toatasi na o au mai lenei olaga i le isi, o le a i ai le olioli a o ou toe faatasia ma i latou o e na malaga muamua atu ia te au! I le taimi nei ou te iloa o lo'u Faaola o loo soifua ma e alofa ia te au ma o loo tu i ou tafatafa. ■

E alala le tusitala i Iuta, ISA.



E MAFAI ONA SIITIA OUTOU E LE TOGIOLA A LE FAAOLA

Matou te iloa o nisi taimi e faigata ai o outou ala. Ae ou te tuu atu ia te outou lenei folafolaga i le suafa o le Alii: tutulai ae ma mulimuli i tulagaaao o lo tatou Togiola ma le Faaola, o le a i ai se aso e te tepa ai i tua ma faatumulia i le loto faafetai e faavavau ona sa e filifili e faalagolago i le Togiola ma lona mana e sii ae oe ma faamalosiua oe.

Peresitene Dieter F. Uchtdorf, Fesoasoani Lua i le Au Peresitene Sili, "E Mafai Ona E Faia Nei Lava!" *Liahona*, Nov. 2013, 57.



Saunia e Elder
L. Tom Perry

O Le Korama a Aposetolo
e Toasefululua



O LE ASO MAMALU OLE Toefuataiga o le Perisitua

*E tatau ona tatou maua le agaga faafetai ua toefuatai mai
e le Alii Lana Ekalesia ma Lana perisitua i le lalolagi.*

I na ua afio mai le Faaola i le lalolagi, o se tasi o mea muamua sa Ia faia o le faatulagaina lea o Lana Ekalesia. Ua ta'u mai e le Feagaiga Fou ia i tatou na Ia “maliu i le mauga e tatalo, ua aoina lana tatalo i le Atua.” Ina ua Ia afio mai i lalo i le taeao na sosoo ai, sa Ia valaauina faatasi Ona soo. “Na filifilia e ia ni o latou e toasefulu ma le toalua, ua faaigoa foi i latou e ia o aposetolo” (Luka 6:12–13).

Mulimuli ane, na Ia aveina Peteru, Iakopo, ma Ioane i luga o le mauga na o i latou, ma o iina na maua ai e Peteru ki o le perisitua (tagai i le Mataio 17:1–9; tagai foi i le 16:18–19). O Peteru na avea ma le e nafa ma le umiaina o ki uma i le lalolagi i le taitaiina o le Ekalesia ina ua mavae le afio ae o le Faaola.

O le usitaia o le poloaiga a le Faaola (tagai i le Mareko 16:15), na talai atu ai e Aposetolo le talalelei ma faatulagaina ia paranesi o le Ekalesia. I le tele o taimi, sa latou maua le avanoa e asiasi atu ai i paranesi e nao le faatasi le taimi, lea na le lava ai le avanoa latou te talai atu ai ma aoao atu. Na vave ona oo mai manatu sese, ma o vaega eseese o aoaoga faavae a le Faaola sa suia pe na fetuunaia (tagai i le Isaia 24:5). Na salalau atu le liliuese, ua tatau ai i le Alii ona aveesea le perisitua mai le lalolagi o le taunuuga, na leai ni faamanu-
iaga o le perisitua i le fogaelele mo se vaitaimi umi lava.

Ina ia toe faatuina Lona malo i le lalolagi i mana o le perisitua, na toefuatai mai ai e le Alii le talalelei.

Manatua le Toefuataiga

A o faaliliuina e Iosefa Samita le Tusi a Mamona ma sa galue Oliva Kaotui o lana tusiupu, sa la oo mai i le tala i le 3 Nifae i le Faaola toetu ua asiati atu i le itulagi i Sisifo. A o la aoa i Ana aoaoga e uiga i le papatisoga (tagai i le 3 Nifae 11:23–28), sa la taumanatunatu e uiga i le tele o ituaiga faiga o le papatisoga o loo faaaogaina i lo la taimi ma po o ai sa i ai le pule e papatiso ai.

Sa filifili Iosefa ma Oliva e aioi atu i le Alii, i le tatalo i le togavao i tafatafa o le fale o Iosefa ma Ema. O iina, na tupu ai le faaaliga maoae lea na faaali mai ai Ioane le Papatiso, tuu ona lima i luga o o laua ulu ma faapea atu: “I luga o ouluga o’u uso a auauna e, i le suafa o le Mesia ou te faaee atu ai le Perisitua o Arona, o loo i ai ki o le talalelei o le salamo, ma o le papatisoga i le faatofuina mo le faamagaloina o agasala; ma o le a lē toe aveesea lava lenei perisitua mai le lalolagi, seia toe osia e atalii o Levi se taulaga i le Alii i le amiotonu” (MF&F 13:1).

O se matua mamalu lava lena mea. Ou te faamoemoe e manatua uma e e umia le perisitua le aso 15 o Me, 1829, e avea o se mea paia na tupu i le talafaasolopito o le Ekalesia ma o se mea faapitoa na tupu i le talafaasolopito o le lalolagi.

Ua tau mai ia i tatou e le Mataupu Faavae o le Faatuatua “Matou te talitonu e ao ina valaauina se tagata e le Atua, e ala i le valoaga, ma ala i le faaeega o lima o i latou o e o i ai le pule, e tala’i atu ai le Talalelei ma faia sauniga o i ai” (Mataupu Faavae o le Faatuatua 1:5).

O tagata e le valaauina faafuasei; ua valaauina i latou e ala i musumusuga ma valoaga. O loo i ai se laina tuusao o musumusuga mai le Alii ia i latou o e ua valaauina e faaoga le perisitua. O le ala lena e pulea ai e le Alii Lana Ekalesia, ma o le ala lena na Ia valaauina ai le Perofeta o Iosefa Samita.

Ia Agavaa Mo le Perisitua

O le mauaina o le perisitua e le o se faailoga e otometi lava ona oo mai e tusa ai ma le suia o tausaga. E tatau ona tatou agavaa ma “faamaoni i le mauaina o nei perisitua e lua” (MF&F 84:33). E tatau ona tatou faitau ma le faaeteete i le tautoga ma feagaiga o le Perisitua Mekisateko, lea e faapitoa lava le faasino mai ai o le tulaga e tatau ona tatou malamalama ma malilie i ai ina ia talia ai le perisitua:



“O le mea lea, o i latou uma o e e mauaina le perisitua, e mauaina lenei tautoga ma le feagaiga a lo’u Tamā, e lē mafai ona soli e ia, pe mafai ona aveesea.

“Peitai ’ai se e solia lenei feagaiga ina ua uma ona maua e ia, ma liliu ese atoa mai ai, o le a lē maua e ia se faamagaloga o agasala i le lalolagi lenei po o i le lalolagi a sau. (MF&F 84:40–41).

E fai lava si ogaoga. Atonu e te manatu o le a fefefe tagata i le Perisitua Arona ma le Perisitua Mekisateko, ae o le fuaiupu e sosoo ai, “Oi Talofa ia te i latou uma o e *le o mai* i lenei perisitua” (MF&F 84:42; faaopoopo le faamamafa).

Afai tatou te taliaina le perisitua ma ola agavaa mo lea mea, tatou te maua faamanuiaga a le Alii. Ae afai tatou te solia a tatou feagaiga ma liliu ese mai lo tatou perisitua, o le a tatou le maua faamanuiaga a le Alii po o le avea ma “le au filifilia a le Atua” (MF&F 84:34).

O le Perisitua Arona, lea e maua e ala i le feagaiga, e fesoasoani e saunia alii talavou e maua le Perisitua Mekisateko, o le perisitua maualuga e maua e ala i le tautoga *ma* le feagaiga.

Aapa Atu i le Auauna Atu

O le perisitua o se usoga maoae—atonu o le usoga sili lea i le lalolagi. O sootaga i o tatou uso a perisitua e tatau ona sili atu nai lo soo se isi lava sootaga sei vagana ai i latou i totonu o o tatou aiga taitoatasi. E le gata i le avea ai ma se usoga, o le perisitua o se faalapopotoga auauna

atu lea tatou te tuuina atu ai i tatou lava e fesoasoani atu i isi ma faia mea ia sili atu ona lelei.

Mai le taimi e maua ai e se alii talavou le Perisitua Arona ma faauuina o se tiakono po o se aoao po o se ositaulaga, ua i ai o ia i se korama. E faaauau pea lena usoga o le korama pe a ia maua le Perisitua Mekisateko ma faauuina e avea ma se toeaina. E taua tele korama i le perisitua.

Talu ai nei sa lauga ai se alii talavou e alu i se misiona i le sauniga faamanatuga. I lana saunoaga na ia faamalamalama ai o ia ma le toafa o ana uo na amata faatasi i le korama a tiakono. Sa ia fai mai o le faauoga ma le lagolago na latou tuuina atu i le tasi i le isi a o latou feagai ma luitau ma siitia atu ai agai i luma e ala i le faatulagaga o le Perisitua Arona na fesoasoani ia i latou ina ia ausia a latou sini o le auauna atu faamisiona.

Ou te auai i se korama. O se korama taua tele. E i ai tagata mai ituaiga eseese uma o galuega ma tomai. Ae pe a tatou galulue faatasi o se korama, ua tatou lotogatasi i le faamoemoe.

Pe a malilie tagata o le korama e autasi i se ala e mulimuli ai ma galulue faatasi i lalo o le uunaiga a le Agaga Paia, latou te galulue e tusa ai ma le finagalo o le Alii. Sei vagana ua i ai se maliega atoatoa o tagata o se korama, e te le faaauau pea. Mafaufau i le auala e mafai ai ona puipuia oe i le olaga atoa.

E tatau ona i ai i le taitai o le korama se lisi o tagata o lana korama, ma e tatau ona ia mataalala ia i latou o loo i ai faafitauli i le iloaina o le ala e tatau ona latou ola ai. Afai o le tele o na alii

O le perisitua o se usoga maoae—atonu o le usoga sili lea i le lalolagi.

talavou e auai i le korama, e faatulaga e le taitai lana lisi, ma tuuina atu le faamuamua ia i latou e sili ona manaomia le faafailleina. Ona amata lea ona asia e ia ma isi tagata o le korama i latou, ma faia i latou ma uo ma paaga o le korama i se auala e toe foi mai ai i latou i le mafutaga.

E i ai i se korama o le perisitua le matafaioi ma le tiutetauave e “lapatai atu, faamalamalama atu, apoapoai atu, aoao atu, ma valaau atu i tagata uma ia o mai ia Keriso” (MF&F 20:59). O le auauna atu i se korama o le perisitua e taua i lo tatou atinaega iinei i le lalolagi. O le mea lea, o tagata uma o le korama e tatau ona mafaufau i nei tiute o se vaega o la latou matafaioi o le auauna atu i le malo o lo tatou Tama oi le Lagi.

Ua tatou iloa uma tatou te feagai ma luitau i lo tatou olaga faataitai. Sei vagana ua tatou maua le lagolago e fesoasoani ia i tatou a o tatou faagasolo i le olaga, o le a tatou maua i tatou lava ua aunoa ma se fuafuaga mausali, se taitaiga mautu, po o se faafanua mausali e taitaia ma taialaina i tatou. O se korama e lelei le faagaioia e fesoasoani ia i tatou e fausia se fuafuaga ma se faafanua lea o le a taitai atu ai i tatou e toe foi atu i le afioaga o lo tatou Tama oi le Lagi.

la Lotofaafetai

O Epikopo e umia ki o le perisitua e pulefaamalumalu ai i a latou uarota, e aofia ai alii talavou o le Perisitua Arona. O le epikopo, o le mea moni, o le peresitene o le korama a ositaulaga o lana uarota. Na te fesoasoani i alii talavou ina ia agavaa e mauaina ma alualu ai i luma i le Perisitua Arona ma saunia ai mo le Perisitua Mekisateko. E fesoasoani o ia ia i latou e malamalama i tiute ma faamanuiaga e oo mai i e o loo umia le perisitua. E fesoasoani o ia ia i latou e aoao e faalautele le perisitua e ala i le tuuina atu ia i latou o tofiga e fesoasoani ia i latou e auauna atu ma aoao atu isi.

Ua faamanatu mai e ki o le Perisitua Arona ia i tatou e tatau lava ona tatou faafetai pea lava mo le perisitua toefuataiina, ma lona mana, pule ma tiutetauave: “Le mana ma le pule o le perisitua mauualalo, po o le Perisitua Arona, o le umia lea o ki o le auaunaga a agelu, ma fai sauniga o fafo, le mata’itusi lea o le talalelei, o le papatisoga lea o le salamo mo le faamagaloina o agasala, e tusa ai ma feagaiga ma poloaiga” (MF&F 107:20).

Ou te luitau alii talavou e faamamalu le perisitua ua latou maua ma saunia e siitia atu i tofi taitasi o le Perisitua Arona a o latou saunia mo le faamanuiaga faaopoopo o le mauaina o le Perisitua Mekisateko, o le auauna atu i le Alii o ni faifeautalai faamisiona, ma iu lava ina faaipoipo atu i Lona malumalu paia.

Ou te molimau atu e leai se tagata soifua e taitaia lenei Ekalesia. O le Ekalesia a le Faaola, ma Na te taitaia e ala i le perisitua, lea Na te faasafua atu i alii i le lalolagi ina ia mafai ona latou galulue o Ona sui i le taitaiina o Lana Ekalesia ma le faatinoina o sauniga paia. E tatau ona tatou maua le agaga faafetai ua toefuatai mai e le Alii Lana Ekalesia ma Lana perisitua i le lalolagi. ■





O AOAOGA A LE FAAOLA I LE Avea Ai ma Soo

I le tala a Luka i le malaga mulimuli a Iesu Keriso i Ierusalem, tatou te vaai ai i le Faaola o tuuina mai se mamanu manino i le ala e mulimuli ai ia te Ia.

Saunia e Casey W. Olson

Seminare ma Inisitituti

Toe fa lava masina a o lei maliu le Faaola, “ua oo atu i ona po e siitia ai, ona matua [po o le naunau] faasaga atu lea o ia a maliu atu i Ierusalem” (Luka 9:51).¹ I vaiaso na muamua atu, sa saunia ai ma le faaeteete e Iesu Keriso Ona soo mo faigata ma mea ofoofogia faaleagaga o le a tutupu i luma atu.

Mo se faataitaiga, ina ua faatoa uma ona molimau atu Peteru i le paia o Iesu Keriso i Kaisareia i Filipi, na fetalai atu le Faaola i Ona soo e uiga i Lona maliu ma le Toetu mo le taimi muamua lava i ni faaupuga faigofie, ma manino (tagai i le Mataio 16:13–21; Mareko 8:27–31; Luka 9:18–22).² Na aveina foi e Iesu Peteru, Iakopo, ma Ioane faatasi ma Ia “i le mauga maualuga,” lea “na liua ai o Ia i o latou luma” (Mataio 17:1–2). O iina, na tuuina atu ai e le Faaola, Mose, ma Elia ki o le perisitua ia Peteru, Iakopo, ma Ioane. Na ofoina atu foi e Mose ma Elia le faamafanafanaga ma le lagolago ia Iesu a o latou “fetautalatalaai i lona maliu o le a faaiuina i Ierusalem” (Luka 9:31).³ na faasino Elder James E. Talmage (1862–1933) o le Korama a Aposetolo e Toasefululua i lenei aafiaga i luga o le mauga “o le amataga o le faaiuga” o le galuega faaletino a Iesu Keriso.⁴

O nei mea na tutupu ua faaali mai ai ina ua “matua faasaga atu lea o ia a maliu atu i Ierusalem,” na silafia lelei e Iesu Keriso ua Ia amataina le malaga lea o le a faaiuina i Lona maliu. O le tusi a Luka, lea e tuuina mai ai se auiliiliga sili atu e faatatau i lenei malaga, ua faamaumauina a o “maliu ane foi [le Faaola] i aai ma faoa aai, ua aoao fano, o alu malaga atu i Ierusalem” (Luka 13:22), o se vaega o le au soo—alii ma tamaitai uma—sa malaga faatasi ma ia (tagai i le Luka 11:27).⁵ A o savavali faatasi, sa aoaoina e Iesu Ona soo i mea e manaomia e avea ai ma soo. A o tatou suesue i aoaoga a le Faaola i anotusi o lenei malaga, e mafai ona tatou maua ai se agaga talisapaia sili atu o le auala na Ia toe faamamafa atu ai Ana aoaoga i le avea ai ma soo i le mana o Ana lava faataitaiga.

Tali e tolu i le Faatonuga a Iesu Keriso e “Mulimuli mai ia te Au”

A o lei amata e le Faaola Lana savaliga mulimuli i Ierusalem, sa Ia tautino mai: “A fia mulimuli mai se tasi ia te au, aua le ususitai ia ia te ia, a ia ave e ia lona satauro i aso fai soo, i le mulimuli mai ai ia te au” (Luka 9:23). Mulimuli ane, a o malaga atu Iesu ma Ona soo agai i Ierusalem, “ona fai mai lea o le tasi ia te ia, le Alii e, ou te mulimuli atu ia te oe i mea uma e te maliu atu i ai” (Luka 9:57). Na tali atu le Faaola “o le Atalii o le tagata e leai se mea e moe ai o ia” (Luka 9:58), atonu e faailoa mai o le “olaga sa matuiai faigata lava mo ia,” e pei ona matauina e Elder Jeffrey R. Holland o le Korama a Aposetolo e Toasefululua, ma o le “a masani lava ona faapea” mo i latou o e filifili e mulimuli ia te Ia.⁶

Ona, “ua fetalai atu ia i le tasi, Ina mulimuli mai ia ia te au,” (Luka 9:59), ae sa talosagaina e le tagata ia faatagaina o ia e muamua ona alu e tanu lona tama. Sa tali atu Iesu, “ina tuu pea ia i e ua oti e tanu i o latou tagata oti: a o oe, e te alu ma talai atu le malo o le Atua” (Luka 9:60).⁷ O upu a le Faaola e le faape e sese le faavauvau i le maliu o se tasi e pele ia te ia (tagai i le MF&F 42:45). Nai lo o lena, latou te faamamafa atu faapea o le tuuto atu i le Alii o le faamamama aupitu maua o se soo.

O se tagata lona tolu na faapea mai, “Le Alii e, ou te mulimuli atu ia te oe; a ia tuu mai ia te au sei ou muai faamavae i lou aiga” (Luka 9:61). Sa tali atu Iesu i se talu faatusa o se tagata galue fanua, e manaomia ai i lana

galuega le taulai atu i luma nai lo le galuega ua tea atu i tua (tagai i le Luka 9:62). O le lesona mo lenei tagata o le na o le mulimuli lava i faataitaiga a le Faaola, o le na “matua faasaga atu lea a maliu i Ierusalem” (Luka 9:51) ma sa le toe tepa i tua.

Le Auala e ui atu i Samaria

A o ui atu Iesu ma Ona soo i le ala i Samaria i lo latou ala i Ierusalem, o nisi o tagata Samaria “ua le talia o ia” (Luka 9:53)—e foliga mai ona sa latou iloaia o Iesu ma Ona soo o ni tagata Iutaia.⁸ I le tali atu i ai, na saili atu Iakopo ma Ioane mo le faatagaga e valaau ai i lalo le afi mai le lagi e faamu ai i latou ua faalavelave mai (tagai i

*E pei o le Samaria agalelei, sa
auauna atu Iesu i agaga uma na
manunua na fetaia'i ma Ia.*

le Luka 9:52–54). I lenei tulaga maaleale, na faaalua e le Faaola le onosai ma le lototele a o apoapoai i Ona soo e faia lea lava mea e tasi (tagai i le Luka 9:55–56).

Ina ua faatoa mavae lenei mea na tupu, sa ta’u atu e le Faaola le faataoto i le Samaria (tagai i le Luka 10:25–37). E le gata i le faamalieina o le fesili a se loia pepelo, o lenei faataoto atonu na faamanatu mai ai i soo o le Faaola e leai se faailoga tagata i le poloaiga ina ia “alofa . . . i le lua te tuaoi ia pei o oe lava ia te oe” (Luka 10:27; tagai foi fuaiupu 25–29).

E le gata i lea, atonu na iloa e soo o le Faaola ni mea na tutusa ai faatinoga a le Samaria agalelei, ma Iesu. Sa faataitai foi e le alofa na faaalua e le Samaria agalelei mo se tagata Iutaia le alofa moni o Iesu na faaalua talu ai nei i tagata Samaria faatuaupua. Ma le isi foi, i vaiaso o le a sosoo ai, o le a vaaia tino ai e soo o le Faaola ia Iesu ua fetaiai ma le tele o agaga ua manunua i luga o le auala i Ierusalem (tagai i le Luka 13:10–17; 14:1–6; 17:11–19; 19:1–10). E pei o le Samaria agalelei, o le sa tu i se auala



matautia, o se auala saoloto e tumu i tagata gaoi, ma faamuamua le manuia o se isi nai lo ia, o le a auauna atu Iesu i agaga manunua taitoatasi na Ia fetaia'i, ma le le manatu e uiga ia te Ia Lava e ui lava ua latalata i Lona lava maliu.

Ua Aoaoina e le Faaola Maria ma Mareta

I le taimi o Lana malaga i Ierusalema, sa afe ai Iesu i le fale o Mareta (tagai i le Luka 10:38). A o Mareta “ua tiga i le fatuaiga” (Luka 10:40), o lona uso o Maria, “ua nofo o ia i lalo i tafatafa o vae o Iesu ma faalogo i lana fetalaiga” (fuaiupu 39). O le talimalo sa sili ona taua i le malo o Iutaia, ma e foliga mai o Mareta sa saili ma le filiga ina ia faatau-nuuna faamoemoega faaleaganuu e tusa ai ma lana matafaioi o se talimalo.⁹

E ui lava na faaalua e Mareta le tuuto ofofofia ma le faatuatua i le Faaola i se isi faatulagaga (tagai i le Ioane 11:19–29), o lenei ua faitio o ia, “Le Alii e, e te le manatu mai ea ua tuu mai e lo'u uso ia te au e sauni toatasi? fetalai ane ia ia te ia, ia fesoasoani mai ia te au” (Luka 10:40). Ina ia fesoasoani i tagata o le Ekalesia e aoaoina se lesonea taua mai lenei mea na tupu, o Elder Dallin H. Oaks o le Korama a Aposetolo e Toasefululua na taua i se tasi taimi mai se lauga a le Polofesa o Catherine Corman Parry i se faigalotu a le Iunivesite o Polika Iaga:

“E lei afio atu le Alii i le umukuka ma tau atu ia Mareta e taofi le kuka, ae sau e faalogo. O le mea moni lava sa faamalieleina o ia e tuu atu o ia e auauna atu ia te ia i le mea e malie ai o ia, seia oo ina ia faamasinoina le auaunaga a se isi tagata. . . . O le *taua faaletagata* o Mareta . . . na pogai ai le aoaiga a le Alii, e le o lona pisi i le taumafataga.”¹⁰


O le measese muamua a Mareta i lenei tulaga, e foliga mai o le taulai atu ia te ia lava—a o ia auauna atu i isi. Na fesoasoani le Faaola ia Mareta ia malamalama e le lava le

na o le auauna atu i le Alii ma o tatou uso a tagata. E tatau ona tatou aoao e faamaumau i tatou lava i le faagasologa o le auauna atu ma saili atu i le finagalo o le Alii e taialaina o tatou manaoga ma faamoemoega faapea ma a tatou faatinoga (tagai i le Luka 9:24; MF&F 137:9). E tatau i soo ona foia le faananau e manatu muamua ia i latou lava ma aoao e auauna atu i le Tama Faalelagi ma Lana fanau ma mata “tautasi i [Lona] mamalu” (MF&F 88:67). Mulimuli ane, ina ua mavae le maliu o lona tuagane, na faaalua e Mareta le faatuatua mausali e ala i le taofia o mea uma ae alu atu e feiloai ma le Faaola ina ua ia faalogo ua afio mai o Ia (tagai i le Ioane 11:19–20).

Na Faamalamalamaina e le Faaola Manaoga o le Avea Ai ma Soo

Mulimuli ane i le malaga a le Faaola i Ierusalem, sa talosaga ane se tagata, “Le aoao e, ia e fetalai ane i lou uso, ina ia vae-luaina mai le tofi ia te au” (Luka 12:13). Sa tali atu Iesu i le lauga atu i le autu o le faafitauli a le alii: “Ia leoleo outou ia te outou, aua le matape’ape’a: aua e le ola se tasi i le tele o mea ua ia te ia” (Luka 12:15). Ona ia tuuina atu lea o le faataoto i le vale mauoa (tagai i le Luka 12:16–21).

I le faataoto, o se tasi mafuaaga mo le taua e le Atua o le tagata mauoa o se vale atonu ona o lona manatu faapito. I le Luka 12:17–19 e faaoga e le alii mauoa ia upu *ou ma lo’u* e 11 taimi, e faaalua ai lona popolega mo ia lava.¹¹ E le gata ina sa faatoilaloina le tagata e le manatu faapito, ae na te le’i mafaia foi ona iloa le puna o ana oa. E leai se auala na ia faailoa atu ai, e pei ona faia e le Faaola, o le “fanua” ua “fua tele mai” (Luka 12:16), e lei faafetai atu foi o ia i le Alii mo le foafoaina o le lalolagi o loo tutupu ae ai fua o ana faatoaga. Mulimuli ane sa faasalaina le tagata e le ona o le faiga potu o le teuina o meaa faaletino ae mo lona le saunia faaleagaga



mo le lumanai. O le “le mauoa i le Atua” (Luka 12:21), na iu lava ina taofia mai le tagata e le gata o le oa sa i ai mo se taimi i le lalolagi, ae faapea foi o “oa i le lagi e le uma lava” (Luka 12:33). O ana filifiliga i le olaga na tuua ai o ia e mativa i le faavavau.

I le faatusatusaga tuusao i le vale mauoa o le sa faapututuina meatotino faalelalolagi a o lei faafuaseia ona oti, na savali atu Iesu i Lona maliu, ma le loto ma tuu atu i le Atua mea uma sa Ia maua ma sa—e aofia ai Lona ola ma le fuataga atoa o Lona finagalo (tagai i le Luka 22:42; Mosaea 15:7). Sa ia tautino mai, “O lou papatisoga o le a papatisoina ai au; ua ou matua tiga lava seia faaiuina!” (Luka 12:50). Talu ai o Ia ua uma ona papatisoina i le vai, na faatatau e

E pei o Maria ma Mareta, e tatau ona tatou aoao e faamaumau i tatou lava i le faagasologa o le auuuna atu ma saili le finagalo o le Alii.

Iesu lenei mea i Lana Togiola. E leo toe umi ae alu ifo o Ia e mauualalo i mea uma ma o Lona tino o le a lilofia i le toto ma le afu ao Ia puapuagatia mo a tatou agasala ma na aafia i o tatou tiga ma mafatiaga.¹²

Mulimuli ane, ina ua lapataiina e nisi o au Faresaio Iesu o le a saili Herota Anetipa ia fasiotia o Ia, sa na ona faamautinoa atu e le Faaola o le a Ia faaauau pea e faaoga avanoa taitasi e aoao atu ai, faamanuia, ma faamaloloina ai isi (tagai i le Luka 13:31–33). Sa ia faaluina toe aso o Lona soifuaga faaletino—e pei o Ona aso uma ua tuanai—e auuuna atu i isi.

A o faalatalata atili atu i Ierusalem, na faatonuina e Iesu Ona soo ina ia faitau i le tau o le avea ai ma soo—e tuu muamua ai le mafaufau i totonu o a latou filifiliga e mulimuli ia te Ia (tagai i le Luka 14:25–28). Na te lei saili e faamatagofie ia mea moni faigata o le a latou feagai ai pe afai latou te faaauau pea ona avea ma Ona soo. Nai lo o lena, sa Ia matua tautino atu: “E faapea foi so outou e le lafoai ana mea uma, e le mafai ona fai o ia mo’u soo”

(Luka 14:33). Ae ui i lea, na folafola atu foi e le Faaola faapea, a tatou tuu atu i tatou lava i le ala o le avea ma soo, o le a tatou maua isi tauti e tele e sili atu (tagai i le Luka 9:24). O faamanuiaga ua Ia folafola mai i Ana au Soo e aofia ai le “filemu lea i le lalolagi lenei ma le ola e faavavau i le lalolagi a sau” (MF&F 59:23).

E ui lava tatou te le o maua le avanoa e savavali faatasi ai ma Iesu Keriso i Ierusalem, e mafai ona tatou faaali atu lo tatou naunautai e mulimuli i lena mamamu i o tatou lava olaga. O le manatuaina o le naunau o le Faaola lava ia e ositaulaga ma auuuna atu e tusa ai ma le finagalo o le Tama Faalelagi e mafai ai ona tuuina mai ia i tatou le malosi e “alu ia, ma ia . . . faapea ona fai” (Luka 10:37). ■

FAAMATALAGA

1. Tagai i le A. B. Bruce, *The Training of the Twelve* (1971), 240.
2. O mau e faatatau i puapuaga o le Faaola ma Lona maliu mai le taimi na muamua atu i Lana galuega e aofia ai Mataio 9:15; 16:4; Ioane 2:19; 3:14.
3. Tagai i le James E. Talmage, *Jesus the Christ*, lomiga lona 3 (1936), 373.
4. James E. Talmage, *Jesus the Christ*, 373.
5. E ese mai le Mareko ma Mataio, o e na ta’ua puupuu le maliu ese mai Kalilaia o le Faaola mo le taimi mulimuli i le olaga nei ma Lana malaga i Ierusalem (tagai i le Mataio 19:1–2; Mareko 10:1), ua taulai atu e Luka le mafaufau tele i lenei malaga (tagai i le Luka 9:51–53; 13:22, 34; 17:11; 18:31; 19:11). E tele lava le eseese o le Talalelei a Ioane i le anotusi mai le Tusi o le Talalelei a Mataio, Mareko ma Luka ma e leo ta’ua ai le malaga mulimuli a le Faaola mai Kalilaia i Ierusalem.
6. Jeffrey R. Holland, “The Inconvenient Messiah,” *Ensign*, Sep. 1984, 68.
7. Sa taua tele i le aganuu a lutaia le ava i matua, e aofia ai le tiutetauave e tuuina atu se falelauasiga talafeagai mo i latou. A uma ona saunia mo le falelauasiga se tino ma tuuina atu i se tuugamau, e masani ona toe foi atu tagata o le aiga i le tausaga mulimuli ane, ina ia tuu ivi i se pusa maa e taua o se osari, lea e tuu ai i le tuugamau o se falelauasiga lona lua faatasi ma ivi o isi tagata o le aiga ua malilili. (Tagai Richard Neitzel Holzapfel, Eric. D. Huntsman, ma Thomas A. Wayment, *Iesu Keriso ma le Lalolagi o le Feagaiga Fou* [2006], 78–79.) Afai o le soo i le tulaga lea sa talanoa e uiga i se falelauasiga lona lua nai lo o se manaoga faanatinati e tausi ai le tino o lona tama faatoa maliu talu ai nei, ona faaalua lea e lana talosaga se mana o faamuamua se tu masani faaleaganuu nai lo se avanoa faapitoa e savavali ai i Ierusalem faatasi ma le Alo o le Atua ma ia aoaoina ai e Ia.
8. Sa matua malosi le feitagai i le va o tagata Iutaia ma tagata Samaria i le taimi o Keriso. O nei vaega e lua e masani lava ona aloese mai fegegalealeiga ma isi. O le tulaga la lea, o tagata Samaria e faaalua lava le le taliaina o Iesu ma Ona soo i aga i fanua ma tu masani o le taliga o malo, e pei o meaai ma fale. (Tagai i le Richard Neitzel Holzapfel and Thomas A. Wayment, *Making Sense of the New Testament* [2010], 140; Ralph Gower, *The New Manners and Customs of Bible Times* [1987], 241–42.)
9. Tagai i le Gower, *New Manners and Customs of Bible Times*, 244–45; Fred H. Wight, *Manners and Customs of Bible Lands* (1953), 69–77.
10. Tagai Dallin H. Oaks, “‘Judge Not’ and Judging,” *Ensign*, Aug. 1999, 12–13; faaopoopoo faamamafa.
11. Tagai i le Jay A. Parry and Donald W. Parry, *Understanding the Parables of Jesus Christ* (2006), 122.
12. Tagai i le Luka 22:44; Alema 7:11–13; Mataupu Faavae ma Feagaiga 19:18; 88:6.



Faifaiiva

I TAGATA



Saunia e Elder
Scott D. Whiting
O Le Fitugafulu

*O tagata uma o e ua taliaina le valaauuga e taitai
i le Ekalesia ua tatou taliaina le valaaulia a le Faaola
ina ia avea ma tagata faifaiiva i tagata.*

Ao tausia lo matou aiga talavou i Hawaii, ma te faafetai ma lo'u toalua mo le Au paia ofoofogia na fesoasoani ia i matou. O nei tagata pele o le ekalesia na opoina i matou ma faia i matou e pei lava o so latou aiga. I ni nai taimi e aveina e tamaloloa i le uarota lo'u atalii laitiiti i ni malaga o faigafaiva i le vasa. O nei faigamalaga e le faaaogaina ai ni vaa ae nai lo o lena, o tomai faafaiga-faiva na atiina ae e tagata Hawaii anamua.

O le faaaogaina o se tasi o na metotia, e gaugau ma faatulaga ma le faaeteete e se faifaiiva atamai se upega lapotopoto o loo faapiipii ai pulu mamafa faataamilo. Ona ia siiina lea ma le faaeteete le upega i se nofoaga i le matafaga papa i luga ae o se vailepa manino. A vaaia loa e ia i'a o o mai i totonu o le vailepa, i le taimi sa'o ma le tomai maoae, o le a ia lafo atu le upega, lea o le a fofola atu i lona lautele ma pau ifo i luga o se mamanu lapotopoto tele i luga o le vai o i lalo, e vave lava ona goto ifo i lalo ma maumau ai i'a na faapotopoto iina.

A o avea le tomai o sea ituaiga faifaiiva o se mea e faagaetia loto, o ia le tagata muamua

o le a ta'u atua ia te oe, a aunoa ma se upega lelei o loo mama, fonofonoina, ma ua toe faaleleia atoatoa, o ana taumafaiga o le a le aoga. E iloa e faifaiiva popoto masani o lo latou faamanuiaina e faalagolago i luga o le atoatoa o a latou upega fagota ma o se faiva lelei, ma faamanuiaina e le amataina sei iloga ua uma ona siakiina upega ma ua lelei atoatoa.

Ua tatou vaaia se malamalama i lenei mataupu faavae i totonu o le uluai Aposetolo, ma nisi o i latou sa faifaiiva e ala i le matata eseese. Ua tatou faailoa atu ai i nei alii faifaiiva i le uluai mataupu o Mataio, Mareko ma Luka, lea na latou lafoina, suiina, ma fufulu a latou upega, ina ua latou fetaii muamua i lo latou Matai o le lumanai (tagai i le Mataio 4:18, 21; Mareko 1:16, 19; Luka 5:2). Na fafagaina e nei alii o latou aiga ma aiga o isi e ala i le galulue i aso taitasi e pue i'a. O a latou faamanuiaga ma o latou aiga e faalagolago i la latou sauniuniga ma le tomai ma le atoatoa o a latou upega.

Ina ua valaaulia e Iesu i latou e "mulimuli mai ia te au, ou te faia ouluga ma faifaiiva i tagata" "ona la tuua loa lea o la'ua upega," "tuua mea uma, ae mulimuli atu ia te ia" (Mataio 4:19, 20; Luka 5:11; tagai foi i le Mareko 1:17-18).

Sa ou mafaufau i le faataitaiga lenei i le tele o taimi a o ou mafaufau ia i latou o e tutu i le ulu o le Ekalesia ua tali atu ma le faatuatua e tali tutusa i le valaaulia e "mulimuli mai ia te au." E pei o le Ekalesia anamua, e taitaia Le Ekalesia a Iesu Keriso o le au Paia o Aso e Gata Ai e ala i le perofeta ma aposetolo, o e ua tuua a latou upega ma a latou galuega na faigata le mauaina ma atiina ae ni tomai fou ina ia mafai ona auauna atu ma mulimuli i le Matai.

Taitai i Tagata

O le a le uiga o le avea ma “faifaiva i tagata”? I Ana upu faigofie o le valaaulia o Aposetolo anamua, na faalau-iloa mai ai e le Faaola le mea o le a avea ma Ana aoaoga masani ma mamana—aoao atu i faataoto. Sa ia iloa o i latou ua valaauina e mulimuli ia te Ia o le a malamalama, i se tulaga, i Lona uiga o upu “faifaiva i tagata.”

Na aoao mai Peresitene Harold B. Lee (1899–1973), “Ina ia avea ma ‘faifaiva i tagata’ o se isi lava ala o le faapea ‘avea ma taitai i tagata.’ O lea la i le gagana i le taimi nei tatou te faapea atu . . . : ‘Afai tou te tausī i a’u poloaiga, ou te faia outou ma taitai i tagata.’”¹

O se taitai i tagata o se tasi ua valaauina e fesoasoani i isi ia avea ma “soo moni o . . . Iesu Keriso” (Moronae 7:48). *Tusitaulima 2: Taitaiina o le Ekalesia* fai mai, “Ina ia faia lenei mea, e taumafai muamua lava taitai ia avea ma soo faamaoni o le Faaola, e ola i aso taitasi ina ia mafai ona latou toe foi atu e nonofo i le afioaga o le Atua. E mafai ona latou fesoasoani i isi e atiina ae ni molimau malolosi ma faalatalata atili atu i le Tama Faalelagi ma Iesu Keriso.”²

O tagata uma o e ua taliaina le valaauga e taitai i le Ekalesia ua taliaina le valaaulia a le Faaola ina ia avea ma faifaiva i tagata.

Upega ma Aufono

Mai le tulaga aupito maualuga o le taitaiga i le Ekalesia i le korama a le Perisitua Arona ma au

peresitene o vasega o Tamaitai Talavou, ua faatulagaina taitai i aufono. Ua faatonuina taitai e saunia faaleagaga, auai atoatoa i aufono, auuina atu i isi, aoao atu le talalelei a Iesu Keriso, ma taitai le perisitua ma faalapotopotoga a ausilali o le Ekalesia. E le gata i lea, ia fausia le lotogatasi ma le toafilemu i le Ekalesia, saunia isi e avea ma taitai ma faiaoga, faamatuu atu tiutetauave, ma faamautinoa le tali atu.³

E pei lava ona faaaogaina e Aposetolo anamua lo latou iloa i le fagota e avea ma tagata faifaiva i tagata, e mafai ona tatou faaaogaina mataupu faavae o loo maua i lo latou faaaogaina o upega i aufono a le Ekalesia. E pei o se upega, o nei aufono e faatulagaina ma saunia e faapopototo mai fanau a le Tama Faalelagi—o tagata taitoatasi o le aufono e pei o se manoa taua ma le autu o le upega. E pei lava ona aoga se upega pe afai ua lelei ona fonofonoina, e faapena foi a tatou aufono e faavaivai pe afai o tagata o le aufono e le o faatulagaina, taulai atu, ma faagaioioia pei ona tatau ai.

E mulimuli taitai o aufono i le faaitaiga a le au faifaiva Aposetolo anamua i le siakiina e le aunoa ma suiina nei “upega.” E faia e taitai o aufono lenei mea i le tuuina atu soo o aoaoga, taitai i fonotaga a aufono, tuuina atu ni manatu faaalii i taimi uma ma le talafeagai i tagata o le aufono, ma ofoina atu le alofa, faamalosiaga, ma le viiga. E leai se mea e suitulaga mo le malosi atoatoa ma le faapotopotoina gafataulimaina o aufono o loo lelei le faatautaia.



O Le Aufono a le Uarota

Atonu o le aufono o loo i ai le avanoa sili e uunaia ai tagata taitoatasi o le Ekalesia o le aufono a le uarota. O alii ma tamaitai i lenei aufono ua valaauina moni lava e avea ma faifaiva i tagata ma le tofiga e taitaia o le galuega o le faaolataga i le uarota, pe a faatonuina ai e le epikopo. Latou te nonofo ma auauna atu i a latou lava uarota, lea e mafai ai ona latou iloa ma fegalegaleai ma i latou ua valaauina i latou e taitaia.

“O tagata o le aufono a le uarota e taumafai e fesoasoani i tagata taitoatasi e fausia ni molimau, maua sauniga faaola, tausia feagaiga, ma avea ma soo faapaiaina o Iesu Keriso (tagai i le Moronae 6:4–5). O sui uma o le aufono a le uarota ua i ai se tiutetauave aoao mo le manuia o tagata o le uarota.”⁴

O sui o aufono a le uarota e i ai se matafaioi taua i le faanatinati o le galuega o le faaolataga. Pe afai o le aufono a le uarota e le o galulue e pei ona tatau ai, e faatelegeseina le galuega. E tuutiitia ai le malosi o le faapotopotoina o le “upega”, ma o taumafaiga a le aufono e maua mai ai ni taunuuga faatapulaa. Ae afai o le aufono a le uarota o loo faatulagaina ma taulai atu i le faamalolosia o tagata taitoatasi ma aiga, e mafai ona ofoofogia taunuuga.

Ou te masani i se uarota na tauivi ma se aufono e le o aoga a le uarota. Sa faigata mo le epikopo le taliaina o le taitaiga o loo maua i le *Tusitaulima 2* aua sa lagolelei ona ala ma sa fiafia i lana mamamu tuai. Ina ua mavae le tele o fautuaga ma aoaoga a se peresitene alofa o le siteki, e ui i lea, o le epikopo na faamaluluina lona loto, salamo, ma amata ona gauai e faatulaga le aufono a le uarota e pei ona faatonuina. Sa ia matamata i vitio faaleaoaoga e maua i le LDS.org, sa ia faitau i vaega 4 ma le 5 o le *Tusitaulima 2*, ma sa ia galue ai i mea sa ia aoaoina.

Sa vave ona taliaina e sui o le aufono a le uarota suiga, ma sa i luga o i latou le agaga o le alofa ma le lotogatasi a o latou taulai atu i le faamalolosia o tagata taitoatasi ma aiga. I fonotaga taitasi, latou te saunoa umi e uiga i le tagata sailiili, tagata fou liliu mai, tagata ua le toaaga, ma tagata o i ai manaoga. Sa amata ona faalatalata atu o latou loto i nei uso ma tuafafine, ma amata ona tutupu mai vavega.

Na lipoti mai e le epikopo toetoe lava i le taimi lena na amata ai nei suiga na faia i le aufono a le uarota, sa amata ona o mai i le lotu tagata sa leiloloa ma le toaaga mai. Na fai mai nei tagata na faafuasei lava ona uunaia e toe foi mai i le Ekalesia. Sa fai mai i latou na maua se uunaiga manino



AUAI MA AU

“I le taimi o le galuega a le Matai, sa la valaau atu ai i faifaiva i Kalilaia e tuu a latou upega ae mulimuli atu ia te la, ma tautino atu, ‘Ou te faia oulula ma faifaiva i tagata.’ Sei o tatou auai faatasi ma au faifaiva o alii ma tamaitai, ina ia mafai ona tatou tuuina atu soo se fesoasoani tatou te mafaia.”

Peresitene Thomas S. Monson, “O Lo Tatou Tiutetauave le Laveai,” *Liahona*, Oke. 2013, 4.

ma le malosi e tatau ona latou toe mafuta faatasi ma le Au Paia. Sa latou iloa o le a alofagia i latou na latou manaomia le lagolago o le a tuuina atu e tagata.

Sa faasoa mai e le epikopo ua ia mautinoa sa faatalitali mai le Tama Faalelagi mo ia e mulimuli i fautuaga na ia mauaina ma faatulaga le aufono a le uarota e pei ona faatonuina ai o ia a o lei mafai ona Ia tuu le manao i totonu o loto ma mafaufau o nei tagata ua le toaaga mai ina ia toe foi mai i gaoioiga i le Ekalesia. Sa iloa e le epikopo, sa ia manaomia ona fatuina se siosiomaga alofa, ma le faafaileleina sa manaomia e nei tagata a o lei toe taitaiina mai i latou e le Agaga. Sa faamanatu mai e ana upu le aafiaga o Peteru le faifaiva:

“Ona maliu ane lea o [Iesu] i le tasi vaa, o le vaa o Simeona, ma faatoga atu ia te ia ia faaititi atu le vaa nai le auvai. Ona nofo lea o ia i lalo, ma aoao atu nai le vaa i le motu o tagata.

“Ua uma lana lauga ona fetalai atu lea o ia ia Simeona, Ina tuutuu atu ia i le loloto, ma ia tuu ifo ai a outou upega e maua ai ni ia.

“Ua tali mai Simeona ua faapea mai ia te ia, le Alii e, ua atoa le po ua tigaina ai i matou, e leai ni mea ua maua: a ona o lau fetalaiaga ou te tuu ifo ai le upega.

“Ua uma ona latou faia o lea mea, ona latou siomia ai lea o le au ia tele lava” (Luka 5:3–6).

A o tatou faalogo ma mulimuli i le fautuaga na tuuina mai ia i tatou e ala i le perofeta o ona po nei, tagatavaai ma talifaaaliga—o “faifaiva i tagata” moni—ma a o tatou siakiina ma suisuia a tatou upega a o galue ai, o lo tatou malosi e faanatinatiina le galuega o le faaolataga o le a matua faateleina ma o le a avea i tatou ma meafaigaluega i aao o le Tama Faalelagi e faapotopototo Lana fanau. ■

FAAMATALAGA

1. Harold B. Lee, i le Conference Report, Oct. 1960, 15.
2. *Tusitaulima 2: Taitaiina*

o le Ekalesia (2010), 3.1.

3. Tagai i le *Tusitaulima 2*, 3.2; 1–5; 3.3.2–4.
4. *Tusitaulima 2*, 4.4

O A'U FUALAAU SUAMALIE [PEACHES] UA PAPA

Sa ou manatu o au o se matua atoa-toa . . . seia oo ina maua ni fanau.

Mo au, o le tulaga faamatua o se afi faamama a le tunu auro. O o'u vai-vaiga e foliga mai e faatitino pe a ou lagona le atuatuvaile, le lava le moe, popole, po o le le fiafia. O le mea moni, o faamanuiaga o le tulaga faamatua e tauia ai na taimi, ae ua ou iloa e maua au i le maitaita. E maasiasi e tautino atu, ae sa masani ona ou ee atu pe tau'ai lau fanau ina ia faalogo mai.

Ou te faia se faaiuga mai lea taimi i lea taimi o le a ou le toe ita, ae e oso lava i taimi o le popole. Na iloa e le Tama Faalelagi ou te manaomia se mea maoae e fesoasoani ai ia te au.

I se tasi afiati ina ua mavae se aso o le tuufaguina o fualaa suamalie [peaches], sa ou tuuina atu le vaega mulimuli ma filifili e fai se malologa puupuu. Sa ou mautinoa o le a ou ala ae i le taimi e aveese ai fagu mai le ogaumu faaasu.

Ou te lei ala.

Sa faateia i maua ma lo'u toalua, o Quinn, i le leo o fagu ua papa. Sa ou tamoe atu i le umukuka ma vaaia ni tioata taei ma fualaa suamalie pipii [peaches] ua pipii solo i vaega uma o le potu. O le mea moni lava, sa liuaua uma le vai o le ogaumu faaasu, sa faateleina le vela ma le ea, ua fiki ese ai le pito i luga o le ogaumu faaasu, ma ua papa ai fagu e ono mai le fitu o fualaa suamalie [peaches].

"Ou te manatu o le a ou faamamaina lenei gasu i le taeao," sa ou fai atu ai.

Manatu sese.

E oo atu i le taeao o fualaa suamalie [peaches] vela pipiii ua malo ma avee ma faaputuga tioata ua malo, ma faatumulia ai uma le umukuka ma le

potu malolo. O fasi tioata malo o fualaa suamalie [peaches] ua salalau solo ua oo atu lava i tua o masini i le laulau ma soo se avanoa lava e mafai ona oo i ai, e aofia ai tua atu o le pusa aisa.

Na tele ni nai itula na faamama ai. Sa ou faasusuina faaputuga o tioata ua faatumulia i fualaa suamalie i solo pepa susu ona taumafai lea e solo ese e aunoa ma le faamanu'aina o au lava ia.

A o ou faamamaina, sa musumusu mai ia te au se leo masani: "Maria,

pe a pa lou ita, e pei ona faia e nei fagu, e le faigofie ona e toe faaleleia. E le mafai ona e vaai po o gafea pe o faapefea e le ita ona faatiga i lau fanau ma isi. E pei o lenei gaogaosa, o lena tiga e vave ona malo ma e tiga tele."

Na faafuasei lava, o le galuega faamama ua i ai se uiga fou. O le lesona sa matuai mamana lava. E pei o lou ita, sa leai se faamama vave. O vaiaso mulimuli ane sa ou maua ai pea tamai

Sa ou tamoe atu i le umukuka ma vaaia tioata taei ma fualaa suamalie pipii i luga o vaega uma o le potu.





ATA NA TUSA E BRADLEY H. CLARK

PE NA TATOU FAIA LE MEA SAO?

luuga o fualaau suamalie e pei oni papa ala o loo maumau ai tioata.

Ou te tatalo o le a i ai se aso o le a avea ai lou onosai ma se malosiaga maoae e pei ona sa i ai o se vaivaiga. I le taimi nei, ou te faafetai o loo fesoasoani mai ia te au le Togiola a le Alii ia sili atu ona pulea lo'u ita ina ia mafai ona ou faasoina e pele ia te au mai i soo se faatafugaga e mafua mai i le ita ua pa. ■

Mary Biesinger, luta, ISA

Sa avea au o se tusitala lauiloa lea lelei ma nusipepa i Lima, Peru, ae o lo'u ituaiga olaga—mamao ese mai le Atua—sa faateleina ai le faatiga i lou mafaufau i aso taitasi. Ona o lenei mea, sa ou taliaina ai se galuega i le avea ai ma se siakifaitau mo se mekasini i le Itu o Ventanilla, e mamao ese mai lo'u aiga. Sa matuai ou sailia se auala e alu ese ai mai lo'u li'o o uo i lena taimi. I Ventanilla, sa ou lagonaina i lo'u loto o le a suia lo'u olaga.

Sa i ai taimi ma te o ai i le lotu ma lau uo teine, o María Cristina, ae e uunai au e ni faifeautalai se toalua lelei, ma finafinau e ole atu i le Tama Faalelagi i le tatalo pe moni le Ekalesia. Sa ou faia lena mea, ma o le mea na ou lagonaina sa le mafaamatalaina. Ou te'i lagonaina muamua se malosia naua o le Agaga e pei o lena aso e le mafaagaloina.

Na faaipoipo ma papatisoina i se taimi puupuu mulimuli ane, sa ma lisiina se tamai potu, e le lelei i Ventanilla ma María Cristina. Ona o lo'u galue malosi, sa ou siitia ai mai le siakifaitau i le faatonu o le mekasini ma le nusipepa a le kamupani. Ou te lei faatonu muamua lava, ae sa ou fiafia i le tofiga. E ui i lea, na amata ona suia mea uma ina ua fai ifo i lalo le tulaga faatonuina o a matou lomiga, i le lolomiina o aitema e fesiligia le tulaga mama. O nei suiga, sa faatonuina e o matou faatonu, na feteenai ma mataupu faavae o le Ekalesia ma tulaga faatauaaina.

Sa ou mana'o lava e avea ma se faatonu, ae o le tulaga na ou le to'a

lelei ai. Na fautua mai lo matou epikopo pe afai tatou te faia mea e fiafia ai le Tama Faalelagi, o le a Ia faamanuiaina i tatou. Ina ua uma ona ma talanoa ma lo'u toalua ma tatalo e uiga i lena mea, na ma lagona le uunaiga ua tatau ona ou faamavae i la'u galuega.

I ni nai aso mulimuli ane, sa amata ona ou lagona le lotovaivai ma mafaufau pe sa ou faia le mea sao. Ina ua uma ona ou faamavae, sa ou auina atu au tusi talosaga i ni nai kamupani ae sa leai se tali mai. Sa fautua mai María Cristina ma te toe tatalo, ma sa ma faia lena mea. Sa ma tatalo ina ia lelei mea uma ma ia aua nei vaivai lo ma faatuatua e ui lava ina sa faateleina pili.

I ni nai itula mulimuli ane na faa-malosiau mai lo'u toalua e valaau i se tasi o kamupani. Sa fai si lē talitonu, ae sa ou valaau. Sa ou maofa ina ua fai mai se taitai iina o lae toetiiti lava valaau mai ia te au. Sa mana'o ia e iloa pe mafai ona ou amata i le aso na sosoo ai!

Sa ma fetagisi i le olioli. Sa tali mai lo tatou Tama Faalelagi i a ma tatalo.

Sa tatau ona ma tuua le matou uarota ma le tele o uo lelei mo la'u galuega fou, ae na ma tuua faatasi ma ni molimau malolosi atu. Ua ou mauaina nei se galuega faaaloaloga ma se totogi lelei, ma ua matou maua se nofoaga manaia e nonofo ai. I mea uma, ua faamanuiaina i matou ma le ma'utinoa pe a tatou faia mea e fiafia i ai le Atua, tatou te maua Ana faamanuiaga. ■

Carlos Javier León Ugarte, Lima, Peru

OU TE ALOFA IA TE OE

A o faasolo ina faaii le matou konafesi faalesone, sa ou tu i fafatu ma tau mafaufau faapea, “O le a lau mea o loo fai i lenei atunuu ese? O le a faapefea ona ou faia mea uma ua faamoemoe mai ia te au?”

Sa ou i ai i Sicily, Italia, mo le silia laitiiti i le vaiaso, ae o lea ua ou lagonaina le lotovaivai. O lo’u taimi i le nofoaga autu e aoao ai faifeautalai sa foliga mai e pei o se miti matagofie, ae ona o lo’u le atoatoa, ua ou lagonaina nei ua pei o loo ou i ai i se miti taufaafefe.

“Tama pele e,” sa ou tatalo ai, “sa ou manao e avea ma se faifeautalai maoae. O lenei ua ou i ai iinei, ua ou iloa e leo ia te au ni taleni, tomai, po o le atamai e faataunuu ai mea na auina mai au e fai. Sa ou manatu sa ou iloina lenei

gagana, ae o tagata uma e vave le latou tautatala, ma o soo se upu ou te taumafai e fai atu e pei lava e lavelavea i lo’u laulaufaiva. Ou te manatu e le fiala la’u soa ia te au. O la’u peresitene o le misi-ona e tau le iloa tautala faa-Peretania. Ou te le maua se tasi e talanoa i ai. Faamolemole, fesoasoani mai ia te au.”

Sa ou iloina e tataua ona ou toe foi atu i totonu, ae sa ou tutu ai pea i le auala mo ni nai minute. Na faafuasei lava ona ou lagonaina le toso faatolu i tua o lo’u pelae. Sa ou faliu ma iloa ai se teineitiiti laitiiti aulelei ma tootuli lemu ifo ai i ona autafa i luga o le auala maa. Sa ia opoina lou ua i ona lima ma musumususu mai i lo’u taliga, “*Ti voglio bene.*”

“O le a lau tala?” Sa ou tali atu i le

gagana Peretania, ma le iloina atoatoa lelei na te le malamalama ia te au.

Sa ia sioa mai i lau pine. “Sorella Domenici,” sa ia faitauina, “ti voglio bene.”

Sa ou iloa le uiga o le fuaitau. O se tasi o fasifuaiteu muamua na matou aoaoina i le avea ai ma faifeautalai. O se fuaitau e mafai ona tautala sa’o atu i le agaga. O lona uiga, “Ou te alofa ia te oe.”

O na upu na o le pau lea o le mea sa ou fia faalogo i ai i lenei taimi. Na auina mai e le Faaola se avefeau faapitoa e momoli mai ia te au. Sa ou taitai atu ai le teineitiiti laitiiti i totonu o le fale.

“Masalo o se tama a se tasi o tagata o le ekalesia,” sa ou mafaufau ai. Sa ou faaofiofi atu i vaega o faifeautalai, ma le faamoemoe o le a iloa mai o ia e lona tina.

Ina ua ou maua la’u soa, sa ou fesili atu, “Na e vaai muamua i lenei teineitiiti?”

“O le a le teineitiiti?” sa ia tali mai, ma foliga le mautonu.

Sa ou tilotilo ifo i o’u autafa. Ua leai se teineitiiti.


Sa ou tu i le faitotoa na matala o le fale ma tilotilo i luga ma lalo o le auala gaogao. A o ou mafaufau loloto, o se musumususu sa le gata ina sa ou faalogoina ae sa lagonaina foi leotele mai i lo’u agaga: “Sorella Domenici, ti voglio bene.”

Sa ou le iloa po o ai le teineitiiti, ae na ou iloina e alofa le Faaola ia te au. ■

Natalee T. Frstrup, Iuta, ISA

Sa ou faliu ma iloa ai se teineitiiti laitiiti aulelei ma tootuli lemu ifo loa i ona autafa i luga o le auala maa.





O le aoauli na sosoo ai sa uunaia au e ave le meaai na ou kukaina mo le aiga o le afiafi ia Sister Morgan ma lana tane mo lo laua aso faailogaina.

PE UA FAATAUVAA TELE LAU MEAAI?

M o le lua tausaga, sa ou faiaoga asi-asi i se tuaoi ma o se uo e igoa ia Sister Morgan. Sa na o ni nai sefulu tausaga e matua ai ia te au, o lea sa ou aoaoina ai le tele o mea mai ia te ia ma lona olaga a o ia faia foi mai i a'u savali o faiaoga asi-asi.

A o avea au ma ana faiaoga asi-asi, na iloa ua maua Sister Morgan i le kanesa. Sa ou maofa i le auala sa ia onosaia ai ona togafitiga faafomai i le lototoa ma toetoe lava o taimi uma e i ai se ataata i ona foliga.

I se tasi taimi o la'u asi-asi, sa ia ta'u ai o le aso o le a sosoo ai o le faamanatuga o lana faaipoipoga. Na vave ona oo atu le ma talanoaga i isi mea, ma iu ai le ma asi-asi.

O le aoauli na sosoo ai sa uunaia au e ave le meaai na ou kukaina ia Sister Morgan ma lana tane mo lo laua aso faailogaina. I le taimi muamua na ou le amanaiaina le musumusuga, ona sa ou kukaina se meaai o se aso masani o le vaiaso. E moni lava o lea ituaiga meaai faatauvaa o le a le sa'o mo se aso faailogaina faapitoa faapea.

Ae e lei tuua au e le uunaiga. Sa ou vili i lo'u toalua i le galuega, ma le faamoemoe o le a ia ioe mai faapea o le manatu o se manatu leaga. Nai lo o lena, na ia faamalosiaina au e valaau atu Sister Morgan ma ta'u atu i ai o lea au ou aumaia se aiga o le afiafi.

O lou maasi i la'u meaai faatauvaa ma le mea na ou manatu o se amio faamaualuga ia te au lava ia na taofia au mai le valaau atu i lau uo, ae na le mafai ona ou aveesea le lagona e tataua ona ou faasoa atu i la'u aiga o le afiafi. O lea na ou tuu ai le meaai i se ipu ma savali atu loa ma le popole i le isi ituala.

A o ou ulu atu i lo la fanua, sa ou maua Uso ma Tuafafine Morgan ua feosofi i le la taavale. Sa ou faailoa atu sa ou aumaia se aiga o le afiafi mo lo la aso faamanatuina ma na ou faamoemoe e le afaina ia i laua.

Sa oo ane se ataata i foliga o Sister Morgan. Na ia faamatala mai ua la faia se faaiuga e faamanatuina lo la aso faailogaina i se faleaiga e vave le kuka i le lotoifale ona o ona togafitiga o le kanesa ua matuai vaivai ai o ia e kuka

pe o foi i se isi lava mea. Sa foliga fiafia o ia ua mafai ona nofo i le fale mo le taumafataga o le afiafi.

O se lagona ua faamamaina ma le fiafia na ufitia au a o la taliaina la'u meaai faatauvaa.

E le sili atu nai lo le lua masina mulimuli ane, faatoa uma lava ona faamaea togafitiga o le kanesa o Sister Morgan, na maliu lona toalua pele, mai se gasegase faafuasei. O le la aso faailogaina i le na o le lua vaiaso na muamua atu o lo la aso mulimuli lena.

Sa ou aoaoina i lena taumafanafana e uiga i le mulimuli i le leo itiiti ma le filemu o le Agaga i le auauna atu i isi. O le auaunaga ua poloaiina ai i tatou—po o le musuia—e tuuina atu e mafai ona lē lagolelei, le talafeagai, po o le faigofie i o tatou mata, ae atonu o le mea tonu lava lea e manaomia. O lena aafiaga na ou lototoa ai e auauna atu i soo se tulaga e manaomia ai au e le Alii, ma na faateleina ai lo'u faatuatua e faia “le galuega a agelu” (“Galulue e Pei o ni Uso i Siona,” *Viiiga*, nu. 196). ■

Jennifer Klingonsmith, luta, ISA



FAALAGOLAGO I LE Faamautinoaga A LE ALII

**Atonu e le mafai
ona laveaiina i tatou
i taimi uma mai o
tatou tofotofoga,
ae a o tatou saili le
faamautinoaga a le Alii,
e mafai ona tatou iloa
o mea uma e lelei e oo
lava i taimi o faigata.**

Saunia e Mindy Anne Leavitt

Mekasini a le Ekalesia

Sa ou nofo i le potu selesitila o le malumalu, ma mafaufau i le ala o loo i ai lo'u olaga—e moni lava sa se ese mai le ala na ou fuafuaina. E pei o le toatele o isi talavou matutua, o popolega ua faatumulia ai lo'u mafaufau: e faapefea ona mafai ona ou faapaleniina ni

togi lelei ma se olaga faaagafesootai? E tatau ea ona ou le toe faigaluega? saili se galuega lona lua? E faapefea ona mafai ona ou faasaoina se tupe pe afai e leai ni au tupe? Aisea ua ou le faaipopo ai? Na alu pea lava pea le lisi. Sa ou alu i le malumalu e saili se faamafanafanaga, ma tatalo mo le faamautinoaga o loo i ai lo'u olaga i lima o le Tama Faalelagi. “Pe o le a lelei mea uma i lo'u olaga?” Sa ou fesiligia. O le tali na oo vave mai ma le mautinoaga i lo'u mafaufau: “Ua lelei *mea* uma.”

Sa ou malamalama i lene taimi, e ui lava sa le sologa lelei lo'u olaga e pei sa ou fuafuaina, o lea lava sa ogatusa ma *Lana* fuafuaga ma o Ia sa puleaina. O lene faamautinoaga matagofie o loo Ia silafia ma tausia au, e tusa lava pe Na te le aveesea o'u tofotofoga, na fesoasoani ia te au i le tele o puapuaga. A o tatou maua le malamalama, saili, ma faatalitali mo nei faamautinoaga, e mafai ona tatou iloa e lagolagoina i tatou e le Alii i avega ua tuuina i o tatou luga.

O le faamautinoaga ae le o le Laveaiga

E manino lava, o le vave aveeseina mai o tatou tofotofoga e le o le tali masani lea a le Alii i a tatou aioiga. Nai lo o lene, e mafai ona Ia faamanuiaina i tatou i ni taimi taua o le faamautinoaga e ala i faaaliga faaletagata lava ia—le faamautinoaga o Ia o lo o taialaina o tatou olaga, ma o le a laveaiina i tatou mai o tatou tofotofoga. O nei faamautinoaga atonu e le mafai ona laveaia i tatou mai o tatou tofotofoga, ae atonu o le a aumaia ia i tatou le malosi tatou te manaomia e laveai ai i tatou lava, e tusa lava pe o lene laveaiina ua na o le faamafanafanaga a le Agaga Paia. Ua ou matauina le tele o faataitaiga i tusitusiga paia o auala na auina mai ai e le Alii le faamautinoaga a o lei laveaiina.

A o taitaia e Helamana ana fitafita talavou e 2,060 ma isi au a sa Nifae, na latou maua se faamautinoaga a le Alii. Ina ua mavae le tele o masina o faatalitali mo meaai ma le faaopoopo mai o le autau, na toeitiiti lava faaumatia i latou i le fiaai ae taunuu mai loa ni meaai ma se vaega toalaite o alii. I le

fefefe ona o lenei faaopoopoga laitiiti e le lava, na iu ina latou liliu atu i le Alii ma “sa sasaa atu ai o [latou] agaga i le Atua i le tatalo, ina ia faamalosia e Ia [i latou] ma laveai [i latou].” Ina ua uma ona latou tatalo, na toe taua e Helamana, “sa oo ina asiasi mai le Alii lo tatou Atua ia i matou ma ni tautinoga o le a ia laveaiina i matou; ioe, sa oo ina ia fetalai mai le filemu i o matou agaga, ma tuu mai ia te i matou le faatuatua tele, ma faatonu i matou ia matou faamoemoe mo le laveaiga mai ia te ia” (Alema 58:10–11). O nei faamautinoaga na tuuina atu ia Helamana ma lana autau le malosi e onosai ai ma manumalo i o latou fili.

Na maua foi e Iosefa Samita se faamautinoaga a le Alii a o faafalepui-puiina i le falepui-pui o Liperate. A o ia tatalo faatauanau, sa tauina atu ia te ia:

“Lo’u atalii e, ia filemu lou agaga; o lou tiga ma ou puapuaga o le a nao sina minute laitiiti;

“Ma ona oo lea, afai e te talitalia lelei, o le a faaeaina oe e le Atua i luga; o le a e manumalo i ou fili uma” (MF&F 121:7–8).

O lenei faamautinoaga na maua ai e Iosefa le lototoa ma le malosiaga e faaauau ai i faigata na toetiiti lava vaivai ai.

I nei faataitaiga ma le tele o isi (tagai, mo se faataitaiga, Mosaea 24:8–16), e lei laveaiina vave e le Alii le au faatuatua mai o latou tofotofoga i le taimi lava lena. Nai lo o lena, sa ia asiasi atu ia i latou i le *faamautinoaga* o le a *Ia* laveaiina i latou i Lona lava taimi. O nei faamautinoaga, e faaaoaga ai le upu a Elder Richard G. Scott o le Korama Aposetolo e Toasefululua, e pei o “le malamalama faaleagaga” e tuu e le Tama Faalelagi i o tatou ala



O LE MAUTI-NOA O LONA MANA

“E tatau lava ona tatou feagai uma ma se puapuaga.

Na aoao mai ia Peresitene Henry B. Eyring: “O le a faamafanafanaina i tatou pe a tatau ona tatou faatalitali i le tiga mo le faamafanafanaga na folafola mai e le Faaola aua ua la silafia, mai i le mea na oo i ai, le auala e faamaloloina ai ma fesoasoani ai ia i tatou. Ua aumai e le Tusi a Mamona ia i tatou le faamautinoaga patino o Lona mana e faamafanafanaina ai. O le faatuatua foi la i lona mana o le a tatou maua ai le onosai a o tatou tatalo ma galulue ma faatalitali mo le fesoasoani.

Peresitene Henry B. Eyring, Fesoasoani Muamua i le Au Peresitene Sili, “Puapuaga,” *Liahona*, Me. 2009, 24.

“e faasusulu ai o [tatou] ala.”¹ O nisi taimi o lena faamautinoaga e pau lea o le mea tatou te manaomia e onosai ai i tofotofoga, i le iloaina o le a i ai se laveaiga mulimuli ane.

Sailia o Faamautinoaga

E faigata le olaga. E i ai taimi pe a tatou fesiligia, pe a leai so tatou talitonuga ia i tatou lava ma lo tatou malosiaga e manumalo ai i puapuaga, pe leai so tatou faamoemoe. E masani ona lagonaina e pei o o tatou tofotofoga o le a le muta lava. Ma e ui lava e oo mai nisi faamautinoaga e le ala mai i se taumafaiga i la tatou vaega, ae o le

tele o taimi e manaomia lo tatou sailia o na faamautinoaga o loo tau maia ia i tatou o le a i ai lava le laveaiina mai o tatou tofotofoga.

E masani ona oo mai faamautinoaga a le Alii e ala mai i le siufofoga o Ana auauna: taitai i le lotoifale, faiaoga o le inisitituti ma le Aoga Sa, aemaise lava Ana perofeta ma aposetolo. Sa faamanatu mai e Carol F. McConkie, fesoasoani muamua i le au peresitene aoao o Tamaitai Talavou, ia i tatou e “i a latou upu tatou te faalogoina le siufofoga o le Alii ma tatou te lagona ai le alofa o le Faaola.”²

O nei foi faamautinoaga e ala mai i le leo o le Agaga a o tatou talanoa faamaoni ma le Tama Faalelagi e ala i le tatalo faatauanau, a o tatou faitau ma mafaufau loloto i tusitusiga paia, a o tatou auai atu i le malumalu ma a tatou sauniga Lotu, a o tatou auauna atu i isi ma taumafai e fai le mea sa’o. I se faapuupuuga, o faamautinoaga a le Alii e oo mai pe a tatou “saili ia te ia ma o [tatou] loto atoa, ma o [tatou] agaga atoa” (Teuteronomie 4:29) ma usiusitai i Ana poloaiga.

Na maua e Helamana ma ana autau se faamautinoaga ina ua mavae le tele o tatalo faamaoni; na maua e Iosefa Samita se faamautinoaga ina ua maea ona tatalo ma mafaufau loloto. I tulaga uma e lua, na suesue e le Alii lo latou onosai ma le faatuatua a o lei tuuina mai se faamautinoaga—o se faamanatu lelei i taimi o tofotofoga e tatau ona tatou pipiimau pea i lo tatou faatuatua ma faatinoina le onosai.

Faatalitali mo Faamautinoaga

E pei foi o isi suega o le onosai, o le faamautinoaga a le Alii atonu

e le oo mai i le ala ma le taimi tatou te faamoemoeina. Atonu e tatau ona tatou tatalo ia i ai ni “mata e vaai” (Esekielu 12:2) o le aao o le Alii ma Ana faamautinoaga i o tatou olaga. Na saunua Elder David A. Bednar o le Korama a Aposetolo e Toasefululua i auala e mafai ona aofia ai i nei faamautinoaga le alofa mutimutivale o le Alii ma fai atu, latou te “le soona tutupu pe faafuasei foi. O le faatuatua, ma le usiusitai e mafai ai ona tatou maua nei meaalofo taua, ma, e masani lava e oo mai le alofa mutimutivale o le Alii i taimi e fesoasoani ai ia te i tatou e tau fai iloaitino ma taliaina ai.”³

E masani lava, o le faatalitali mo le laveaiga po o se faamautinoaga o le laveaiina e manaomia ai le onosai sili atu nai lo le mea tatou te manatu ua tatou maua. Atonu e mafai ona tatou feagai ma ni tofotofoga ogaoga a o le mauaina soo se ituaiga o faamautinoaga. E pei ona faamatala mai e Elder Scott, “o le malamalama faaleagaga” ua saunia e le Alii “e masani ona oo mai pe a mavae le malosi o le tofotofoga, o se faamaoniga o le alofa ma le agalelei o se Tama Na te silafia mea uma. Latou te faasino maia le ala i le fiafia sili atu, o se malamalama sili atu,

ma faamalolosia [tatou] naunautai e talia ma usiusitai i Lona finagalo.”⁴ A o tatou tumau faamaoni ma usiusitai e ala i o tatou tofotofoga, o le a oo mai faamautinoaga o le Alii o le a afio mai e fesoasoani ia i tatou e tumau pea e pei ona i ai.

O La Tatou Faamautinoaga Silisili

I le iuga, e tusa lava pe fia faamautinoaga tatou te maua faapea e silafia i tatou ma lo tatou tulaga e le Tama Faalelagi, o le a le lava lea e fesoasoani ia i tatou e tumau e oo i le iuga pe afai e leai so tatou faatuatua ma le faamoemoe ia Iesu Keriso. E ala i Lana Togiola, e mafai ona tatou maua ai le faamoemoe atoatoa o le a i ai se aso o le a laveaiina ai i tatou mai o tatou tofotofoga uma. E mafai ona tatou iloa foi o loo i ai lo tatou Faaola e alofa atoatoa ia i tatou, aua na “afio ifo o [ia] i lalo o mea uma, lea na malamalama ai o [ia] i mea uma” (MF&F 88:6). E malamalama o Ia i o tatou tofotofoga, ma o tatou faanoanoaga aua o Ia “[sa] mafatia ma tiga i puapuaga ma faaosoosoga o ituaiga eseese uma . . . ina ia mafai ona ia silafia . . . le ala e fesoasoani ai i ona tagata e tusa ma o latou vaivaiga” (Alema 7:11–12).

Na saunua mai Elder Jeffrey R. Holland o le Korama a Aposetolo e Toasefululua: “O le faamautinoaga silisili i le fuafuaga a le Atua, o lea sa folafola mai ai se Faaola, o se Togiola lea e ala i lo tatou faatuatua ia te Ia, o le a sii ae ai i tatou ma le manumalo i luga a’e o na faaosoosoga ma tofotofoga. . . . Ua na o le talispaiaina lava o le alofa paia lenei o le a muamua ai ona lavatia o tatou lava puapuaga ia e itiiti ifo i lo [ō Laua puapuaga], ona

O le “o afifi o le la susulu faaleagaga . . . e masani ona oo mai ina ua uma ona silisili ona ogaoga le tofotofoga, o se faamaoniga o le agaalofo ma le alofa o se Tama e silafia mea uma. Latou te faasino maia le ala i le fiafia sili atu.”

sosoo ai lea ma le malamalama i ai, ma mulimuli ai togiolaina.”⁵ O le aoao ia te Ia ma Lana Togiola o se faamautinoaga lava lena.

Ua Lelei Mea Uma

A o tatou malamalama, saili, ma faatalitali mo faamautinoaga mai le Alii, o le a latou oo moni mai lava. E tatau ona tatou manatua na taimi e le mafaatauina, tusi i lalo, ma mafaufau soo i ai. O le mea e aupito sili ona taua, e tatau ona tatou faalagolago i ai ma talitonu i ai, pei ona talitonu i ai Helamana ma ona tagata ma le Perofeta o Iosefa, o le a faataunuuina e le Alii folafolaga na Ia faia ia i tatou. Ua ia faamanatu mai ia i tatou na folafolaga e ala mai i Ana faamautinoaga, ma e ui lava e le mafai ona mou ese ai o tatou tofotofoga, ua mafai ona tatou iloa o le Tama Faalelagi o loo i ai faatasi ma i tatou e lagolago ma fesoasoani ia i tatou e ala mai i soo se mea.

Ina ua mavae lo’u aafiaga i le malumalu i lena aso, e lei faaitiitia o’u tofotofoga. E lei faafuasei lava ona ou maua ni togi atoatoa po o ni tupe e sili atu po o ni tafaoga faamasani se tele. Ae o le mea sa ou maua o se faamautinoaga tofilemu e faapea e ui lava i o’u tofotofoga, o le a ou le afaina aua o loo faamoemoe le Alii e tausia pea Ana folafolaga e laveaiina au. Faatasi ai ma lena faamautinoaga ua ou iloa ua *lelei* mea uma. ■

FAAMATALAGA

1. Richard G. Scott, “Faalagolago i le Alii,” *Liahona*, Ian. 1996, 17.
2. (Carol F. McConkie, “Ola e Tusa ma Upu a Perofeta,” *Liahona*, Nov. 2014, 77.
3. Tagai i le David A. Bednar, “O Le Alofa Mutimutivale o le Alii,” *Liahona*, Me 2005, 100.
4. Richard G. Scott, “Faalagolago i le Alii,” 17.
5. Jeffrey R. Holland, “Peiseai o se Ipu ua Nutilili,” *Liahona*, Nov. 2013, 40.



Saunia e Lena Hsin-Yao Cho

Sa ou tuua lo'u aiga i NanTze, Taiuani, e avea ma se faifeautalai faamisiona i Kalefonia i matu i le 2005. Sa laitiiti lava le eria no tofia i ai i maua ma lau soa ma i totonu o le fa ma le afa masina ua uma ona ma tuitui i faitotoa o auala uma i le eria autu o le taulaga. Sa faigata le galuega faafaifeautalai, ma o tagata sa masani ona feei mai ia i maua. Sa i ai ni nai ma tagata sailiili. Sa foliga mai ia te au o le galuega e leo agai i se mea. Ina ua mavae le fa masina iina, sa ou sauni e tuua le eria. Sa ou talitonu o le a ou siitia.

I le po o le aso Sa sa ou faatalitali i talaane o le telefoni seia oo ina valaau mai lo'u taitai sone. Ina ua ia lipotia mai ua tofia au e tumau ai i le eria lenei mo se isi ono vaiaso, sa ou le talitonu i o'u taliga. Sa ou mafaufau masalo ua i ai se mea sese!

O le vaiaso na sosoo ai o se mala lava mo a'u ma atonu na faapena lau soa ma tagata foi i lalo o le ma tausiga. Sa ou musu e talitonu o le filifiliga sa'o lea. Ae, ou te faia lava se ataata lapoa i soo se taimi lava ma te vaai ai po o le talanoa i tagata, ae o lo'u loto sa ou tumau i le le fiafia. I lo'u faamaualuga, sa faaaauau pea ona ou ta'u atu ia te au lava ia ou te leo i ai i le nofoaga sa tataua ona ou i ai. Sa ou moomoo pea o le a valaau mai la'u peresitene o le misiona e ta'u mai ia te au ua ou siitia ese atu i se isi eria.



Siitia

Ai ua fai e lau peresitene o le misiona se mea sese—o le a se mea ou te ono aoao mai i le nofo faaumiumi ai i lenei eria?

O le Ala na oo Mai ai se Faamautinoaga

O le taeao o le aso Sa na sosoo ai ao ou sauni ma le musua mo le lotu, sa tatagi le telefoni. O le peresitene o le misiona. Sa ia faafeiloaia a'u i lona leo agalelei masani, ma le agaalofa ma faapea mai, "Sister Cho, o ananafi i le aiga o le aoauli sa ou mafau fau ai ia te oe ma maua ai se lagona e tatau ona ou valaau atu ia te oe ma faailoa atu ia te oe o loo e i ai i le nofoaga sa'o. O loo e i ai i le mea e tatau ona e i ai." Sa maligi ou loimata ina ua ou faalogo i ana upu.

Sa ou faafetai atu ia te ia ma tuu i lalo le telefoni. A o amata ona ou tagi, sa oo mai ma le malosi i lou loto se lagona manino ma le mama faapea sa *i ai* ni tofiga e lei faataunuuna o loo faatalitali mai ia te au i la matou eria. Sa ou iloa foi e silafia e lo'u Tama Faa-lalagi ou mafau fauga ma lou le fiafia. Sa ia malamalama i lo'u vaivaiga, ma na Ia auina mai Lana auuina ina ia toe faamautinoa mai ia te au.

Ina ua mavae lona valaau i le telefoni, sa amata ona ou galue malosi loa. Sa ou tatalo mo le malosi i aso uma, ma ole atu ia sili atu ona manino le vaai pe faapefea ona mafai ona ou faia mea na faamoemoe le Alii ia te au e fai. I le lima vaiaso na sosoo ai, na ma molimauina ma lau soa ni vavega se tele a o ma faaoga-ina ia lava le faatuatua e galu-lue malosi ai. Sa siitia mai se tagata sailiili i totonu o le ma

eria ma na papatisoina i totonu o le taimi o lona siitaga.

Sa valaaulia foi i maua i totonu o fale o tagata o e na muai le taliaina i maua. Na matou feiloai i le toatele o tagata fou o e sa i ai ni faigata ma na faamanuiaina ai e faasoa atu ni upu faamafanafana a le Atua ma i latou. E ui lava e lei filifili nisi e papatiso i lona taimi, o le a ou le faagaloina lava o latou foliga susulu po o le ala na pai atu ai le Agaga ma le alofa o le Atua i o latou loto—ma a'u foi.

O le Mea Na ou Aoaoina

Sa ou aoaoina e silafia moni lava e le Alii i tatou taitoatasi; Na te le auina atu Ana faifeautalai i nofoaga e aunoa ma se mafuaaga. Sa ou aoaoina a tofia loa i tatou i se eria, e finagalo le Alii e faaoga iina i tatou o ni meafaigaluga e faataunuu ai Lana galuega. Pe a tatou tuuina i tatou lava i Ona aao, e tutupu vavega ma e faamaluluina loto, e tusa lava pe tatou te le vaai pe faapefea ona mafai lea mea.

O le mea taua, sa ou aoaoina o la'u peresitene o le misiona, e pei o isi taitai o le Ekalesia, sa valaauina moni lava e le Atua e avefa ma Ana auuina. E faaagavaaina e le Alii o tatou taitai e mauaina le faaaliga ma le musumusuga tatou te manaomia mo le manuia o o tatou agaga.

Ou te faafetai pea lava pea mo le aafiaga na oo mai o se taunuuga o le *le siitia ese.* ■

E alala le tusitala i Iuta, ISA.





**Saunia e Peresitene
Dieter F. Uchtdorf**

Fesoasoani Lua i le
Au Peresitene Sili

OLA AI *i se Lalolagi* TELEVAVE

Afai o le olaga ma lona saosasoa nanativale ma le tele o le atuatuvaale ua faafaigata ai ona e lagona le manao e olioli, ia atonu o se taimi lelei lenei e toe faatulaga ai mea e sili ona taua.

Pe i ai se taimi na e i ai i se vaalele ma na lagonaina se faafitauli? O le mafuaaga taatele o le faafitauli o le suia faafuasei o gaoioiga o le ea e mafua ai ona faatu i lalo, le vaalele, taumalua i autafa, ma taavilivili. E ui ina fausia vaalele ina ia tetee atu i faafitauli ia e sili atu nai lo soo se mea e te fetai ai i se faigamalaga masani, ae e mafai ona faapopoleina ai lava le pasese.

O le a sou manatu o a mea e fai e pailate pe a latou feagai ma ni faafitauli? Atonu e manatu se tagata aoga faapailate o le faateleina o le saosasoa o se fuafuaga lelei lea aua o le a vave ai ona o ese atu mai le faafitauli. Ae atonu o le mea sese lena e fai. E malamalama lelei pailate atamamai o loo i ai se saosasoa faatapulaaina o le a tuutiitia ai aafiaga le lelei o le faafitauli. Ma o le tele o taimi o lona uiga o le faaitiitia o le saosasoa. O le mataupu faavae lava lea e tasi e faatatau foi i patupatu i luga o se auala.

O lea la, o se fautuaga lelei le faalemu teisi, ia tumau pea i le ala, ma tulaui atu i mea e taua pe a feagai ma ni tulaga faigata.

O Le Saosasoa o le Olaga i Aso Nei

O se tasi o uiga o le olaga i aso nei e foliga mai o loo tatou gaoioi i se saosasoa faateleina, e ui lava ina tatou feagai ma tulaga le mautonu po o mea faalavefau.

Ia tatou faamaoni; e sili atu le faigofie o le pisi. E mafai ona tatou mafau-fau i se lisi o galuega o le a lofituina ai o tatou taimi faatulagaina. O nisi atonu foi e manatu o lo latou taua faaletagata lava ia, e faalagolago i le



Sootaga ma le Atua

umi o le latou lisi o mea e fai.

O e atamamai e tetee atu i le faaosoosoga e maileia ai i le pisi o le popolevale o le olaga i aso uma. Latou te mulimuli i le fautuaga “E

sili atu mea taua o le olaga nai lo le faateleina o lona saoa.”¹ E faapuupuū atu, latou te taulai atu i mea e sili ona taua.

Na aoao mai Elder Dallin H. Oaks, o le Korama a Apose-tolo e Toasefululua, “E ao ona tatou tuuese nisi o mea lelei ina ia filifili ai mea e lelei tele pe sili atu le lelei aua latou te atiina ae ai le faatuatua i le Alii o Iesu Keriso ma faamalolo-sia ai o tatou aiga.”²

O le sailiga mo mea e sili ona lelei e le maalofia le tau-nuu atu i mataupu faavae autu o le talalelei a Iesu Keriso—upumoni faigofie ma le matagofie ua faaalua mai ia i tatou e se Tama alofa, e faavavau, ma silafia mea uma i le Lagi.

E Faapefea Ona Mafai Ona ou Aoaoina le Mea e Sili Ona Tauga?

Ou te manatu o le toatele o i tatou e malamalama lelei i le taua tele o faavae. Pau lava le mea ona o tatou i nisi taimi e faalavelavea e ala i le tele o mea e foliga mai e sili atu ona faatosina.

O tusi e lolomiina, o ala o faasalalauga eseese e tele, o meafaigaluega faaeletonika ma masini faaeletonika—e aoga uma lava pe a faaoga tatau—e mafai ona avea ma ni maagao ogaoga po o nofoaga e le i ai se alofa o le tuua toatasi.

Ae i totonu o tele o leo ma filifiliga, o le Tamalii lotomau-lalo o Kalilaia o loo tu ma ona aao mafola, o loo faatalitali mai. O ia o se savali faigofie: “Sau, mulimuli mai ia te au” (Luka 18:22). Ma e le fetalai atu o Ia i se faaleotele leo ae i se leo itiiti ma le filemu (tagai i le 1 Tupu 19:12). E faigofie lava mo le savali autu o le talalelei ona leiloa i le malomaloa o faamatalaga o loo taia ai i tatou mai itu uma.

O tusitusiga paia ma afioga tulei a perofeta soifua e tuuina mai le faamamafa i mataupu faavae autu ma aoaoga

faavae o le talalelei. O le mafuaaga tatou te toe foi atu ai i nei mataupu faavae autu, i aoaoga faavae mama, aua o le faitotoa lea i upumoni e loloto le taua.

O Faavae: Sootaga Autu e Fa

A o tatou liliu atu i lo tatou Tama Faalelagi ma saili atu i Lona poto e faatatau i mea e sili ona taua, tatou te aoaoina pea lava pea le taua o sootaga autu e fa: ma lo tatou Atua, ma o tatou aiga, ma o tatou uso a tagata, ma i tatou lava. A o tatou iloiloina o tatou lava olaga ma se mafaufau naunautai, o le a tatou vaai ai i le mea na tatou se ese ai mai le ala e silisili ona lelei. O le a matala mata o lo tatou malamalama, ma o le a tatou iloa le mea e tauu ona fai e faamama ai o tatou loto ma toe faatulaga ai o tatou olaga.

Muamua, lo tatou sootaga ma le Atua e sili ona paia ma taua. O i tatou o Ana fanau. O Ia o lo tatou Tama. Ua finagalo o Ia ia tatou fiafia. A o tatou saili ia te Ia, a o tatou aoao i Lona Alo, o Iesu Keriso, a o tatou tatalaina o tatou loto i le uunaiga a le Agaga Paia, o o tatou olaga o le a sili atu ona mausali ma saogalemu. Tatou te oo i le filemu sili atu, olioli, ma le faamanuiaina a o tatou tuuina atu le mea sili e ola e tusa ai ma fuafuaga e faavavau a le Atua ma tausi Ana poloaiga.

Tatou te faaleleia atili la tatou sootaga ma lo tatou Tama Faalelagi e ala i le aoao ia te Ia, e ala i le fesootai ma Ia, e ala i le salamo i a tatou agasala, ma e ala i le mulimuli tui ia Iesu Keriso, aua “e le alu atu lava se asi i le Tama,



Sootaga ma o tatou aiga

pe a le ui mai ia [Keriso]” (Ioane 14:6). Ina ia faamalasia lo tatou sootaga ma le Atua, tatou te manaomia nai taimi anoa e na o i tatou ai ma Ia. O le taulai atu ma le filemu i tatalo patino i aso uma ma le suesueina o tusitusiga paia, ia taumafai e le aunoa ia agavaa mo se pepa faataga aoga o le malumalu—o nisi nei o teugaoa atamai o o tatou taimi ma taumafaiga ia latalata atili atu i lo tatou Tama Faalelagi. Ia tatou taliaina le valaaulia o i le Salamo: “Ina soia, ma ia outou iloa o a’u lava o le Atua” (Salamo 46:10).

O la tatou sootaga autu lona lua o le ma o tatou aiga. Talu ai “e leai se isi manuia e mafai ona suitulaga ai le toilalo”³ o iinei, e tatau ona tatou tuu le faamua-mua maualuga i o tatou aiga. Tatou te fausia sootaga agalelei ma loloto ma o tatou aiga e

ala i le faia o mea faigofie faatasi, e pei o taumafataga faaleaiga, ma afiafi faaleaiga, ma e ala i le na o le faia lava oni mea malie faatasi. I sootaga faaleaiga o le *alofa* e sipelaina moni lava *t-a-i-m-i*, taimi. O le faaavanoaina o le taimi mo le tasi ma le isi o le ki lea i le lotogatasi i le aiga. Tatou te talanoa ma i latou, nai lo le talanoa e uiga i le tasi ma le isi. Tatou te aoao mai le tasi i le isi, ma tatou te talisapaia o tatou eseese faapea foi ma mea tatou te tutusa ai. Tatou te faia se sootaga paia ma isi pe a faalatalata i le Atua faatasi e ala i tatalo faaleaiga, suesueina o le talalelei, ma tapuaiga i aso Sa.

O la tatou sootaga autu lona tolu o le ma o tatou uso a tagata. Tatou te fausia lenei sootaga i le toatasi le tagata i le taimi—i le nofouta i manaoga o isi, auauna atu ia te i latou, ma le tuuina atu o o tatou taimi ma taleni. Sa faagaetia au i se tasi tuafafine o le sa feagai ma luitau o le soifua matua ma gasegase ae sa filifili e ui lava e le mafai ona ia faia le tele o mea, e mafai ona ia faalogologo. Ma sa ia tulimatai atu i vaiaso taitasi mo tagata o foliga mafatia pe lotovaivai, ma sa ia faaluina le taimi ma i latou,

e faalogo ai Oka se faamanuiaga tele sa ia faia i olaga o ni tagata se toatele.

O le sootaga autu lona fa o le ma i tatou lava. Atonu e foliga mai e fou le mafaufau o le i ai o se sootaga ma i tatou lava, ae tatou te mafaia. O nisi tagata e le mafai ona lelei ma i latou lava. Latou te faitioina ma tuuina i latou lava i lalo i le aso atoa seia oo ina ua amata ona latou inoino ia i latou lava. Se’i ou fautuaina atu oe e tuuitiitia le nanati-vale ae faaalu sina taimi faaopoopo ina ia e iloa atili ai oe lava ia. Savalivali i le natura, matamata i se la oso, fiafia i foafoaga a le Atua, mafaufau loloto i upumoni o le talalelei toefuataiina, ma vaai po o le a lo latou uiga ia te oe lava ia. Aoao e vaai ia te oe lava e pei ona silasila le Tama Faalelagi ia te oe—o Lona afafine po o le atalii faapelepele ma se malosiaga faalelagi.

Malosiaga i le Faigofie

O le malosi e le oo mai mai gaoioiga fitivale ae mai le tumau i se faavae mautu o le upumoni ma le malamalama. E oo mai i le tuuina o o tatou taulaiga ma taumafaiga i aoaoga faavae autu o le talalelei toefuataiina a Iesu Keriso. E oo mai i le gauai atu i mea paia e sili ona taua.

Ia tatou faafaigofie laitiiti o tatou olaga. Ia tatou faia suiga e tatau ai ona toe faatulaga o tatou olaga i le mata-gofie faagaetia o le ala faigofie ma le lotomauualalo o se soo Kerisiano—le ala e taitaiina atu ai lava i taimi uma i se olaga e i ai se uiga, fiafia, ma le filemu. ■

Mai se lauga na tuuina atu i le konafesi aoao o Oketopa 2010.



Sootaga ma i tatou lava

FAAMATALAGA

1. Mahatma Gandhi, i le Larry Chang, *Wisdom for the Soul* (2006), 356.
2. Dallin H. Oaks, “Lelei, Lelei Tele, Lelei Silisili,” *Liahona*, Nov. 2007, 104.
3. J. E. McCulloch, *Home: The Savior of Civilization* (1924), 42; tagai foi i le Lipoti o le Konafesi, Ape. 1935, 116.

Sootaga ma o tatou uso a tagata

O LA TATOU AVANOA

O SE FESILI O LE FAATALANOAGA E LE'I FAAMOEMOEINA

Na ua maea la'u misiona, sa ou tauivi e sue se galuega. Na iu lava ina ou maua se faatalanoaga. O le galuega o le a avea ma se avanoa maoae, ae sa ou popole sa le lava lou tomai. Na oo mai lo'u taimi mo le faatalanoaga, ma sa ou nofo ma le popole i luma o le pule. A o ou autilo atu i lana laulau, sa ou vaai i se pepa o fesili sa ia fai atu i tagata talosaga. Sa tatavale lou fatu. Sa faaaoaga i fesili ni faaupuga faigata.

Na maua e le pule faamatalaga o o'u tomai ma amata ona ia fesili e uiga i ou tomai faalegaluega. Ina ua ia faitauina "faifeautalai faamisiona", sa fesili mai pe mafai ona ou tauina atu ia te ia mea sa ou aoaoina atu i la'u misiona.

Sa ou talanoa ia te ia e uiga i perofeta, le ata o le faaolataga, ma aiga e faavavau. Sa ataata o ia ma fai mai, "Ou te manao e te sau e feiloai i lo'u aiga."

Sa ia toe uu mai le pepa o fesili o le

faatalanoaga. Sa toe foi mai o'u lagona popole. Sa ia fesili mai, "O i ai se mea e te nofo ai iinei i Manila?" Sa lei faatali o ia mo la'u tali ma fai mai, "Ia, e tatau ona e vaavaai mo se fale. O le a e amata taeao."

O se vavega lava. O le a ou le faagaloina lava le ala na fesoasoani ai lou auauna atu i se misiona i lau faatalanoaga mo se galuega. ■

Alvin A., Filipaina

FILEMU I SAUAGA

Sa ou faasasao i luga o lo'u nofoa ina ua ou faalogo i le autu o le failauga na sosoo ai: o le mafuaaga e sese ai le Ekalesia Mamona, ma pe aisea foi ua avea ai Mamona o ni tagata tautaaesese inoino i tagata. I le taimi o le lauga, sa ou lagonaina ua mumu ou alafau, ma o le te'i ma le faalataina sa tiga ai lo'u fatu. E faapefea ona mafai ona filifili e au lava uo, i le iloaina o au o se Au Paia o Aso e Gata ai, e fai ni tautalaga pepelo ma faatiga i luma o la'u vasega Igilisi atoa?


Ina ua tatagi le logo, sa oo mai ia te au le failauga ma nisi o au uo. Faatasi ai ma le Agaga o loo mu i totonu o au, sa ou fai atu ia te i latou o mea sa fai mai ai e sese ma o le Ekalesia e le inoino i tagata e le talitonu i o tatou talitonuga. O le tali mai, na latou

osofaia au i faamatalaga ma tuuaiga sese. Sa ou lagona le tuuatoatasi. Sa ou mafaufau, "E faapefea ona tonu, pe afai o loo ou ola i mea ua ou iloa e moni, ae e tatau ona sauaina au?"

Ina ua ou taunuu i le fale mai le aoga i lena aso, sa ou vaai se i-meli mai i lo'u tinamatua. Sa ia ta'u mai ia te au e sue le Mataio 5:11-14. Faatasi ai ma loimata i ou mata, sa ou faitauina: "Amuia outou pe a latou upuleaga ma faasaua ia te outou, ma latou tuuaiina pepelo outou i mea leaga uma ona o a'u. Ia outou olioli ma fiafia lava: aua o i le lagi lo outou tau i tele: aua na faapea ona latou faasaua i perofeta lea na muamua ia te outou. . . . O outou o le malamalama o le lalolagi outou. E le mafai ona lilo le aai ua tu i luga o le mauga."

Sa faatumulia lo'u loto e le Agaga Paia a o ou faitauina na upu. Ou te iloa o sauaga o le a faamalolosia ai a tatou molimau, ma ou te iloa o faamanuiaga i le lagi o le a matua aoga ai lava le tiga tatou te oo i ai iinei i le lalolagi. Na faia e le Faola ia mafai ai ona tatou maua le filemu pe a sauaina i tatou ona o le ola ai i Lana talalelei, ma ou te matuai faafetai lava mo lena mea. ■

Beka F., Montana, ISA





O LA'U FUAFUAGA O LE MUSIKA E SOLA ESE MAI AI

Ao tietie atu i se malaga faaleao-aoga i le pasi, sa ou saofai i luma o se teineitiiti sa faaauau ona faia ni faamatalaga le mafaufau ma tausuga na ou le maua ai se lagona lelei. Na tau atu e o'u faiaoga ma isi tamaiti aoga ia te ia e tuu, ae sa ia faaauau pea. Sa ou le iloa le mea e fai, o lea sa ou filifili ai e toso mai la'u laau faalogologo MP3 ma faalogologo i nisi o a'u musika e fiafia i ai.

Sa ou kiina i le faatulagaga o pese ma o se tasi o pese muamua na sau o se pese mai le youth.lds.org/music. Sa ou sauni e aluese mai ai ae sa tau mai e se mea o i totonu e tau lava ina ou faalogologo i le musika. Sa

ou faalogo atu i musika musuia mo le 20 minute na sosoo ai. O upu na faamalosiau mai ia te au e onosai, ma sa latou faamanatuina mai ia te au o au o se afafine faapelepele o le Tama Faalelagi.

Mulimuli ane i le vaiaso, sa faia se siva a la'u aoga. E ui lava ina latou faaogaina vaega mama o pese siva lauiloa, e toatele tagata i la'u vasega na amata ona feei atu le upu ua ave-esea i se tasi o pese faapitoa.

Sa ou toe lagonaina foi le le to'a lelei. Sa nonofo latalata ane faiaoga ma na foliga mai latou te lei amanaia-ina. Sa ou tilotilo ifo i lo'u tapulima. Sa ou vaai i la'u taulima mai le konafesi

a le autalavou o faapea mai, "ia outou tutu i nofoaga paia, ma aua le masi'i ese (MF&F 87:8)."

Sa ou iloa o le mea o loo ou tu ai e leo se nofoaga paia, o lea na ou tuua ai seia oo ina sau se pese fou.

Ou te iloa o musika e mafai ona aumaia se faatosinaga loloto i o tatou olaga. Ou te iloa o le faalogologo i musika musuia i la'u laau faalogologo MP3 i le lua aso talu ai na fesoasoani e aumaia ia te au le lototele na ou manaomia e tuua ai le siva. O nei aafiaga na fesoasoani ia te au e latalata atili atu ai i lo'u Tama Faalelagi. ■

Alix B., Netherlands

FAASOA ATU

LE TALALELEI

E PEI O IOANE

LE PAPATISO

E mafai ona e fesoasoani e saunia tagata mo le Afio Mai Faa-lua o le Faaola, e pei ona faia e Ioane le Papatiso mo le uluai afio mai o le Faaola.



Saunia e Ryan Carr

Mekasini a le Ekalesia

E le pei o Ioane le Papatiso, e te le auauna atu i se misiona i le “vao o Iutaia” (Mataio 3:1). O ou lava-lava o le a le faia i “fulufulu kamela” (Mataio 3:4). O le a e le ai i “se akerise ma le meli vao” (Mataio 3:4). Ae o lou faamoemoega i le faasoaina atu o le talalelei e tutusa ma Ioane le Papatiso: e te saunia tagata mo le afio mai o Iesu i le folafola atu, “Ina salamo ia outou: aua ua latalata mai le malo o le lagi” (Mataio 3:2).

Sa manino lava le misiona a Ioane le Papatiso: “o le sau muamua mai le Mesia, e teuteu le ala o le Alii” (1 Nifae 10:7). Ae sa le’i faigofie lana misiona. O le perofeta mulimuli a o lei oo ia te ia o Malaki, i le silia ma le 400 tausaga na muamua atu. “A aunoa ma se perofeta, e amata ona fevaevaeai tagata i le laueleele i ni faalapotopotoga ma vaega, e taitasi ma finauina le aia e faamatala ai tusitusiga paia ma taitai ai tagata. O le malamalama moni ia Ieova na faaitiitia i nei vaega.”¹

E ui lava i luitau i aso o Ioane, na o mai le motu o tagata i le vao e faalogologo ia te ia o talai atu, ma sa ia papatisoina le toatele. O Aposetolo

e toalua i le lumanai, o Ioane le soo Pele ma Aneterea, na masani ia Iesu ona o Ioane (tagai i le Ioane 1:40).

O le faasoaina atu o le talalelei i le taimi nei ua tutusa lava le faigata. O le olaga i aso nei ua saunia le tele o mea faalavefau. O filosofia faalelailolagi ua taitai ese ai tagata. Ua toilalo le tele ma le tele o tagata ia ola i tulaga maualuluga faatulagaina lelei. O nisi ua faapea e le manaomia ni tapuaiga.

I nei tulaga, e faapefea ona outou manuia i le faasoaina atu o le talalelei, e pei ona faia e Ioane le Papatiso? O ni nai lesona nei mai lona soifuaga e mafai ona fesoasoani.

Na iloa e Ioane po o le a lana misiona. Sa ia iloa ua valaauina o ia e fesoasoani i tagata ia o mai ia Keriso (tagai i le Luka 1:16). Ina ua ia vaai i le Faaola, na molimau mai Ioane, “Faa-uta i le tamai Mamoe a le Atua, na te aveese le agasala o le lalolagi” (Ioane 1:29). Nai lo o le uunaiina o tagata e mulimuli ia te ia lava, na fesoasoani Ioane ia i latou e avea ma soo o Iesu Keriso. I le talanoa atu e uiga i le Faaola, fai mai Ioane, “E ao ina tupu

pea o ia, peitai a'u nei e tauau ina itiiti o au" (Ioane 3:30).

Na aoao mai e Ioane mataupu faavae autu o le talalelei a Iesu Keriso. Sa ia aoao atu i tagata e uiga i le faamasinoga tonu, alofa mutimutivale, o le faamaoni, ola mama, o le anapogi, tatalo, salamo ma le ta'uta' u atu o agasala, o le papatisoga e ala i le faatofuina, toetu, ma le Faamasinoga (tagai i le Mataio 3; Luka 3). O ana aoaoga e mafai ona faamatalaina e pei o le Faaola: "Ua matua ofo foi i latou i lana mataupu: aua ua ia aoao ia te i latou e pei o se ua i ai le pule" (Mareko 1:22).

Sa soifua Ioane e ese mai nai lo le

lalolagi. Na faatusatusa e Iesu Ioane i faiaoga o le lalolagi: o Ioane e le "ofu i ofu mamalu . . . ofu matagofie . . . i maota o tupu" (Luka 7:25). Sa "le inu ia i le uaina po o le ava" (Luka 1:15). O Ioane o "le leo ua alaga i le vao, ina teuteu ia outou le ala o le Alii" (Mareko 1:3). Ona sa ia aoao atu ma le mana o le Atua, na lagonaina e tagata le Agaga ma na liliu mai.

Sa tuuto Ioane. Na aoteleina e se tasi tagata aoaoina uiga auau mama o Ioane: "O le tasi o lona faamoemoega, o lona tuuto atoatoa i lona valaauga faapitoa, ma lona faamaoni ai ai i le Alo o le Atua. O nei uiga, faatasi ai ma lona pule o le perisitua paia, uiga o le

le fefe ma le amiotonu faaletagata lava ia, ua avea ai o ia ma se tasi e aupito sili i tusitusiga paia."²

A o e suesueina le soifuaga o Ioane le Papatiso, e te iloa ai ua sili atu nai lo le toatasi ua i ai le faamanuiaga tulaga ese o le mafai lea ona papatisoina Iesu Keriso. E te vaaia o lona soifuaga ma lana misiona na i ai e uiga i le sauniaina o tagata mo le afio mai o le Faaola, e pei lava ona ua ia te oe. ■

FAAMATALAGA

1. S. Kent Brown ma Richard Neitzel Holzappel, "O Tausaga e 500 na Maumau: Mai ia Malaki e oo Atu ia Ioane le Papatiso," *Liahona*, Tes. 2014, 30.
2. Robert J. Matthews, "John the Baptist: A Burning and a Shining Light," *Ensign*, Sept. 1972, 79.



AISEA UA E I AI I LE LALOLAGI I LE TAIMI NEI?

"O le a tatou olioli i Lona afio mai, ma ia tatou faafetai i le Alii i Lona auina mai o i tatou i le lalolagi i lenei taimi e faataunuuna o tatou tiute paia, o le fesoasoani lea e saunia le lalolagi mo Lona Toe Foi mai."

Elder Neil L. Andersen o le Korama a Aposetolo e Toasefululua, "Sauniaina o le Lalolagi mo le Afio Mai Faalua," *Liahona*, Me. 2011, 52.

AE FAAPEFEA PE AFAI...?

Fesili e uiga i le Auauna Atu i se Misiona

A o latalata atu i lou taimi e auauna atu ai i se misiona, e mafai ona e fai ifo ia te oe lava, “E mafai Ona ou faia moni lenei mea?” loe, e te mafaia! Atonu o le a le faigofie, ae o le a e le salamo lava.

E mafai ona taufaafefe le sauniuni e auauna atu i se misiona. E tele lava mea e mafai ona e popole i ai—tupe, o le malamalama, o le mata-muli—ae e tusa lava po o a popolega, e mafai ona e maua le faamautinoaga ma le lototele e te manaomia. O ni fesili masani nei ma tali e fesoasoani ia te oe e faatoilalo ai lou fefe ma maua ai le faatuatua e agai i luma.

Ae faapefea pe afai e le lava lou iloa i tusitusiga paia po o le talalelei?

O sauniuniga mo le misiona e tataua ma mautinoa lava e aofia ai le aoaoina e uiga i le talalelei, ae e le faapea e tataua ona e iloa mea uma lava ae e te le'i alu. Mo se faataitaiga, a o aveama se alii talavou, o Elder Neil L. Andersen o le Korama a Aposetolo e Toasefululua sa popole e lei saunia o ia e auauna atu i se misiona. Sa ia fai mai, “Ou te manatua na ou tatalo, ‘Le Tama Faalelagi e, e faapefea ona ou faia se misiona ae e matua itiiti se mea ua ou iloa?’ Na ou talitonu i le Ekalesia, ae sa ou lagonaina na matuai

le lava lou malamalama faaleagaga. A o ou tatalo, na oo mai se lagona: ‘E te le iloa mea uma, ae ua lava mea ua e iloa!’”¹

O le malamalama o le talalelei o le a oo mai a o e galue ma le faamaoni e aoao i mataupu faavae o le talalelei ma suesue i tusitusiga paia, ma o le a le tuua na o oe. O le a taialaina oe e le Agaga Paia, ma o le a e maua ni soa, taitai o le misiona, ma lou peresitene o le misiona e fesoasoani ia te oe i au taumafaiga. Ia manatua mea na aoao mai e Elder Jeffrey R. Holland o le Korama a Aposetolo e Toasefululua: “O le tele o lou faatuatua po o le maualuga o lou malamalama e le o le mea lea e taua—o lou faamaoni a'ia'i e te faatinoina e tusa ai ma lou faatuatua ma le upumoni ua uma ona e iloa.”²

Ae faapefea pe afai ou te le iloa e i ai sa'u molimau?

O le mauaina o se molimau o se vaega taua o le sauniuniga o le misiona. Atonu e te lagonaina faapea o lau molimau e vaivai, ae o le a tupu a o e

faia se taumafaiga faamaoni e faatupulaia. Tau lava ia manatua:

- *Saili ni taimi toafilemu e suesue ma tatalo ai.* E te manaomia le taimi ina ia mafai ona e lagonaina le musumusuga a le Agaga.
- *Ola i le talalelei.* Tagai i le Ioane 7:17 ina ia iloa ai pe aisea o le a fesoasoani ai lenei mea i lau molimau e tuputupu ae.
- *Fausia sina mea itiiti i le taimi.* “O la [outou] malaga faaleagaga o se faagasologa o le olaga atoa. Tatou te le iloa mea uma i le amataga po o le aluga foi o le olaga. O lo tatou liua e oo mai i lea laasaga ma lea laasaga.”³


Ia manatua foi o lau molimau atonu e malosi atu nai lo le mea o e manatu i ai. Na faamatala mai e Elder Holland lenei tala: “Na fai mai talu ai nei se alii e 14 tausaga ma sina faalotolotolua, ‘Brother Holland e le mafai lava ona ou fai atu ua ou iloa e moni le Ekalesia, ae ou te talitonu e moni.’ Sa ou matua opoina lena tamaitiiti. Sa ou fai atu ia te ia . . . o le *talitonu*



o se upu taua, ae o se faatinoga e sili atu ona taua, ma e le tatau ai ona ia faatoese i le 'na ona talitonu.' Sa ou fai atu ia te ia na fetalai mai Keriso Lava Ia, 'Aua tou te matatau, tau lava ina talitonu.' . . . Sa ou fai atu i lena tama o le talitonuga i taimi uma lava o le laasaga muamua e agai atu ai i le naunautaiga maumaututu. Ma sa ou tau atu ia te ia lo'u mitamita tele mo ia ona o le faamaoni i lana tauiviga ia iloa e moni le ekalesia."⁴

Ae faapefea pe afai ou te le agavaa?

Afai e i ai se mea sese i lou olaga, e mafai ona e faaleleia. O lou epikopo po o le peresitene o le paranesi o le a fesoasoani ia te oe ia iloa le mea e tatau ona e faia ina ia e mama ai e ala i le Togiola a Iesu Keriso. Ua saunoa mai Elder Richard G. Scott o le Korama a Aposetolo e Toasefululua, "Ou te uunaia outou ia aua nei e tatalo pe tatau ona e alu; ae ia ole atu i le Alii e taitai oe i soo se mea e alagatau, e avea ai ma se faifeautalai faamisiona agavaa ma malosi."⁵





TAMAITAI TALAVOU: O LE FAIA O LE FAIUGA E FAAMISIONA

I le avea ai ma se tamaitai talavou, e le o ia te outou le matafaioi e auuna atu, ae ua i ai ia te outou le avanoa. A o e filifili pe auuna atu pe leai, atonu e i ai ni au fesili e pei o le:

- ▶ Pe o le a sao se misiona mo au?
O le a faapefea ona ou iloa?
- ▶ Pe tatau ea ona ou saunia nei mo se misiona talai?
- ▶ O a ni mafuaaga e tatau ona ou mafaufau ai ina ia auuna atu?
- ▶ Pe o le a avea ea au ma se faifeautalai lelei?

Sue tali ma taiala i le tusiga “Tamaitai Talavou ma le Faaiuga e Faamisiona,” *Liahona*, Ian. 2013, 32-35.

Ua faasoa mai e Repeka S. mai Rusia lona aafiaga: “E ui lava na ou salamo, o le tausalaina ma le tiga na ou mafaufau ai ou te le mafai ona faia se misiona ona o au mea sese sa matuai leaga lava. Ae peitai, o lo’u epikopo ma le peresitene o le siteki na fesoasoani ia te au e iloa ai le mana faamaloloto o le Togiola i lo’u olaga. Ou te matua faafetai lava mo le salamo. O le agavaa e sili ona taua i se misiona. E le mafai ona e aoao atu e ala i le Agaga pe afai e te le agavaa ai (tagai i le MF&F 42:14). E tatau ona i ai se filemu i lou loto e auuna atu ai ma lou loto atoa. Na te faia ai le eseeseaga tele!”

E mafai faapefea ona ou tuua lo’u aiga ma uo?

E faigata ona tuua e pele, ae maise lava o le iloina o mea o le a ese pe a e toe foi atu—mo au uo, mo lou aiga, ma aemaise lava mo oe. Atonu e te popole e uiga i le auala o le a pulea ai lou aiga mea tau tupe e aunoa ma oe ma le ala o le a latou tali atu ai i lau misiona. Ae o le Alii o le a ia tausia i latou e te alofa i ai ma faamanuia i latou mo lau auunaga (tagai i le MF&F 100:1). E ui o le a e misia i latou, e manaomia oe e le Alii e fesoasoani i isi aiga ia maua le fiafia o le talalelei. Ia talitonu e finagalo le Tama Faalelagi i le mea e sili ona lelei mo oe ma lou aiga, ma

ia manatua, “E talitonu le faatuatua e i ai mea maoae ua teuina mo i tatou taitoatasi e le Atua.”⁶ O loo i ai i le Alii faamanuiaga ofoofogia o loo faatalitali mai mo oe ma lou aiga pe a e maua le faatuatua e agai ai i luma.

Ae faapefea pe afai ou te manatu e le mafai ona ou totogiina?

E mafai ona foliga mai le tau o se misiona o se osigataulaga tele, ae e silafia e le Alii le mea e finagalo o Ia e te faia. Ua saunoa mai Peresitene Boyd K. Packer, Peresitene o le Korama a Aposetolo e Toasefululua, “ou te tautala atu i lena alii talavou e le iloa pe faapefea ona totogi se misiona. Ou te le iloa foi. Ae ou te iloa le mea lenei: afai e te maua le faatuatua ma naunau o le a e alu, o le a i ai se ala.”⁷

Loran C. mai Egelani sa i ai lenei aafiaga: “Faatoa amata lava au pepa o le misiona ae logo mai au e le faletupe o loo tele lau aitalafu o kata fai faatau. Sa ma faia ma lo’u epikopo se faatulagaga o se fuafuaga o le paketi pe fia o le a ou totogia i lau aitalafu, o la’u misiona, o la’u sefuluai, ma isi au tupe faaalu. Sa manaomia ai le tele o le osigataulaga, ma sa ou manatu o le a le mafai ona ou ausia la’u sini. Ae ui i lea, sa ou totogi la’u sefuluai ma le faamaoni ma o le Alii na laa mai i totonu. O se

meaalofa mai se tagata ese na tuuina mai ia te au le tupe na ou manaomia e totogi uma ai lau aitalafu ma faatau-nuuna ai la'u sini o le misiona."

Ae faapefea pe afai ou te matamuli e talanoa i tagata?

O le manatu i le faaaluuina o le aso atoa, i aso uma e talanoa ai i tagata e te le iloa e mafai ona faigata. Na manatua e Sam L. mai Kalefonia, ISA: "Mo se tasi e le fiafia e oo lava i le tali atu i lo'u faitotoa, o le manatu i le tui-tui i le faitotoa a se tagata ese e talanoa i ai e uiga i le talalelei na foliga mai e mamao lava mai le mafaia.

"I se konafesi a le autalavou a le siteki, sa talosagaina i tatou e o atu faatasi ma faifeautalai ma talai atu le talalelei. O faatasi ma ni faifeautalai moni? I tagata moni lava? Sa ou popole, ae ou manatuaina loa se mau: 'Aua o a'u le Alii lou Atua o le ua taofi i lou lima taumatau, o le ua fai atu ia te oe, aua e te fefe; o au o le a ou fesoasoani ia te oe' (Isaia 41:13). Sa ou tatalo mo lena fesoasoani, ma e ui lava sa ou maasiasi lava au ia, sa ou

lagonaina le malosi e ala i le Agaga Paia ma na faapena foi ona tuu atu ni kopi se lua o le Tusi a Mamona."

Ae faapefea pe afai e faalavelave i la'u aoga po o la'u galuega?

Atonu e te manatu o le faaaluuina o le taimi mo se misiona ae o loo e saunia mo le kolisi po o se matata ua lamatia ai lou lumanai, ae e moni lava e mafai. E finagalo le Alii ia e manuia, ma o le a Ia fesoasoani ia te oe. E leai se mea e te faataulagaina o le a tutusa lona taua e pei o lau auaunaga faafaifeautalai.

E toatele tagata talavou ua faia faaiuga faapena. O William H. mai Ausetalia na tuua se matata faamanuiaina o le lakapi, ma le le iloa pe o le a ia maua se avanoa e taalo ai pe a foi mai i le fale (tagai i le "Malolo mo se Misiona," *Liahona*, Iuni 2012, 50–52). O Joseph B. mai Filipaina na savali atu i totonu o le ofisa o le failautusi a le kolisi, saunia e faataulagaina se avanoa mo le olaga atoa mo le a'oga (tagai i le "Mo se Taulaga Mu," *Liahona*, Sete. 2007, 40–42). Pe tupu

pe leai le mea na e faamoemoe i ai ina ua maea lau misiona, e leai se avanoa o le a sili atu le taua nai lo lau auuunaga o se faifeautalai.

Ou Te Lei Faanoanoa [I La'u Faaiuga]

E finagalo le Tama Faalelagi ia i tatou ina ia fiafia, ma o le a Ia le faatonuina i tatou e faia ni mea o le a le faamanuiaina ma fesoasoani ai ia i tatou. Afai e te faia ma le faamaoni mea ua poloaiina ai oe e le Alii, e tusa lava pe faigata, o le a e iloa o faamanuiaga e oo mai e sili mamao atu lava nai lo soo se mea e ofoina mai e le lalolagi. O le a e salamo lava i le auauna atu i se misiona. ■

FAAMATALAGA

1. Neil L. Andersen, "Ua Lava Mea ua E Iloa," *Liahona*, Nov. 2008, 13.
2. Jeffrey R. Holland, "Le Alii e, Ua Ou Faatua-tua," *Liahona*, Me 2013, 94.
3. Neil L. Andersen, "Ua Lava Mea ua E Iloa," 13.
4. Jeffrey R. Holland, "Le Alii, Ua Ou Faatua-tua," 94–95.
5. Richard G. Scott, "O Le Taimi Lenei e Auauna Atu Ai i se Misiona!" *Liahona*, Me. 2006, 90.
6. Jeffrey R. Holland, "Le mea Sili e Oo i Ai," *Liahona*, Ian. 2010, 21.
7. Boyd K. Packer, "Come, All Ye Sons of God," *Ensign*, Aug. 1983, 71.



“O se tasi o a’u uo e manao e faataitai se mea leaga mo na o se taimi lava e tasi ina ia mafai ona ia malamalama pe a talanoa i ai tagata. E mafai faapefea ona ou fesoasoani ia te ia ia malamalama e le o se manatu lelei lena?”

O se tasi o mea e sili ona lelei e mafai ona e faia o le fesoasoani lea i lau uo ia manatua pe aisea ua tatou maua ai poloaiga. Ua tuuina mai e le Tama Faalelagi poloaiga ia i tatou ona e alofa o Ia ia i tatou ma silafia o le a tatou maua ai le fiafia ma fesoasoani ia i tatou e ave faapei o Ia.

I le Feagaiga Fou, na fetalai le Faaola, “Afai tou te alolofa mai ia te au, ia outou tausī mai i au poloaiga” (Ioane 14:15). Fesoasoani i lau uo ia iloa o le filifilia o le mea sa’o e faaalua ai le alofa mo le Tama Faalelagi ma Iesu Keriso ma le agaga faafetai mo Lana Togiola ma le talalelei.

E mafai foi ona e faamanatu ia te ia o le faia o mea leaga e taitai atu ai i taunuuga leaga, e tusa lava pe na o le faatasi [ona fai]. Tatou te le mafai ona fai le agasala ma aloese mai ona aafiaga. O le soli o poloaiga ma le loto i ai e pei o le laa ese mai le Tama Faalelagi ma tauina atu ia te Ia e le taua o Ia e pei o a tatou uo po o isi tagata.

E alofa le Tama Faalelagi ia i tatou, ma o le a Ia faamanuiaina i tatou i le taitaiga a le Agaga pe a tatou tausī Ana poloaiga. Afai tatou te usiusitai, o le Agaga o le a aoaoina i tatou e sili atu nai lo se isi mea e mafai ona tatou aoao mai le faataitaiina o le agasala.



Tatou te Le Manaomia le Faataitai

O le a ou aoaoina lau uo faapea “soo se mea ua lelei ua sau mai le Atua, ma o soo se mea ua leaga ua sau mai le tiapolo” (Alema 5:40). O le a ou faamatalaina foi o gaoioiga uma lava e i ai taunuuga ma e le tatau ona tatou faia soo se mea e mafai ona faaleagaina ai i tatou. Tatou te le manaomia ona faataitai le leaga. O loo ua matuai tele le leaga ua sio-mia ai i tatou, ma e faigofie ona iloa e toatele tagata ua nonofo i le faanoa-noa aua latou te lei tausīa poloaiga.

Vinicius S., 17 tausaga, São Paulo, Pasila



Faamatala pe Faapefea Ona E Manumalo i Faosoosoga

Tau atu i lau uo o le mea e sili ona taua o lona tulaga i luma o le Alii. E le tatau ona tatou tuuina atu lo tatou faaolataga e faavavau e faafesuii mo se aafiaga faaletino. Ma, o le a sili atu ona e fesoasoani i lau uo pe afai e mafai ona e faamatalaina ia te ia le alana e faatoilaloina ai faosoosoga.

Emily G., 19 tausaga, Puerto Rico

O Loo Ia i Tatou le Malosi Faalelagi

E mafai ona e tau atu ma le agalelei i lau uo faapea e ui e ono le afaina se filifiliga leaga se tasi, e mafai ona ia taitai atu i agasala e sili atu ona ogaoga. E mafai foi ona e faasoa atu le mau lenei: “O A’u o le Alii e lē mafai ona Ou vaai i luga o le agasala ma sina tikeri itiiti o le faatagaina” (MF&F 1:31). Faamanatu atu i lau uo e tusa lava pe tasi se aafiaga i le agasala e mafai ona tatou

le lagonaina ai le leo o le Agaga. O le mea e sili ona taua, ia iloa e ia e te alofa ia te ia ma o le faia o filifiliga sao o se vaega o lona malosi faalelagi i le avefa ai ma se afafine o le Atua.

Adriana F., 17 tausaga, Arisona, ISA

E Na o le Faatasi o Le A Tiga ai

O mea leaga uma, e tusa lava pe na o le faatasi ona e faia, o le a tuliese le Agaga. Afai e aluese le Agaga, o le a sili atu ona faigofie ia Satani ona faaosooso oe e faia nisi mea leaga. Ma le isi foi, o le a manaomia ona e salamo i au agasala uma lava e tusa lava po o le a le tele o taimi e faia ai, ma o le salamo i agasala matuia e mafai ona avefa ma se faagasologa umi ma tiga.

Emily L., 14 tausaga, Iuta, ISA



Tumau le Malosi

Faamautinoa ia te ia e te alofa ia te ia, ma e te manao e fesoasoani ia te ia e filifili le mea sa'o. Ou te iloa mai aafiaga

patino, tatou te le manaomia ona tatou faia filifiliga e tutusa ma se isi ina ia malamalama ai i lona tagata. A o tatou ola i le talalelei, o le a fesoasoani le Agaga ia i tatou e iloa pe faapefea ona fesootea ma tagata. Faamanatu i lau uo e manaomia lona tumau malosi ina ia mafai ona ia fesoasoani i isi ia usiusitai i poloaiga. Tatalo ina ia mafai ona e fesoasoani ma auauna atu ia te ia.

Vanina P., 19 tausaga, Buenos Aires, Atenitina

E Te Le Ono Mafai ona Taofia

O le a ou ta'u atu i la'u uo e aua lava nei mafaufau fua i ai. E le o se manatu lelei le fai o se mea leaga i se taimi

se tasi aua e te ono le mafai ona toe taofi i le taimi lava e te amata ai. Sa tuuina mai e le Tama Faalelagi ia i tatou poloaiga e fesoasoani ia i tatou ia saogalemu ma fiafia ai.

Douglas B., 13 tausaga, Kalefonia, ISA

E Amata Laititi

Na saunoa mai Elder Jeffrey R. Holland i se tasi taimi "o se faigamalagi i ni maila se tele e amataina i se laa se tasi" ("Ua le Toe Ulu Mai i Lou Agaga Le Ita Mai ia te Au," *Liahona*, Me 2010, 44). O le a ou fesoasoani i la'u uo ia malamalama faapea e faaoga e Satani faaosoosoga laiti e amata ai ona tatou agai i lalo i se ala leaga. Pe a e taumafai e fai faatasi lava se mea leaga, ua e faatagaina Satani ma ana au e amata ona faaosoosoina oe e fai ai pea lava pea.

Similoni F., 18 tausaga, Iuta, ISA



AISEA E LE FAATAITAI AI?

"I nai tausaga ua mavae, sa fesili mai ai ia te au se tasi oa ma tama

tama pe aisea e le o se mea lelei ai le faataitai o le alakaholo po o le tapaa e iloa ai pe faapei. ... Sa ou tali atu afai e te manao e faataitai lona mea, e tatau ona alu o ia i le pa povi ma tago e ai sina manuia. Sa faamimigi o ia ma le maniti. 'Auoi, e oso ai le fia ma'i i lona mea,' lana tala na fai mai.

"'Ou te fiafia ua faapena sou manatu,' lau tala na fai atu, 'ae aisea e te le faataitai ai ina ia e iloa ai e oe lava? A o faatuina mai se manatu e te fia faataitai se tasi o mea ua e iloa e le lelei mo oe, aisea la e te le faaoga lona aoga i isi mea?'"

Elder Dallin H. Oaks o le Korama a Aposetolo e Toasefululua, "Agasala ma Puapuga," Liahona, Ape. 1994, 26.

FESILI O LE A SOSOO MAI

"E palauvavale o'u matua, faalogologo i musika malomaloa, ma matamata i ata le talafeagai o le TV. O le a se mea e mafai ona ou faia ia lagonaina ai le Agaga i le fale, ae maise lava i le aso Sa?"

Auina mai lau tali ma se atapue sili ona manino, pe a e manao i ai, a o lei oo i le aso 1 o Iulai, 2015, i le liahona.lds.org, po o le imeli i le liahona@ldschurch.org, pe lafo mai i le meli (tagai i le tuatusi i le itulau e 3).

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le imeli) e lolomiina ai lau tali ma lou ata.

E ono faapupuuna tali mo le uumi po o le manino.

O LE PASO

O LE SUESUEINA O TUSITUSIGA PAIA

E pei o le tuufaatasia o se paso, o taimi taitasi e te suesue ai i tusitusiga paia, e te mauaina se vaaiga faatuputupulaia pea o upumoni a le Atua.

Saunia e Cody Phillips

Ia Setema 2011, sa faatuina ai e tamaiti aoga i se iunivesite i Viatename se matatia fou i le lalolagi e ala i le tuufaatasia o le paso e aupito sili ona tele i le lalolagi. Na manomia tamaiti aoga e 1,600, 17 itula e tuufaatasi ai uma fasi pepa e 551,232.

Na latou fatuina se paso e 48-futu i le 76-futu (15 m i le 23 m) e faaalai ai se fugalaau o le lili ma lau e ono e fai ma sui o tagata, faataatiaga faafaafanua, talafaasolopito, aganuu, aoaoga, ma le tamaoaiga. Mafaufau i ai—e silia ma le afa miliona tamai fasi pepa e faapipii faatasi e maua ai se ata tele. O fasi paso taitasi o lena paso atonu e foliga mai e le taua ma le manaia pe a tasi lava ia, ae o le paso e le atoa pe a na o le tasi se fasipepa o loo misi.

O tusitusiga paia e pei o se paso faapipii: o le tele lava o fasipepa e tuu faatasi, o le tele foi lea ona e vaai i upumoni o le fuafuaga a le Atua. A o faateleina lau vaaiga i lena fuafuaga, o le a e iloa ai o tusitusiga paia e matagofie ma e faatatau i lou olaga.

O ni nai fautuaga nei o le suesueina o tusitusiga paia e fesoasoani ia te oe e iloa ai le ata tele—ma faamatalaga laiti. A o e tuu faatasia nei fasipepa, o le a e vaaia upumoni ofoofogia, o loo faatalitali mai mo oe i tusitusiga paia.

Aoaoga Faavae: Fasipepa Tetele o Loo Aoa Mai Upumoni e Faavavau

O tusitusiga paia e aoaoina atu aoaoga ma mataupu faavae o le talalelei. “O tusi paia uma e mai le Agaga o le Atua ia, e aoga foi e aoao ai” (2 Timoteo 3:16). Talu ai e na o Iesu Keriso e mafai ona faaolaina i tatou (tagai i le Ioane 14:6), e tatau ona tatou aoao e uiga ia te Ia ma Ana aoaoga faavae. O le mafuaaga lena ua poloaia ai e le Alii i tatou

e “suesue outou i Tusi; aua . . . o Tusi foi ia o loo molimau ia te au” (Ioane 5:39).

Tagata: Fasipepa Felanulanuai o Loo Aoa Mai Lesona

E faitau selau tagata e faitau i ai i tusitusiga paia. O ai o i latou e sili ona tou fiafia i ai? Atonu e te tilotilo i luga ia Amona ona o lona usiusitai lototele pe a feagai ma tulaga matautia. Pe atonu e te manatu ia Iopu ma lona faatuatua le maluelue ma le amio sa’o.

Na e faitau i le asini, na talanoa i lona matai (tagai i le Numera 22)? po o le tupu amioleaga na naunau e tuuina atu lona malo ina ia faamagaloina (tagai i le Alema 22)? po o le tamaitai na lauiloa o ia i lona nuu atoa i le avea ai ma se tagata o le mama (tagai i le Ruta 1–4)?

O loo i ai foi tagata i tusitusiga paia e le tele le alofagiaina. O a mea e mafai ona e aoao mai ia i latou ma le fili-filiga le lelei latou te faia?

Silasila totoa i le tagata e te faitau e uiga i ai i tusitusiga

paia, ma fai ifo ia te oe lava le auala e mafai ona e mulimuli ai i a latou faataitaiga lelei ma aloese ai mai a latou mea sese. I ni fasi paso o o latou olaga o nisi o fasi mea uma e aupito sili ona manaia ma felanulanuai. O a latou aafiaga o se auala e manatua pea e aoao ai ma manatua ai le mataupu faavae o le talalelei!

Faatusa: Mauaina o Vaega Natia

O nisi taimi o le mau e faaogaina faatusa e aoao atu ai mataupu faavae o le talalelei. O le a e misia nisi fasipaso

pe afai e te le vaai i le faatusa. E faaopoopo atu i vasega o le Ekalesia ma le seminare, fesoasoaniga mo suesuega e pei o le Taiala i Tusitusiga Paia po o le tusi lesona o le seminare ma inisitituti e mafai ona fesoasoani ia te oe e saili le fasipepa o loo misi.

Mo se faataitaiga, o le tala o Aperaamo ma Isaako (tagai i le Kenese 22), e musuia, ae e manaomia ai se uiga loloto atu pe a e iloa ai o se faatusa o le taulaga a lo tatou Tama Faalelagi ma o le taulaga togiola a le Faola mo i tatou (tagai i le Iakopo 4:5).



E FETALAI MAI LE ATUA IA I TATOU

“Pe a tatou mananao e talanoa i le Atua, e tatou te tatalo. Ma a tatou mananao ia te la e talanoa mai ia i tatou, tatou te suesue i tusitusiga paia; aua o Ana afioga e fetalaia e ala i Ana perofeta. O le a la aoaoina i tatou a o tatou faalogo- logo atu i musumusuga a le Agaga Paia.”

Elder Robert D. Hales o le Korama a Aposetolo e Toasefululua, “Tusitusiga Paia: O Le Mana o le Atua i lo Tatou Faalatalaga,” *Liahona*, Nov. 2006, 26–27.

O Le Agaga Paia: Mauaina o Vaega Fesootai

O nisi fasi paso e foliga mai latou te o faatasi, ae latou te fai lava si le fetau i ai. E mafai ona fesoasoani le Agaga e te iloa ai po o fea vaega e o faatasi. A e valaauliaina Lana fesoasoani e ala i le tatalo ma mafaufau loloto, o le Agaga o le a fesoasoani e te iloa ai pe faapefea ona e faafesootai i fuaiupu ua e suesueina a o lei oo i mea e te suesue i ai i le taimi nei e faapena foi ma le auala e fesootai atu ai na aoaoga i lou olaga. O le tulaga e tatau ai, o le a e maua musumusuga mai i upu o i ai i tusitusiga paia, ae faapea foi mai le Agaga a o e mafaufau loloto i mea na e faitauina.

Faaogaaga: O Le Tuufaatasia o Vaega

E te le iloa po o a ni ata o le a fausiaina e le paso pe afai e te le tuu faatasia ia vaega [uma]. E faapena foi, le aoaoga faavae, mataupu faavae ma poloaiga ua e aoaoina mai tusitusiga paia o le a le fesoasoani ia te oe lava sei vagana ua e ola i mea ua e aoaoina (tagai i le Ioane 7:17). A o e taumafai i aso taitasi e ola ai i le mataupu faavae o le talalelei na aoao mai i tusitusiga paia, o le a sili atu ona tuputupu ae malosi lo outou faatuatua ma molimau, ma o le suesueina o tusitusiga paia o le a avea ma se vaega taua o lou olaga. ■

E alala le tusitala i Iuta, ISA.



O USO I LE TALALELEI

Ona ua mafai ona ou vaai i faamanuiaga o le talalelei i lo'u olaga, sa ou fia faasoa atu i la'u uo.



Saunia e Paola Sarahí Hernández Cruz

Ou te alofa i la'u uo o Lupita e pei o se uso. Na ma feiloai i le vasega ono, ma sa ma i ai faatasi i le faaili savali a le aoga. O le tausaga aoga na sosoo ai na sili atu ai ona ma vavalalata ma amata ai ona faalagolago le tasi i le isi. Sa ia tau mai ia te au luitau sa ia te ia i le fale ona e le i ai lona tama i le fale ma o lona tina sa le mafai ona tuu atu ia te ia le taulaiga sa ia manaomia. Sa ou iloina sa faanoanoa o ia ona o ona matua sa le o se vaega tele o lona olaga. Sa tuuatoatasi o ia, ae sa ou i ai pea mo ia.

Sa ou lagona le faamanuiaina na fanuina au i totonu o se aiga lea na matou maua ai le talalelei a Iesu Keriso. Ua ia aumaia i totonu o lo'u olaga se filemu e leo maua e le toatele o a'u uo. Ona sa mafai ona ou vaai i faamanuiaga ua aumaia e le talalelei ia te au, sa ou fia faasoa atu ia Lupita.

Sa ou talanoa ia te ia e uiga i le Ekalesia ma valaulia o ia ma te o faatasi i le Mutuale. Sa ia taliaina ma amata ona sau i le lotu ma gaoioiga a le uarota faatasi ma au ma lo'u aiga. Sa ou faafeiloaia o ia i faifeautalai, o e na aoaoina o ia i le talalelei ma valaulia o ia e papatiso. Sa ia mauaina se molimau, ma

ina ua ia fesili i lona tina pe mafai ona papatiso, sa fai mai lona tina ioe.

Sa sili ona faapitoa le aso o lona papatisoga aua sa ia osia ni feagaiga ma lo tatou Tama Faalelagi ia manatua o Ia ma tausii Ana poloaiga. Sa ou tuuina atu la'u molimau ia te ia i lona aso, ma fai atu i ai ua i ai o ia i le nofoaga sa'o ma ua tataua ona mitamita le Tama Faalelagi ona o ia. Ou te alofa ia Lupita ma ou te fiafia o ia o la'u uo ma o lenei, o lo'u uso i le talalelei. Ou te iloa o lona olaga o le a sili atu le fiafia ona o le a olioli o ia ma lona aiga i le lumanai i faamanuiaga o le talalelei.

Ua ta'u mai e Lupita ia te au e faafetai sa ou filifili e faasoa atu le talalelei ia te ia. Sa ia fai mai talu ona amata ona ia auai i le lotu, ua sili atu le lelei o lona olaga ma ua ia lagonaina le toafilemu. Ou te iloa o le Agaga lenei ua faamauina le upumoni ia te ia. Na ia fai mai foi e i ai se aso o le a ia faaipoipo ai i le malumalu. Ou te faafetai i lo'u Tama Faalelagi aua sa ou mauaina la'u uo ma ona o le olioli na ou lagonaina ina ua ou faasoa atu le mea e sili ona taua ia te au. ■
E alala le tusitala i le Setete o Mekisiko, Mekisiko.



Saunia e Elder L. Tom Perry

O Le Korama a Aposetolo e Toasefululua

O uso o le Korama a Aposetolo e Toasefululua o ni molimau faapitua a Iesu Keriso.

E mafai faapefea ona taialaina au e le Agaga Paia?

E manaomia e se solofanua lelei se uunai itiiti mai le taitai ina ia faia mea e finagalo o ia e faia. O lenei uunai itiiti e pei o le leo itiiti ma le filemu.

E tatau ona tatou saunia mo le mauaina o le uunai malu a le Agaga Paia.

Afai tatou te faalogo ma le faaeteete mo le uunaiga malu a le Agaga Paia, o le a latou taialaina i tatou e toe foi atu i lo tatou Tama oi le Lagi.

Mai le "Usiusitai e ala i lo Tatou Faatuatua," Liahona, Me 2014, 100–103.

O Le Agaga Paia

(Ua Faafaigofie)

Faifaimalie ♩ = 126-138

Upu ma le fati na saunia e
Jeanne P. Lawler

Chords: C A7 G7 C

1. Sa fola - fola e Ie - su. Na te au - i - na mai o
2. A faa - mau - ina ta - tou. E le pe - ri - si - tua. Ua

Chords: F Fm G7 C

le A - ga - ga Pa - ia. E fe - soa - so - a - ni mai. E
tu - u mai le A - ga - ga e ta - i - tai ta - tou. Ia

Chords: Caug F B Em

mu - su - mu - su mai Ia i se leo ma - lu. E
ou faa - lo - go pe - a i le leo ma - lu. O

Chords: A7 Dm G7 C

mo - li - mau i le A - tua ma Ie - su Ke - ri - so.
lo - na ma - la - ma - la - ma ou te faia ai mea tonu.

© 2015, 1989, 1977 Puletaofia e le Intellectual Reserve, Inc. Ua taofia aia tatau uma.
E mafai ona kopiina lenei pese mo le faaagaina mo gaoioga laiti e le saili tupe i le lotu ma le fale.
E tatau ona i ai lenei faaaliga i kopi uma e fai.

O Le Leoleo Mamoe Lelei

Saunia e Erin Sanderson

I se tasi aso na fai atu e Iesu se tala (po o se faataoto) e uiga i se leoleo mamoe o le e alofa tele i ana mamoe ma e mafai lava ona ia tuuina atu lona soifua ina ia puipuia i latou. E pei lava i tatou o mamoe i lena tala. Ma o le leoleo mamoe e pei o lo tatou Faaola, o Iesu Keriso. O nisi taimi e valaau o Ia o le Leoleo Mamoe Lelei.

Na faaalua e Iesu Lona alofa ina ua aumai e nisi matua a latou fanau e vaai ia te Ia. Na Ia fetalai, “**Ia tuu mai ia o tamaiti e o mai ia te au, a e **aua tou te vavao ia te i latou:** aua e faapei o i latou nei o e o i le malo o le Atua” (Luka 18:16). Ona Ia fusi lea ia te i latou i Ona aao ma faamanuaina i latou.**

Moeiini ou mata ma vaai faalemafaufau i le Faaola o fusi oe i Ona aao ma tuuina atu ia te oe se faamanuiaga. E mafai ona e lagonaina Lona alofa pe a e aoao pe mafaufau ia te Ia. O le Agaga Paia e fesoasoani e te lagonaina ai le alofa o le Leoleo Mamoe Lelei, o Iesu Keriso. ■

E alala le tusitala i Iuta, ISA.

AOAO ATILI

tuu mai—ia tuu atu pe faatagaina

vavao ia te i latou—aua ne'i taofia i latou



TALANOAGA I LE AIGA

Faitau loane 10:1–5, 11–16. Ona fai lea o se lisi o aualea e faapei ai Iesu o se leoleo mamoe ma ta'u mai se taimi na e lagonaina ai le alofa o le Faaola.

Pese: “Ou Te Mafaufau i Lena Tala Manaia” (*Tusipese a Tamaiti*, 35)

Tusitusiga Paia: Luka 18:15–17; loane 10:1–5, 11–16

Vitio: “Suffer the Little Children to Come Unto Me” ma “Jesus Teaches that We Must Become as Little Children” (Biblevideos.org)

O LA TATOU LEOLEO MAMOE LELEI

Aveese lenei ata. Gagau e pei o se ili i luga o laina papae. Ona tatala lea ma vaai i ai mai le itu taumatau ma le itu tauagavale. E faapefea ona e lagonaina le alofa o lo tatou Leoleo Mamoe Lelei?

MOTUGAAFA O TUSITUSIGA PAIA

Sue le “Talalelei” i le Taiala i Tusitusiga Paia mo se siata e ta’u mai ai po o a tusi e ta’u maia le mea na tupu po o le aoaoga. Ua na o le tusi a loane o loo ta’u mai ai le Leoleo Mamoe Lelei. E Tolu Tusi—Mataio, Mareko ma Luka—o loo ta’u mai ai e uiga ia Iesu o loo faamanu iaina le fanau.



O LA TATOU ITULAU



Sa le mafai ona ou faatali mo le aso o le a ou papatiso ai. O le tausaga na te'a nei, ina ua atoa lou valu tausaga, o lo'u tama, o lo'u tina, o lo'u aiga, ma au uo mai i le ekalesia sa i lo'u papatisoga. O se aafiaga maoae mo au. Sa matagofie le iloa, sa faailogaina e le lagi la'u filifiliga e papatiso ma avea ma se soo o Iesu Keriso. Pe a tatou papatiso, o le a tatou osia se feagaiga ma le Tama Faalelagi. Ou te iloa sa fiafia o la i la'u filifiliga ona o le sa'o ma le agavaa.

Sariah Z., 8 tausaga, Honetura



Sa ou valiina le au tau a Helamana i luga o lo'u mitiafu. Ou te manao ia faamaoni, lototele, ma usitai i polo-aiga a le Atua, e pei lava o i latou!
Z. Yu-en, 6 tausaga, Taiuani



O lo'u aiga leni i le malumalu.
Sherriza T., 8 tausaga, Mekisiko






Matou te fiafia pe a ave matou e o matou matua i le malumalu aua o se nofoaga matagofie, ma matou te lagona le latalata atili i le Atua pe a matou i ai iina.

Nifae ma Bryan V., 6 ma le 9 tausaga, Ekuatoa

O Le Leoleo Mamoe Lelei

Ioane 10:1-5, 11-16

Faapiipii le itulau lea i se pepa mamafa po o se pepa malo. Ona 'oti lea o ata ma faapiipii i fasilaa po o tagapepa. Ia teu i se teutusi faatasi ma le mau faasino i le pito i luma. ■



E mafai ona e faia nisi kopi mai le liahona.lds.org.

O Le Uluai Aso o Tama o le Lumanai a Steven

Saunia e Kellie George Purcill

E faavae i se tala moni

Sa afe e Steven i luga lona fusiuva Si lalo tonu lava o lona auvae a o faataitaiina e le toatele o tamaiti Peraimeri le pese fou. Leai, e leai se auala o le a ia usuina ai lenei pese.

O le tama o lo matou aiga e taitaia lo matou aiga. . . .

Sa tilotilo Steven i fafo i le faamalalama ma luga i le taulaluga. Na matuai feminoia solo o ia i lona nofoa na toetoe lava a siva. Sa le mafai ona ia pese e tusa lava pe sa ia manao ai. Sa i ai se mea tele ma le faalavelave sa mau i lona fa'ai. Sa faauau pea ona pepese isi tamaiti o le Peraimeri, i le aoaoina o upu fou, e taitasi laina i le taimi.

I le malamalama o le poto i mea uma ua sa'o;

O lou tama e lelei ia te au (“Fathers,” *Children’s Songbook*, 209).

Sa lagona e Steven se popo i luga o lona lima. O lona tina, o le sa tilotilo mai ma le filemu i le faitotoa o le potu o le Peraimeri, sa uuina lemu atu lona lima. Sa ia taitaiina atu o ia i fafo i le potu tele. Ua mamao mai ana uo i le Peraimeri, sa le mafai ona taofia e Steven le maligi o ona loimata. Na opo faalatalata mai e tina o ia i se opo mafanafana, ma le malosi.



“E le afaina le le fiafia,” o le tala lea a Tina, a o popo lemu lona tua. “Ou te iloa o le faalogoina ma le usuina o lona pese e faigata.”

Sa lue atu le ulu o Steven, ona solo lea o ona mata. “Ou te le manao e pese i le Aso o Tama ona e leai sou tama.” Sa mumu mata o Steven, ma sa ia ūina lona laugutu. “Ou te le toe fia taua o ia o Tama. Ou te lei vaai ia te ia i le tele o tausaga, ma e le *manao* foi o ia e avea ma o’u tama.”

Sa taumafai malosi lava Steven e aua le tagi—ae na lagona atu lava e i latou o pepese. O lona pese na ona faatiga ai o ia i totonu o lona fatu. E pei lava o le taimi na tusi mai ai lona tama ma fai mai o ia ma lona toalua fou ua filifili na te le toe vaai ia Steven po o lona uso.

Na toe opo mai e Tina o ia mo se isi opo, ma sa faamaligi e Steven ni nai isi loimata ma faasusu ai lona ofutino [Tina]. “O le a ou talanoa atu i le peresitene o le Peraimeri. E le tataua ona e pese pe a e le manao ai. Ae sole—ua ou maua se manatu.” Sa tilotilo sao atu Tina i ona mata. “O le tausaga lenei tatou te le faamanatuina ai le Aso o Tama—o le a tatou faamanatuina *le Aso o Tama* o le Lumanai!” Sa ataata o ia, ae sa sioa mai i ai Steve.

“Ea? Faamanatu *le a?*”

“Aso o Tama o le lumanai—o le a tatou faamanatuina le ofoofogia o le a avea ai oe ma lou uso o ni tamā i se aso. O le a tatou faia ni meaalofa ma se keke ma lau vaiinu e sili ona e fiafia i ai!”

Sa sogi atu Tina i lona muaulu ona taumafai lea e faaleleia lona fusiua ua maanuminumi. “O oe, Steven, o le a avea ma se *tama* atamai—ua ou iloaina lava. Aua ua uma ona e mafaufau i le mea o le a e faia ma au tamaiti ma ua fuafuaina le ituaiga tama o le a avea ai oe.”

O le tele ona mafaufau Steven i ai, o le faateleina foi lena o lana ataata.

Sa ia fusi ia Tina ma toe foi atu i le Peraimeri ma se lagona e sili atu ona lelei.

I le lua vaiaso mulimuli ane, sa tu Steven i luma o le faaata, ma faasa’o lona fusiua fou manaia. Na tuuina atu e Tina ia te ia i lena taeao mo lona uluai Aso o Tama o le Lumanai! Sa piki e Steven i luga ana tusitusiga paia ma savali atu i le faitotoa i luma e alu i le lotu.

Sa ataata o ia i lona tina.

“Manuia le Aso o Tama, Tina.”

Na ataata Tina. “Manuia le Aso o Tama o le Lumanai, Steven.” ■

E alala le tusitala i Kuiniselani, Ausetalia.



FUAFUA MA SE FAAMOEMOEGA

“Uso e, po o le a lava lou matua, po o a lava ou tulaga, ou te apoapoi atu ia te outou ia fuafua lou olaga i se faamoemoega.”

Thomas S. Monson, “O Mai, Alo o le Atua,” *Liahona*, Me 2013, 67.



O Le Molimau



a Mia

Saunia e Amelia Hawkins

E faavae i se tala moni

“E musumusū mai Ia i se leo malu. E molimau i le Atua ma Iesu Keriso”
(Tusipese a tamaiti, 56).

Ua te’a lona taimi moe, ae e le i alu lava Mia i le moega. Sa ia nofonofo i luga o le fola o lona potu, ma mafaufau e uiga i se mea na faitau atu e Sister Duval i le Peraimeri: “O le a oo mai le taimi o le a leai se alii po o se tamaitai o le a mafai ai ona tulai mai i se malamalama nono.”¹

“O se molimau e pei o se malamalama i totonu o i tatou,” le faamalamalama lea a Sister Duval. “Ma e manaomia e i tatou taitotasi se tasi mo i tatou lava. Ona mafai lea ona tatou malolosi pe a faigata le olaga ma faaososoina i tatou e Satani.”

Sa faalagolago atu le ulu o Mia i lona moega. “Ou te manao i se molimau e moni le talalelei,” sa ia mafaufau ai. Ae e faapefea tonu lava ona e maua se molimau? Sa ia iloaina o le tatalo o se vaega lea o le mauaina.

“O le a ou tatalo,” o lana tonu lea. O le a ia tatalo ma o le a le taofi seia oo ina tupu se mea e tau maia ia te ia e moni le Ekalesia. Ua saunia e tatalo i le po atoa pe afai e tatau ai!

Sa ia tootuli i ona tulivae. “Tama Faalelagi pele e,” sa ia musumusū ai, “ou te fia iloa pe moni le Ekalesia. Ou te fia lagonaina i lo’u loto ma tau lava ia iloa.”

Sa faatalitali Mia. Na te lei lagonaina se mea sei vagana ai le lagona malu e masani lava ona ia lagonaina pe a ia tatalo. O le a lana mea sese ua fai? O fea lana molimau?

Sa tootuli o ia i ona tulivae mo se taimi na foliga e pei sa umi lava ae matala laitiiti loa le faitotoa i lona potu ma sa autilo atu i totonu lona tama.

“Sa ou vaaia le malamalama i lalo o le faitotoa,” o lana tala lea. “O e ala e toe faitau?” Ona ia vaaia lea o loimata i alafau o Mia. Sa ia tootuli i lalo ma opo mai o ia i lona lima. “O le a se mea ua tupu?”

Sa filemu o ia mo se minute. Ona ia fesili mai lea, “Tama, e faapefea ona e maua se molimau?”

Sa fusi mau o ia e Tama. “O se fesili lelei lena. O le manao i se molimau o se tasi o laasaga muamua.”

Sa lagona e Mia le faaletonu i lona fa’ai ua amata ona alu ese.

“O le mauaina o se molimau e le masani ona tupu i se tatalo se tasi. Ma e tusa lava pe ua i ai sau molimau, e tatau ona e galue pea i ai.”

“Ae o fea e sau ai se molimau?”
Le fesili lea a Mia.

“O se molimau e sau mai le Agaga Paia,” o le tala lea a Tama. “Pe na e lagonaina ea se mafanafana ma le lelei i le taimi o se afaifi faaleaiga po o le lotu?”

Sa mafaufau Mia i lena mea. “Ina ua e tuuina mai ia te au se faamanuiaga faapitoa a o lei toe amataina

aoga, sa ou mauaina se lagona lelei.” Sa ia toe mafaufau atili. “Ma ou te lagonaina lava le fiafia i totonu pe a ou faalogo ia Peresitene Monson o lauga i konafesi aoao. Ma pe a ou agalelei i au uo pe ou te faitauina a’u tusitusiga paia, ou te mauaina foi lagona lelei.”

Sa ataata Tama. “O na lagona o le Agaga Paia o loo tautala atu ia te oe. Na te tuuina atu na lagona pe a e faia se mea sa’o po o lou faalogo foi i se mea e moni.”

“Ua ou lagonaina nei le mafanafana ma le fiafia,” o le tala lea a Mia. “Pe o le Agaga Paia lena?”

Sa toe fusi mai o ia e Tama. “Ioe. O loo ia ta’u atu ia te oe o mea o loo ta talanoaina e moni. Ma o le ala lena e te maua ai se molimau.”

Ina ua alu Mia e moe mulimuli ane, na te lei manatu sa i ai sana molimau atoa, ae sa i ai pea lena lagona lelei, ma le mafanafana faapea o mea na ta’u atu e Tama ia te ia ua moni. Sa ia iloaina o lenei lagona ua na o se amataga.

Sa faapupuu Mia i lona palanikeke mafanafana, ma moeini ona mata. A o lei faagalegale moe o ia, sa ia musumusū atu, “Faafetai ia te Oe le Tama Faalelagi, mo le fesoasoani mai ia te au ia maua sau molimau. Ma faafetai ia te Oe mo lo’u tama.” ■
E alala le tusitala i Kalefonia, ISA.

FAAMATALAGA

1. Orson F. Whitney, *Soifuaga o Heber C. Kimball* (1967), 450.

O Le Fale na Fausia i le Sefuluai

Saunia e Janele Williams



O Siaki lenei. O tupe siliva ia a Siaki e tiligi ma tatagi. O le sefuluai lenei a Siaki, e 10 pasene.

O le epikopo lenei e faatalofa ia Siaki pe a ia totogiina lana sefuluai, e 10 pasene.





O le perofeta lenei, e foliga fiafia ma le agaga tatalo, na saunoa mai, “Sei o tatou fausia se malumalu,” i le sefuluai na auina mai e le epikopo na faatalofa ia Siaki pe a ia totogiina lana sefuluai, e 10 pasene.



O le malumalu, iila ma papae, o se fale o le Alii e faatumulia i le malamalama.

O le fale lenei na fausia i le sefuluai ona sa fai mai le perofeta, “sei o tatou fausia se malumalu,” i le sefuluai na auina mai e le epikopo sa faatalofa atu ia Siaki pe a ia totogiina lana sefuluai, e 10 pasene.



O 'ata'ata lenei a Siaki, e tele ma susulu, pe
a alu o ia i le malumalu, e iila ma paepae, ina
ia faamauina i lona aiga i luma o le Atua. ■

E alala le tusitala i Iuta, ISA.

O fea le Sefuluai a Siaki?

Fesoasoani ia Siaki e sue uma ana sene e valu na e tiligi ma tatagi!





**Saunia e Peresitene
Boyd K. Packer**

Peresitene o le Korama a
Aposetolo e Toasefululua

TUU NEI LOA

*Sa nutipalaina le lalolagi o lau uo.
Ua maliu lona faletua.*

A fai o e mafatia mai le popole, mai le faanoanoa po o le maasiasi po o le loto leaga po o le le fiafia po o le lotoleaga, mai le tuuaia o oe lava-ia po o le tauamionuina o oe lava-ia, mafaufau i leni lesona na aoaoina ai au i le tele o tausaga ua mavae e se peteriaka. O ia o se tagata e paia faatoa ou vaaia. . . .

Sa ia tuputupu ae i se nuu laititi ma se naunautiga ina ia faia se mea e manuia ai ia lava. Sa ia tauivi ina ia maua se aooga.

Sa ia faaipoi po i lana manamea, ma o le taimi nei ua lelei mea uma. Sa lelei lana galuega, faatasi ai ma se lumanai manuia. Sa matuai faamemelo le tasi i le isi, ma sa vave ona maitaga lona faletua i lo la alo muamua.

O le po na fanau ai le pepe sa i ai ni faigata. Na o le tasi le fomai ae sa i ai i se nuu maotua, o loo togafiti foi se isi ma'i. . . .

Mulimuli ane, na maua mai le fomai. I le potu o faalavelave faafua-sei, sa ia galue vave ma e lei umi ae tulaga lelei mea uma. Na fanau le pepe ma o le faalavelave, sa foliga mai, ua leai.

I ni nai aso mulimuli ane, na maliu ai si tina talavou mai le siana na togafiti e le fomai i le isi aiga i lena po.

Sa nutipalaina le lalolagi o Ioane. Ua le sagatonu mea uma i le taimi



nei; ua sese mea uma. Ua maliu lona faletua. Sa leai se auala e mafai ai ona ia tausia le pepe ma fai lana galuega.

A o gasolo pea vaiaso, sa faateleina lona faanoanoa. “E le tataua ona faatagaina le fomai e galue,” sa ia fai mai ai. “Na ia aumaia lena siana i lo’u toalua. Pe ana faaeteete o ia, faapenei o ola pea o ia.”

Sa pumoomoo lona manatu, ma i le oona matuitui o ona lagona, sa amata ai ona taufaamata. . . .

I se tasi po na tu’itu’i mai ai le faito-toa. Sa pau lava le tala a se teineitiiti, “E manao Tama e te alu atu. O loo fia talanoa ia te oe.”

O “Tama” o le peresitene o le sitiki. . . .

O leni leoleo mamoe faaleagaga sa mataituina lana lafu ma sa i ai se mea e fia fai atu ia te ia.

O le fautuaga mai lena taitai atamai

sa faigofie lava, “Ioane, tuu lena mea. E leai se mea e mafai ona e faia e toe faafoi mai ai o ia. Soo se mea lava e te faia o le a na ona atili ai ona leaga. Ioane, tuu lena mea.” . . .

Sa ia tauivi i le tiga e pulea o ia lava. Ma mulimuli ane, sa ia naunau ai o nisi lava mea na tutupu, e tataua ona ia usiusitai.

O le usiusitai o se vailaau mamana faaleagaga. E latalata lava i le avea ma se faamalologa mo mea uma.

Sa ia naunau e mulimuli i le fautuaga a lena taitai atamai faaleagaga. O le a ia tuu lena mea.

Ona ia fai mai lea, “. . . Faatoa ou vaai mulimuli ane ina ua ou toea-ina i se fomai mativa mai se nuu maotua—e uumi taimi e galue ai, e le lava le totogi, e fealua’i solo ma le vaivai mai lea ma’i i lea ma’i, ma ni nai vailaau laiti, leai se falemai, ma ni nai meafaigaluega, e tauivi e faasaina soifua, ma sa faamanuiaina i le tele o taimi.

“Sa ia sau i le taimi o faigata, a o tulaga lamatia uma soifua e lua, ma sa ia galue e aunoa ma le fautuai.

“Sa avea au ma se toeaina,” na ia toe faapea mai, “faatoa ou malamalama ai! Semanu ou te faataumaioia lo’u olaga,” na ia saunoa ai, “ma olaga o isi.”

E tele taimi na ia faafetai atu ai i le Alii i ona tulivae mo se taitai perisitua atamai lea na faigofie lava lana fautuaga, “Ioane, tuu lena mea.” ■

*Mai le “Pulupusama o Kiliata,” Liahona,
Jan. 1988, 13–5.*

MALAMALAMAAGA



O a uiga e taua i le olaga?

“O le olaga nei o le taimi lea e saunia ai e feiloai ma le Atua. O i tatou o ni tagata fiafia ma olioli. Tatou te talisapaia se lagona lelei ma malie ma faatauaaina taimi paganoa e faatasitasi ai ma uo ma aiga. Ae e manaomia ona tatou iloaina o loo i ai se faamoemoga taua lea e tatau ona avea ma faavae o le auala tatou te ola ai atoa ai ma a tatou filifiliga uma.”

E I Ai Foi i le Lomiga Lenei

MO TALAVOU MATUTUA

FAALAGOLAGO I **Faamautinoaga** A LE ALII

Atonu e le mafai ona laveaiina i tatou i taimi uma mai o tatou tofotofoga, ae e mafai lava ona faamautinoaina pea i tatou o loo silafia e le Alii ma e naunau e fesoasoani ia i tatou e ala mai i na tofotofoga.



i.42

MO LE AUTALAVOU



i.56

Ae Faapefea pe Afai...?

Fesili e uiga i le Auauna Atu i se Misiona

Popole faapea e le lava lou iloa e uiga i le talalelei? e leo lava le malosi o lau molimau? o oe e matua'i matamuli lava? Saili tali o fesili masani a o lei alu i le misiona ma popolega iinei.

MO TAMAITI

O Le Molimau a Mia

Sa manao Mia ia maua sana lava molimau o le talalelei. Saili pe na faapefea ona ia maua!



i.74

